

आर्हतमतप्रभाकरस्य


पञ्चमो मयूखः

सू य ग ङं

(सूत्रकृताङ्गम्)



वैद्यवंशोद्भवेन परशुरामशर्मणा
निर्युक्ति-पाठान्तर-टिप्पण्यादिभिः परिष्कृतम्



तस्यायं

मूलं भद्रबाहुविरचिता निर्युक्तिश्चेत्येतावान्

प्रथमः खण्डः



पुण्यपत्तनस्यश्रेष्ठिमोतीलालेन प्रकाशितः

SŪYAGADAM

The Second Book of the Sacred Canon of the Jains
For the first time Critically edited

WITH

The Text of Niryukti, Various Readings
Notes and Appendices

By

DR. P. L. VAIDYA, M. A.; D. Litt. (Paris)
Professor of Sanskrit and Ardhamagadhi
Willingdon College, Sangli
Springer Research Scholar, Bombay University

PART I

(Text and Niryukti)

1928

PREFACE



The Sacred Books of the Śvetāmbara Jains were published in two or three editions in Calcutta, Bombay and Hyderabad, but they soon became very rare. Since the introduction of Ardhamāgadhī in the Bombay University many of these books are being appointed as texts for several examinations and students always experienced great difficulty in procuring them. The published editions, moreover, could hardly claim to be critical in any sense of the term and as such were unfit to be used by a critical University Student. I therefore undertook, at the suggestion and support of Shet Motilal Ladhaji of Poona, the task of preparing the first critical edition of the Sūtrakṛtāṅga, the Second Book of the Jain Canon, of which I am just publishing the first part. The second part, which it is hoped will be published without much delay, will contain an introduction, critical apparatus, word-index, notes and several appendices. I very much regret that for some reasons I am not able to bring out the complete edition in one volume and am thus compelled to crave the indulgence of the reader for its being issued in parts.

Willington College, }
1st August 1928.

P. L. V.

सूयगडं

पढमे सुयकखन्धे

समयज्ज्ञयणे पढमे

1. 1. 1.

बुज्झिञ्ज त्ति तिउट्टिञ्जा बन्धणं परिजाणिया ।
किमाह बन्धणं वीरो किं वा जाणं तिउट्टइ ॥ १ ॥
चित्तमन्तमचित्तं वा परिगिज्झ किसामवि ।
अन्नं वा अणुजाणाइ एवं दुक्खा न मुच्चई ॥ २ ॥
सयं तिवायए पाणे अदुवन्नेहि घायए ।
हणन्तं वाणुजाणाइ वेरं वट्ठेइ अप्पणो ॥ ३ ॥
जस्सि कुले समुप्पन्ने जेहिं वा संवसे नरे ।
ममाइ लुप्पई बाले अन्ने अन्नेहि मुच्छिण ॥ ४ ॥
वित्तं सोयरिया चेव सव्वमेयं न ताणइ ।
संखाए जीवियं चेवं कम्मणा उ तिउट्टइ ॥ ५ ॥
एए गन्थे विउक्कम्म एगे समणमाहणा ।
अयाणन्ता विउस्सित्ता सत्ता कामेहि माणवा ॥ ६ ॥
सन्ति पञ्च महब्भूया इहमेगेसिमाहिया ।
पुट्ठी आउ तेऊ वा वाउ आगासपञ्चमा ॥ ७ ॥
एए पञ्च महब्भूया तेब्भो एगो त्ति आहिया ।
अह तेसिं विणासेणं विणासो होइ देहिणो ॥ ८ ॥
जहा य पुट्ठीथूमे एगे नाणाहि दीसइ ।
एवं भो कसिणे लोए विन्नू नाणाहि दीसइ ॥ ९ ॥

एवमेगे ति जम्पन्ति मन्दा आरम्भनिस्सिया ।
 एगे किच्चा सयं पावं तिच्चं दुक्खं नियच्छइ ॥ १० ॥
 पत्तेयं कसिणे आया जे वाला जे य पण्डिया ।
 सन्ति पिच्चा न ते सन्ति नत्थि सत्तोववाइया ॥ ११ ॥
 नत्थि पुण्णे व पावे वा नत्थि लोए इओवरे ।
 सरीरस्स विणासेणं विणासो होइ देहिणो ॥ १२ ॥
 कुब्बं च कारयं चेव सव्वं कुब्बं न विज्जई ।
 एवं अकारओ अप्पा एवं ते उ पगम्भिया ॥ १३ ॥
 जे ते उ वाइणो एवं लोए तेसिं कओ सिया ।
 तमाओ ते तमं जन्ति मन्दा आरम्भनिस्सिया ॥ १४ ॥
 सन्ति पञ्च महब्भूया इहमेगेसिमाहिया ।
 आयछट्ठा पुणो आहु आया लोगे य सासए ॥ १५ ॥
 दुहओ न विणस्सन्ति नो य उप्पज्जए असं ।
 सव्वे वि सव्वहा भावा नियत्तीभावमागया ॥ १६ ॥
 पञ्च खन्धे वयन्तेगे वाला उ खणजोइणो ।
 अन्नो अणन्नो नेवाहु हेउयं च अहेउयं ॥ १७ ॥
 पुढवी आउ तेऊ य तहा वाऊ य एगओ ।
 चत्तारि धाउणो रूवं एवमाहंसु आवरे ॥ १८ ॥
 अगारमावसन्ता वि अरण्णा वा वि पव्वया ।
 इमं दरिसणमावन्ना सव्वदुक्खा विमुच्चई ॥ १९ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते ओहंतराहिया ॥ २० ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते संसारपारगा ॥ २१ ॥

ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते गब्भस्स पारगा ॥ २२ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते जम्मस्स पारगा ॥ २३ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते दुक्खस्स पारगा ॥ २४ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते मारस्स पारगा ॥ २५ ॥
 नाणाविहाइ दुक्खाइं अणुहोन्ति पुणो पुणो ।
 संसारचक्कवालम्भि मच्चुवाहिजराकुले ॥ २६ ॥
 उच्चावयाणि गच्छन्ता गब्भमेस्सन्ति णन्तसो ।
 नायपुत्ते महावीरे एवमाह जिणुत्तमे ॥ २७ ॥

त्ति वेमि ॥

समयज्ज्ञयणे पढमुद्देशो

1. 1. 2.

आघायं पुण एगोसिं उववन्ना पुढो जिया ।
 वेदयन्ति सुहं दुक्खं अदु वा लुप्पन्ति ठाणओ ॥ १ ॥
 न तं सयंकडं दुक्खं कओ अन्नकडं च णं ।
 सुहं वा जइ वा दुक्खं सेहियं वा असेहियं ॥ २ ॥
 सयंकडं न अन्नेहिं वेदयन्ति पुढो जिया ।
 संगइयं तं तहा तेसिं इहमेगेसिमाहियं ॥ ३ ॥
 एवमेयाणि जम्पन्ता बाला पण्डियमाणिणो ।
 निययानिययं सन्तं अयाणन्ता अबुद्धिया ॥ ४ ॥

एवमेगे उ पासत्था ते भुज्जो विप्पगब्भिया ।
 एवं उवट्ठिया सन्ता न ते दुक्खविमोक्खगा ॥ ५ ॥
 जविणो मिगा जहा सन्ता परियाणेण वज्जिया ।
 असङ्कियाइं सङ्कन्ति सङ्कियाइं असङ्किणो ॥ ६ ॥
 परियाणियाणि सङ्कन्ता पासियाणि असङ्किणो ।
 अन्नाणभयसंविग्गा संपलिनति तहिं तहिं ॥ ७ ॥
 अह तं पवेज्ज बज्जं अहे बज्जस्स वा वए ।
 मुच्चेज्ज पयपासाओ तं तु मन्दे न देहई ॥ ८ ॥
 अहियप्पाहियपन्नाणे विसमन्तेणुवागए ।
 स बद्धे पयपासेणं तत्थ घायं नियच्छइ ॥ ९ ॥
 एवं तु समणा एगे मिच्छदिट्ठी अणारिया ।
 असङ्कियाइं सङ्कन्ति सङ्कियाइं असङ्किणो ॥ १० ॥
 धम्मपन्नवणा जा सा तं तु सङ्कन्ति मूढगा ।
 आरम्भाइं न सङ्कन्ति अवियत्ता अक्खोविया ॥ ११ ॥
 सव्वप्पगं विउक्कस्सं सव्वं नूमं विहूणिया ।
 अप्पात्तियं अकम्मंसे एयमट्ठं मिगे चुए ॥ १२ ॥
 जे एयं नाभिजाणन्ति मिच्छदिट्ठी अणारिया ।
 मिगा वा पासबद्धा ते घायमेस्सन्ति णन्तसो ॥ १३ ॥
 माहणा समणा एगे सव्वे नाणं सयं वए ।
 सव्वलोगे वि जे पाणा न ते जाणन्ति किंचण ॥ १४ ॥
 मिलक्खू अमिलक्खुस्स जहा वुत्ताणुभासए ।
 न हेउं से वियाणाइ भासियं तणुभासए ॥ १५ ॥
 एवमन्नाणिया नाणं वयन्ता वि सयं सयं ।
 निच्छयत्थं न जाणन्ति मिलक्खु व्व अबोहिया ॥ १६ ॥

अन्नाणियाणं वीमंसा अन्नाणे न नियच्छइ ।
 अप्पणो य परं नालं कुतो अन्नाणुसासिउं ॥ १७ ॥
 वणे मूढे जहा जन्तू मूढे नेयाणुगामिए ।
 दो वि एए अकोविया तिव्वं सोयं नियच्छई ॥ १८ ॥
 अन्यो अन्धं पहं नेन्तो दूरमद्वाण गच्छइ ।
 आवजे उप्पहं जन्तू अदु वा पन्थाणुगामिए ॥ १९ ॥
 एवमेगे नियागट्ठी धम्ममाराहगा वयं ।
 अदु वा अहम्ममावजे न ते सव्वज्जयं वए ॥ २० ॥
 एवमेगे वियक्काहिं नो अन्नं पज्जुवासिया ।
 अप्पणो य वियक्काहिं अयमञ्जू हि दुम्मई ॥ २१ ॥
 एवं तक्काइ साहेन्ता धम्माधम्मे अकोविया ।
 दुक्खं ते नाइतुट्ठेन्ति सउणी पञ्जरं जहा ॥ २२ ॥
 सयं सयं पसंसन्ता गरहन्ता परं वयं ।
 जे उ तत्थ विउस्सन्ति संसारं ते विउस्सिया ॥ २३ ॥
 अहावरं पुरक्खायं किरियावाइदरिसणं ।
 कम्मचिन्तापणट्ठाणं संसारस्स पवट्ठणं ॥ २४ ॥
 जाणं काएणणाउट्ठी अबुहो जं च हिंसइ ।
 पुट्ठो संवेयइ परं अवियत्तं खु सावज्जं ॥ २५ ॥
 सन्तिमे तउ आयाणा जेहिं कीरइ पावगं ।
 अभिकम्मा य पेसा य मणसा अणुजाणिया ॥ २६ ॥
 एए उ तउ आयाणा जेहिं कीरइ पावगं ।
 एवं भावविसेहीए निव्वाणमभिगच्छई ॥ २७ ॥
 पुत्तं पिया समारब्भ आहारेज्ज असंजए ।
 भुञ्जमाणो य मेहावी कम्मुणा नोवल्लिप्पई ॥ २८ ॥

मणसा जे पदुस्सन्ति चित्तं तेसिं न विज्झइ ।
 अणवज्जमतहं तेसिं न ते संवुडचारिणो ॥ २९ ॥
 इच्चेयाहि य दिट्ठीहिं सायागारवनिस्सिया ।
 सरणं ति मन्नमाणा सेवन्ती पावगं जणा ॥ ३० ॥
 जहा अस्साविणिं नावं जाइअन्धो दुरूहिया ।
 इच्छई पारमागन्तुं अन्तरा य विसीयई ॥ ३१ ॥
 एवं तु समणा एगे मिच्छदिट्ठी अणारिया ।
 संसारपारकंखी ते संसारं अणुपरियट्ठन्ति ॥ ३२ ॥
 त्ति वेमि ॥

समयज्झयणे विइयुहेस्सो

1. 1. 3.

जं किंचि उ पूइकडं सट्ठीमागन्तुमीहियं ।
 सहस्सन्तरियं भुज्जे दुपक्खं चेव सेवई ॥ १ ॥
 तमेव अवियाणन्ता विसमंसि अकोविया ।
 मच्छा वेसालिया चेव उदगस्सभियागमे ॥ २ ॥
 उदगस्स पहावेणं सुक्कं सिग्घं तमेन्ति उ ।
 ढक्केहि य कक्केहि य आमिसत्थेहि ते दुही ॥ ३ ॥
 एवं तु समणा एगे वट्ठमाणसुहेसिणो ।
 मच्छा वेसालिया चेव घायमेस्सन्ति गन्तसो ॥ ४ ॥
 इणमन्नं तु अन्नाणं इहमेगेसिमाहियं ।
 देवउत्ते अयं लोए बम्भउत्ते इ आवरे ॥ ५ ॥
 ईसरेण कडे लोए पहाणाइ तहावरे ।
 जीवाजीवसमाउत्ते सुहदुक्खसमन्निए ॥ ६ ॥

सयंभुणा कडे लोए इइ वुत्तं महेसिणा ।
 मारेण संथुया माया तेण लोए असासए ॥ ७ ॥
 माहणा समणा एगे आह अण्डकडे जए ।
 असो तत्तमकासी य अयाणन्ता मुसं वए ॥ ८ ॥
 सएहिं परियाएहिं लोगं बूया कडे त्ति य ।
 तत्तं ते न वियाणन्ति न विणासी कयाइ वि ॥ ९ ॥
 अमणुन्नसमुप्पायं दुक्खमेव वियाणिया ।
 समुप्पायमयाणन्ता कहं नायन्ति संवरं ॥ १० ॥
 सुद्धे अपावए आया इहमेगेसिमाहियं ।
 पुणो किङ्कापदोसेणं सो तत्थ अवरज्झई ॥ ११ ॥
 इह संवुडे मुणी जाए पच्छा होइ अपावए ।
 वियडम्बु जहा भुज्जो नीरयं सरयं तहा ॥ १२ ॥
 एयाणुवीइ भेहावी बम्मचेरेण ते वसे ।
 पुढो पावाउया सव्वे अक्खायारो सयं सयं ॥ १३ ॥
 सए सए उवट्टाणे सिद्धिमेव न अन्नहा ।
 अहे इहेव वसवत्ती सव्वकामसमप्पिए ॥ १४ ॥
 सिद्धा य ते अरोगा य इहमेगेसिमाहियं ।
 सिद्धिमेव पुरो काउं सासए गट्ठिया नरा ॥ १५ ॥
 असंवुडा अणाईयं भमिहिन्ति पुणो पुणो ।
 कप्पकालमुवज्जन्ति ठाणा आमुक्किब्बिसिय ॥ १६ ॥
 त्ति बेमि ॥

1. 1. 4.

एए जिया भो न सरणं बाला पण्डियमाणिणो ।
 हिच्चा णं पुव्वसंजोयं सिया किच्चोवएसगा ॥ १ ॥
 तं च भिक्खू परिन्नाय वियं तेसु न मुच्छए ।
 अणुक्खस्से अप्पलीणे मज्झेण मुणि जावए ॥ २ ॥
 सपरिग्गहा य सारम्भा इहमेगेसिमाहियं ।
 अपरिग्गहा अणारम्भा भिक्खू ताणं परिव्वए ॥ ३ ॥
 कडेसु घासमेसेज्जा विऊ दत्तेसणं चरे ।
 अगिद्धो विप्पमुक्को य ओमाणं परिवज्जए ॥ ४ ॥
 लोगवायं निसामेज्जा इहमेगेसिमाहियं ।
 विवरीयपन्नसंभूयं अन्नउत्तं तयाणुयं ॥ ५ ॥
 अणन्ते निइए लोए सासए न विणस्सई ।
 अन्तवं निइए लोए इइ धीरो तिपासई ॥ ६ ॥
 अपरिमाणं वियाणाइ इहमेगेसिमाहियं ।
 सव्वत्थ सपरिमाणं इइ धीरो तिपासई ॥ ७ ॥
 जे केइ तसा पाणा चिट्ठन्ति अदु थावरा ।
 परियाए अत्थि से अञ्चू जेण ते तसथावरा ॥ ८ ॥
 उरालं जगओ जोगं विवज्जासं पलेन्ति य ।
 सव्वे अकन्तदुक्खा य अओ सव्वे अहिंसिया ॥ ९ ॥
 एयं खु नाणिणो सारं जं न हिंसइ किंचण ।
 अहिंसासमयं चेव एयावन्तं वियाणिया ॥ १० ॥
 बुसिए य विगयगेही आयाणं सम्म रक्खए ।
 चरियासणसेज्जासु भत्तपाणे य अन्तसो ॥ ११ ॥

एएहिं तिहि ठाणेहिं संजए सययं मृणी ।

उकसं जलणं नूमं मज्झत्थं च विगिञ्चए ॥ १२ ॥

समिए उ सया साहू पञ्चसंवरसंबुडे ।

सिएहि असिए भिक्खू आमोक्खाए परिव्वएजासि ॥ १३ ॥

त्ति बेमि ॥

समयज्झयणं पढमं

वेयालियज्झयणे विइए

1. 2. 1.

संबुज्झह किं न बुज्झह संबोही खलु पेच्च दुल्लहा ।

नो हूवणमन्ति राइयो नो सुलभं पुणरावि जीवियं ॥ १ ॥

डहरा बुद्धा य पासह गम्भत्था वि चयन्ति माणवा ।

सेणे जह वट्ठयं हरे एवं आउखयम्मि तुट्ठई ॥ २ ॥

मायाहि पियाहि लुप्पई नो सुलहा सुगई य पेच्चओ ।

एयाइ भयाइ पेहिया आरम्भा विरमेज्ज सुव्वए ॥ ३ ॥

जमिणं जगई पुढो जगा कम्मेहिं लुप्पन्ति पाणिणो ।

सयमेव कडेहि गाहई नो तस्स मुच्चेज्जपुट्ठयं ॥ ४ ॥

देवा गन्धव्वरक्खसा असुरा भूमिचरा सरीसिवा ।

राया नरसेट्ठिमाहणा ठाणा ते वि चयन्ति दुक्खिया ॥ ५ ॥

कामेहि य संथवेहि गिध्दा कम्मसहा कालेण जन्तवो ।

ताले जह बन्धणच्चुए एवं आयुखयम्मि तुट्ठई ॥ ६ ॥

जे यावि बहुस्सुए सिया धम्मिय माहण भिक्खुए सिया ।

अभिनुमकडेहि मुच्छिए तिव्वं ते कम्मेहि किच्चई ॥ ७ ॥

अह पास विवेगमुट्टिए अचित्तिणे इह भासई धुवं ।
 नाहिसि आरं कओ परं वेहासे कम्मेहि किच्चई ॥ ८ ॥
 जइ वि य नगिणे किसे चरे जइ वि य भुज्जिय मासमन्तसो ।
 जे इह मायाहि मिज्जई आगन्ता गब्भाय णन्तसो ॥ ९ ॥
 पुरिसोरम पावकम्मुणा पलियन्तं मणुयाण जीवियं ।
 सन्ना इह काममुच्छिया मोहं जन्ति नरा असंवुडा ॥ १० ॥
 जययं विहराहि जोगवं अणुपाणा पन्था दुरुत्तरा ।
 अणुसासणमेव पक्कमे वीरेहिं सम्मं पवेइयं ॥ ११ ॥
 विरया वीरा समुट्टिया कोहकायरियाइपीसणा ।
 पाणे न हणन्ति सव्वसो पावाओ विरयाभिनिव्वुडा ॥ १२ ॥
 न वि ता अहमेव लुप्पए लुप्पन्ती लोगंसि पाणिणो ।
 एवं सहिएहि पासए अनिहे से पुट्टे हियासए ॥ १३ ॥
 धुणिया कुलियं व लेववं किसए देहमणासणा इह ।
 अविहिंसामेव पव्वए अणुधम्मो मुणिणा पवेइयो ॥ १४ ॥
 सउणो जह पंसुगुडिया विहुणिय धंसयई सियं रयं ।
 एवं दव्विओवहाणवं कम्मं खवइ तवस्सि माहणे ॥ १५ ॥
 उट्टियमणगारमेसणं समणं ठाणठियं तवस्सिणं ।
 डहरा वुड्डा य पत्थए अवि सुस्सो न य तं लभेज्ज नो ॥ १६ ॥
 जइ काळुणियाणि कासिया जइ रोयन्ति य पुत्तकारणा ।
 दव्वियं भिक्खू समुट्टियं नो लब्भन्ति न संठवित्त्वे ॥ १७ ॥
 जइ वि य कामेहि लाविया जइ नेज्जाहि ण बन्धिउं घरं ।
 जइ जीविय नावकङ्खए नो लब्भन्ति न संठवित्त्वे ॥ १८ ॥
 सेहन्ति य णं ममाइणो माय पिया य सुया य भारिया ।
 पोसाहि ण पासओ तुमं लोग परं पि जहासि पोसणो ॥ १९ ॥

अन्ने अन्नेहि मुच्छिया मोहं जन्ति नरा असंबुडा ।
 विसमं विसमेहि गाहिया ते पावेहि पुणो पगम्भिया ॥ २० ॥
 तम्हा दवि इक्ख पण्डिए पावाओ विरए भिनिवुडे ।
 पणए वीरं महाविहिं सिद्धिपहं नेयाउयं धुवं ॥ २१ ॥
 वेयालियमग्गमागओ मणवयसा काएण निव्वुडो ।
 चिच्चा वित्तं च नायओ आरम्भं च सुसंबुडं चरे ॥ २२ ॥
 ति वेमि ॥

वेयालियज्झयणे पढमुद्देसो

1. 2. 2.

तय सं व जहाइ से रयं इइ संखाय मुणी न मज्जई ।
 गोयन्नतरेण माहणे अहसेयकरी अन्नेसि इंखिणी ॥ १ ॥
 जो परिभवई परं जणं संसारे परिवत्तई महं ।
 अदु इंखिणिया उ पाविया इइ संखाय मुणी न मज्जई ॥ २ ॥
 जे यावि अणायगे सिया जे वि य पेसगपेसगे सिया ।
 जे मोणपयं उवाट्टिए नो लज्जे समयं सया चरे ॥ ३ ॥
 सम अन्नयरम्मि संजमे संसुद्धे समणे परिव्वए ।
 जे आवकहा समाहिए दविए कालमकासि पण्डिए ॥ ४ ॥
 दूरं अणुपास्सिया मुणी तीयं धम्ममणागयं तहा ।
 पुट्टे फरुसेहि माहणे अवि हण्णू समयम्मि रीयइ ॥ ५ ॥
 पन्नसमत्ते सया जए समताधम्ममुदाहरे मुणी ।
 सुहुमे उ सया अलूसए नो कुज्जे नो माणि माहणे ॥ ६ ॥
 बहुजणनमणाम्मि संबुडो सव्वट्टेहि नरे अणिस्सिए ।
 हरए व सया अणाविले धम्मं पादुरकासि कासवं ॥ ७ ॥

बहवे पाणा पुढो सिया पत्तेयं समयं समीहिया ।
 जे मोणपयं उवट्टिए विरइं तत्थ अक्कासि पण्डिए ॥ ८ ॥
 धम्मस्स य पारगे मुणी आरम्भस्स य अन्तए ठिए ।
 सोयन्ति य णं ममाइणो नो लब्भन्ति नियं परिग्गहं ॥ ९ ॥
 इहलोगदुहावहं विऊ परलोगे य दुहं दुहावहं ।
 विद्धंसणधम्ममेव तं इइ विजं को गारमावसे ॥ १० ॥
 महयं पल्लिगोव जाणिया जा वि य वंदणपूयणा इहं ।
 सुहुमे सल्ले दुरुद्धरे विउमंता पयहिज संथवं ॥ ११ ॥
 एग चर ठाणमासणे सयणे एग समाहिए सिया ।
 भिक्खु उवहाणवीरिए वइगुत्ते अज्झत्तसंबुडो ॥ १२ ॥
 नो पीहे न यावपंगुणे दारं सुन्नघरस्स संजए ।
 पुढे न उदाहरे वयं न समुच्छे नो संथरे तणं ॥ १३ ॥
 जत्थत्थमिए अणाउले समविसमाइ मुणी हियासए ।
 चरगा अदु वा वि भेरवा अदु वा तत्थ सरीसिवा सिया ॥ १४ ॥
 तिरिया मणुया य दिव्वगा उवसग्गा तिविहा हियासिया ।
 लोमादीयं न हारिसे सुन्नागारगओ महामुणी ॥ १५ ॥
 नो अभिकंखेज जीवियं नो वि य पूयणपत्थणे सिया ।
 अब्भत्थमुवेन्ति भेरवा सुन्नागारगयस्स भिक्खुणो ॥ १६ ॥
 उवणीयतरस्स ताइणो भयमाणस्स विविक्कमासणं ।
 सामाइयमाहु तस्स जं जो अप्पाण भए न दंसए ॥ १७ ॥
 उसिणोदगतत्तभोइणो धम्माठियस्स मुणिस्स हीमतो ।
 संसग्गे असाहु राइहिं असमाही उ तहागयस्स वि ॥ १८ ॥
 अहिगरणकडस्स भिक्खुणो वयमाणस्स पसज्ज दारुणं ।
 अठे परिहायई बहू अहिगरणं न करेज पण्डिए ॥ १९ ॥

सीओदग पडि दुधुंछिणो अपडिन्नस्स लवावसप्पिणो ।
 सामाइयमाहु तस्स जं जो गिहिमत्तेऽसणं न भुज्जई ॥ २० ॥
 न य संखयमाहु जीवियं तह वि य बालजणो पगम्भई ।
 बाले पावेहि मिज्जई इइ संखाय मुणी न मज्जई ॥ २१ ॥
 छंदेण पले इमा पया बहुमाया मोहेण पावुडा ।
 वियडेण पलोन्ति माहणे सीउण्हं वयसा हियासए ॥ २२ ॥
 कुजए अपराजिए जहा अक्खेहिं कुसलेहि दीवयं ।
 कडमेव गहाय नो कलिं नो तीयं नो चेव दावरं ॥ २३ ॥
 एवं लोगम्भि ताइणा बुइए जे धम्मे अणुत्तरे ।
 तं गिण्ह हियं ति उत्तमं कडमिव सेस बहाय पण्डिए ॥ २४ ॥
 उत्तर मणुयाण अहिया गामधम्म इइ भे अणुस्सुयं ।
 जंसी विरया समुट्ठिया कासवस्स अणुधम्मचारिणो ॥ २५ ॥
 जे एय चरन्ति आहियं नाएणं महया महेसिणा ।
 ते उट्ठिय ते समुट्ठिया अन्नोन्नं सारेन्ति धम्मओ ॥ २६ ॥
 मा पेह पुरा पणामए अभिकंखे उवहिं धुणित्तए ।
 ज दूमण तेहि नो नया ते जाणन्ति समाहिमाहियं ॥ २७ ॥
 नो काहिँ होज्ज संजए पासणिए न य संपसारए ।
 नच्चा धम्मं अणुत्तरं कयकिरिए न यावि मामए ॥ २८ ॥
 छन्नं च पसंस नो करे न य उक्कोस पगास माहणे ।
 तेसिं सुविवेगमाहिए पणया जेहि सुजोसियं धुवं ॥ २९ ॥
 अनिहे सहिए सुसंबुडे धम्मट्ठी उवहाणवीरिए ।
 विहरेज्ज समाहिइंदिए अत्तहियं खु दुहेण लब्भइ ॥ ३० ॥
 न हि नूण पुरा अणुस्सुयं अदु वा तं तह नो समुट्ठियं ।
 मुणिणा सामाइ आहियं नाएणं जगसव्वदंसिणा ॥ ३१ ॥

एवं भत्ता महन्तरं धम्ममिणं सहिया बहू जणा ।
 गुरुणो छंदाणुवत्तगा विरयां तिण्ण महोधमाहियं ॥ ३२ ॥
 ति बेमि ॥

वेयालियज्झयणास्मि विइयुद्देसो

1. 2. 3.

संवुडकम्मस्स भिक्खुणो जं दुक्खं पुटं अबोहिए ।
 तं संजमओज्वचिज्जई मरणं हेच्च वयन्ति पण्डिया ॥ १ ॥
 जे विन्नवणाहिजोसिया संतिण्णेहि समं वियाहिया ।
 तम्हा उट्ठं ति पासहा अदक्खु कामाई रोगवं ॥ २ ॥
 अग्गं वणिएहि आहियं धारेन्ती राझणिया इहं ।
 एवं परमा महव्वया अक्खाया उ सराइभोयणा ॥ ३ ॥
 जे इह सायाणुगा नरा अज्झोववन्ना कामेहि मुच्छिया ।
 किवणेण समं पगम्भिया न वि जाणन्ति समाहिमाहियं ॥ ४ ॥
 वाहेण जहा व विच्छए अबले होइ गवं पचोइए ।
 से अन्तसो अप्पथामए नाइवहे अबले विसीयइ ॥ ५ ॥
 एवं कामेसण विऊ अज्ज सुए पयहेज्ज संथवं ।
 कामी कामे न कामए लद्धे वा वि अलद्ध कण्हुई ॥ ६ ॥
 मा पच्छ असाधुता भवे अच्चेही अणुसास अप्पगं ।
 आहियं च असाहु सोयई से थणई परिदेवई बहं ॥ ७ ॥
 इह जीवियमेव पासहा तरुणे वा ससयस्स तुट्ठई ।
 इत्तरवासे य बुज्झह गिद्ध नरा कामेसु मुच्छिया ॥ ८ ॥
 जे इह आरम्भनिस्सिया आयदण्ड एगन्तल्लसगा ।
 मीन्ता ते पावलोगयं चिररायं आसुरियं दिसं ॥ ९ ॥

न य संखयमाहु जीवियं तह वि य बालजणो पगब्भई ॥
 पच्चुप्पन्नेण कारियं को दट्ठुं परलोगमागए ॥ १० ॥
 अदक्खुव दक्खुवाहियं तं सदहसु अदक्खुदंसणा ।
 हंदि हु मुनिरुद्धदंसणे मोहणिण कडेण कम्मुणा ॥ ११ ॥
 दुक्खी मोहे पुणो पुणो निव्विन्देज्ज सिलोगपूयणं ।
 एवं सहिए हिपासए आयतुलं पाणेहि संजए ॥ १२ ॥
 गारं पि य आवसे नरे अणुपुव्वं पाणेहि संजए ।
 समता सव्वत्थ सुव्वए देवाणं गच्छे सलोगयं ॥ १३ ॥
 सोच्चा भगवाणुसासणं सच्चे सत्थ करेज्जुवक्कमं ।
 सव्वत्थ विणीयमच्छरे उच्चं भिक्खु विसुद्धमाहरे ॥ १४ ॥
 एवं नच्चा अहिट्ठए धम्मट्ठी उवहाणवीरिए ।
 गुत्ते जुत्ते सया जए आयपरे परमायतट्ठिए ॥ १५ ॥
 वित्तं पसवो य नाइओ तं बाले सरणं ति मन्नई ।
 एए मम तेसु वी अहं नो ताणं सरणं न विज्जई ॥ १६ ॥
 अब्भागामियम्मि वा दुहे अहवा उक्कमिए भवन्तिए ।
 एगस्स गई य आगई विदुमन्ता सरणं न मन्नई ॥ १७ ॥
 सव्वे सयकम्मकप्पिया अवियत्तेण दुहेण पाणिणो ।
 हिण्डन्ति भयाउला सटा जाइजरामरणेहि भिहुया ॥ १८ ॥
 इणमेव खणं वियाणिया नो सुलभं बोहिं च आहियं ।
 एवं सहिए हिपासए आह जिणे इणमेव सेसगा ॥ १९ ॥
 अभविंसु पुरा वि भिक्खुवो आएसा वि भवन्ति सुव्वया ।
 एयाइं गुणाइं आहु ते कासवस्स अणुधम्मचारिणो ॥ २० ॥
 तिविहेण वि पाण मा हणे आयहिए अणियाण संवुडे ।
 एवं सिद्धा अणन्तसो संपइ जे य अणागयावरे ॥ २१ ॥

एवं से उदाहु अणुत्तरनाणी अणुत्तरदंसी अणुत्तरनाणदंसणधरे ।
अरहा नायपुत्ते भगवं वेसालिए वियाहिए ॥ २२ ॥

त्ति बेमि ॥

वेयालिज्झयणं बिइयं

उवसग्गज्झयणे तइए

1. 3. 1.

सूरं मन्नइ अप्पाणं जाव जेयं न पस्सई ।
जुज्झन्तं दढधम्माणं सिसुपालो व महारहं ॥ १ ॥

पयाया सूरा रणसीसे संगामम्मि उवाट्टिए ।
माया पुत्तं न जाणाइ जेएण परिविच्छए ॥ २ ॥

एवं सेहे वि अप्पुट्ठे भिक्खायरियाअकोविए ।
सूरं मन्नइ अप्पाणं जाव ल्हं न सेवए ॥ ३ ॥

जया हेमन्तमासम्मि सीयं फुसइ सव्वगं ।
तत्थ मन्दा विसीयन्ति रज्जहीणा व खत्तिया ॥ ४ ॥

फुट्ठे गिम्हाहितावेणं विमणे सुपिवासिए ।
तत्थ मन्दा विसीयन्ति मच्छा अप्पोदए जहा ॥ ५ ॥

सया दत्तेसणा दुक्खा जायणा दुप्पणोल्लिया ।
कम्मत्ता दुब्भगा चेव इच्चाहंसु पुट्ठोजणा ॥ ६ ॥

एए सहे अचायन्ता गामेसु नगरेसु वा ।
तत्थ मन्दा विसीयन्ति संगामम्मि व भीरूया ॥ ७ ॥

अप्पेगे खुधियं भिक्खुं सुणी डंसइ लूसए ।
तत्थ मन्दा विसीयन्ति तेउपुट्ठा व पाणिणो ॥ ८ ॥

अप्पेगे पडिभासन्ति पडिपन्थियमागया ।
 पडियारगया एए जे एए एवजीविणो ॥ ९ ॥
 अप्पेगे वइ जुञ्जन्ति नगिणा पिण्डोलगाहमा ।
 मुण्डा कण्डूविणट्ठङ्गा उज्जला असमाहिया ॥ १० ॥
 एवं विप्पडिवन्नेगे अप्पणा उ अजाणया ।
 तमाओ ते तमं जन्ति मन्दा मोहेण पाबुडा ॥ ११ ॥
 पुट्टो य दंसमसगेहिं तणफासमचाइया ।
 न मे दिट्ठे परे लोए जइ परं मरणं सिया ॥ १२ ॥
 संतत्ता केसलोएणं बम्भचेरपराइया ।
 तत्थ मन्दा विसीयन्ति मच्छा विट्ठा व केयणे ॥ १३ ॥
 आयदण्डसमायारे मिच्छासंठियभावणा ।
 हरिसप्पओसमावन्ना केई लसन्तिनारिया ॥ १४ ॥
 अप्पेगे पलियन्तेसिं चारो चोरो त्ति सुव्वयं ।
 बन्धन्ति भिक्खुयं बाला कसायवयणेहि य ॥ १५ ॥
 तत्थ दण्डेण संवीते मुट्ठिणा अदु फलेण वा ।
 नाईणं सरई बाले इत्थी वा कुट्ठगामिणी ॥ १६ ॥
 एए भो कसिणा फासा फरुसा दुरहियासया ।
 हत्थी वा सरसंविता कीवावस गया गिहं ॥ १७ ॥
 ति बेमि ॥

उवसग्गज्झयणे पढमुद्देसे

1. 3. 2.

अहिमे सुहुमा संग्गा भिक्खूणं जे दुरुत्तरा ।
 जत्थ एगे विसीयन्ति न चयन्ति जवित्तए ॥ १ ॥
 अप्पेगे नायगा दिस्स रोयन्ति परिवारिया ।
 पोस ने ताय पुट्टो सि कस्स ताय जहासि ने ॥ २ ॥

पिया ते थेरओ ताय ससा ते खुड्डिया इमा ।
 भायरो ते सगा ताय सोयरा किं जहासि णे ॥ ३ ॥
 मायरं पियरं पोस एवं लोगो भविस्सइ ।
 एवं खु लोइयं ताय जे पालेन्ति य मायरं ॥ ४ ॥
 उत्तरा महुरुल्लावा पुत्ता ते ताय खुड्डया ।
 भारिया ते नवा ताय मा सा अन्नं जणं गमे ॥ ५ ॥
 एहि ताय घरं जामो मा य कम्मे सहा वयं ।
 बिइयं पि ताय पासामो जामु ताव सयं गिहं ॥ ६ ॥
 गन्तुं ताय पुणो गच्छे न तेणासमणो सिया ।
 अकामगं परिकम्मं को ते वारिउमरिहइ ॥ ७ ॥
 जं किंचि अणगं ताय तं पि सच्चं समीकयं ।
 हिरण्णं ववहाराइ तं पि दाहामु ते वयं ॥ ८ ॥
 इच्चेव णं सुसेहन्ति कालुणीयसमुट्ठिया ।
 विबद्धो नाइसंगेहिं तओ गारं पहावइ ॥ ९ ॥
 जहा रुक्खं वणे जायं मालुया पडिबन्धइ ।
 एवं णं पडिबन्धन्ति नाइओ असमाहिणा ॥ १० ॥
 विबद्धो नाइसंगेहिं हत्थी वा वि नवग्गहे ।
 पिट्ठओ परिसप्पन्ति सुय गो व्व अदूरए ॥ ११ ॥
 एए संग्गा मणूसाणं पायाला व अतारिमा ।
 कीवा जत्थ य किस्सन्ति नाइसंगेहि मुच्छिया ॥ १२ ॥
 तं च भिक्खू परिन्नाय सव्वे संग्गा महासवा ।
 जीवियं नायकंखिज्जा सोच्चा धम्ममणुत्तरं ॥ १३ ॥
 अहिमे सन्ति आवट्ठा कासवेणं पवेइया ।
 बुद्धा जत्थावसप्पन्ति सीयन्ति अबुहा जहिं ॥ १४ ॥

रायाणो रायमच्चा य माहणा अदु व खत्तिया ।
 निमन्तयन्ति भोगेहिं भिक्खुयं साहुजीविणं ॥ १५ ॥
 हत्थस्सरहजाणेहिं विहारगमणेहि य ।
 भुञ्ज भोगे इमे सग्गे महरिसी पूजयामु तं ॥ १६ ॥
 वत्थगन्धमलंकारं इत्थीओ सयणाणि य ।
 भुञ्जाहिमाइं भोगाइं आउसो पूजयामु तं ॥ १७ ॥
 जो तुमे नियमो चिण्णो भिक्खुभावम्मि सुव्वया ।
 अगारमावसन्तस्स सव्वो संविज्जए तहा ॥ १८ ॥
 चिरं दूइज्जमाणस्स दोसो दाणिं कुओ तव ।
 इच्चेव णं निमन्तेन्ति नीवारेण व सूररं ॥ १९ ॥
 चोइया भिक्खचरियाए अचयन्ता जवित्तए ।
 तत्थ मन्दा विसीयन्ति उज्जाणंसि व दुव्वला ॥ २० ॥
 अचयन्ता व लूहेण उवहाणेण तज्जिया ।
 तत्थ मन्दा विसीयन्ति उज्जाणंसि जरग्गवा ॥ २१ ॥
 एवं निमन्तणं लद्धं मुच्छिया गिद्ध इत्थिसु ।
 अज्झोववन्ना कामेहिं नोइज्जन्ता गया गिहं ॥ २२ ॥
 ति बेमि ॥

उवसग्गज्झयणे विइयुहेसे

1. 3. 3.

जहा संगामकालम्मि पिट्ठओ भीरु वेहइ ।
 वलयं गहणं नूमं को जाणइ पराजयं ॥ १ ॥
 मुहुत्ताणं मुहुत्तस्स मुहुत्तो होइ तारिसो ।
 पराजिया वसप्पामो इइ भीरु उवेहई ॥ २ ॥

एवं उ समणा एगे अवलं नच्चाण अप्पगं ।
 अणागयं भयं दिस्स अवकप्पन्तिमं सुयं ॥ ३ ॥
 को जाणइ विऊवायं इत्थीओ उदगाउ वा ।
 चोइज्जन्ता पवक्खामो न नो अत्थि पक्कप्पियं ॥ ४ ॥
 इच्चेव पडिलेहन्ति वलया पडिलेहिणो ।
 वितिगिच्छसमावन्ना पन्थाणं च अकोविया ॥ ५ ॥
 जे उ संगामकालम्मि नाया सूरपुरंगमा ।
 नो ते पिट्टमुवेहन्ति किं परं मरणं सिया ॥ ६ ॥
 एवं समुट्ठिए भिक्खू वोसिज्जा गारबन्धणं ।
 आरम्भं तिरियं कट्ठु अत्तत्ताए परिव्वए ॥ ७ ॥
 तमेगे परिभासन्ति भिक्खुयं साहुजीविणं ।
 जे एवं परिभासन्ति अन्तए ते समाहिए ॥ ८ ॥
 संबद्धसमकप्पा उ अन्नमन्नेसु मुच्छिया ।
 पिण्डवायं गिलाणस्स जं सारेह दलाह य ॥ ९ ॥
 एवं तुब्भे सरागत्था अन्नमन्नमणुव्वसा ।
 नट्टसप्पहसम्भावा संसारस्स अपारगा ॥ १० ॥
 अह ते परिभासेज्जा भिक्खु मोक्खविसारए ।
 एवं तुब्भे पभासन्ता दुपक्खं चेव सेवह ॥ ११ ॥
 तुब्भे भुज्जह पाएसु गिलाणो अभिहडम्मि य ।
 तं च बीओदगं भोच्चा तमुद्दिस्सादि जं कडं ॥ १२ ॥
 लित्ता तिच्चाभितावेणं उज्झिया असमाहिया ।
 नाइकण्डूइयं सेयं अरुयस्सावरज्जई ॥ १३ ॥
 तत्तेण अणुसिट्ठा ते अपडिन्नेण जाणया ।
 न एस नियए मग्गे असमिक्खा वई किई ॥ १४ ॥

एरिसा जा वई एसा अग्गवेणु व्व करिसिया ।
 गिहिणो अभिहडं सेयं भुञ्जिउं न उ भिक्खुणं ॥ १५ ॥
 धम्मपन्नवणा जा सा सारम्भा न विसोहिया ।
 न उ एयाहिं दिट्ठीहिं पुव्वमासिं पगप्पियं ॥ १६ ॥
 सव्वाहिं अणुजुत्तीहिं अचयन्ता जवित्तए ।
 तओ वायं निराकिच्चा ते भुञ्जो वि पगाब्भिया ॥ १७ ॥
 रागदोसाभिभूयप्पा मिच्छत्तेण अभिदुया ।
 आउस्से सरणं जन्ति टंकणा इव पव्वयं ॥ १८ ॥
 बहुगुणप्पगप्पाइं कुञ्जा अत्तसमाहिए ।
 जेणन्ने न विरुज्जेज्जा तेण तं तं समायरे ॥ १९ ॥
 इमं च धम्ममायाय कासवेण पवेइयं ।
 कुञ्जा भिक्खू गिलाणस्स अगिलाए समाहिए ॥ २० ॥
 संखाय पेसलं धम्मं दिट्ठिमं परिनिव्वुडे ।
 उवसग्गे नियामित्ता आ मोक्खाए परिव्वएज्जासि ॥ २१ ॥
 त्ति वेमि ॥

उवसग्गज्झयणे तइयुहेसे

1. 3. 4.

आहंसु महापुरिसा पुव्विं तत्ततवोधणा ।
 उदएण सिद्धिमावन्ना तत्थ मन्दो विसीयइ ॥ १ ॥
 अशुञ्जिया नमी विदेही रामगुत्ते य भुञ्जिया ।
 बाहुए उदगं भोच्चा तहा नारायणे रिसी ॥ २ ॥
 आसिले देविले चेव दीवायण महारिसी ।
 पारासरे दगं भोच्चा वीयाणि हरियाणि य ॥ ३ ॥

एए पुव्वं महापुरिसा आहिया इह संमया ।
 भोच्चा बीयोदगं सिद्धा इह मेयमणुस्सुयं ॥ ४ ॥
 तत्थ मन्दा विसीयन्ति वाहच्छिन्ना व गद्दमा ।
 पिट्ठओ परिसप्पन्ति पिट्ठसप्पी य संभमे ॥ ५ ॥
 इहमेगे उ भासन्ति सायं साएण विज्जई ।
 जे तत्थ आरियं मग्गं परमं च समाहियं ॥ ६ ॥
 मा एयं अवमन्नन्ता अप्पेणं लुम्पहा बहुं ।
 एयस्स उ अमोक्खाए अयोहारि व्व जूरह ॥ ७ ॥
 पाणाइवाए वट्टन्ता मुसावाए असंजया ।
 अदिन्नादाणे वट्टन्ता मेहुणे य परिग्गहे ॥ ८ ॥
 एवमेगे उ पासत्था पन्नवन्ति अणारिया ।
 इत्थीवसं गया बाला जिणसासणपरंमुहा ॥ ९ ॥
 जहा गण्डं पिलागं वा परिपीलेज्ज मुहुत्तगं ।
 एवं विन्नवणित्थीसु दोसो तत्थ कओ सिया ॥ १० ॥
 जहा मन्धादणे नाम थिमियं भुञ्जई दगं ।
 एवं विन्नवणित्थीसु दोसो तत्थ कओ सिया ॥ ११ ॥
 जहा विहंगमा पिङ्गा थिमियं भुञ्जई दगं ।
 एवं विन्नवणित्थीसु दोसो तत्थ कओ सिया ॥ १२ ॥
 एवमेगे उ पासत्था मिच्छदिट्ठी अणारिया ।
 अज्जोववन्ना कामेहिं पूयणा इव तरुणए ॥ १३ ॥
 अणागयमपस्सन्ता पच्चुप्पन्नगवेसगा ।
 ते पच्छा परितप्पन्ति खीणे आउम्मि जोव्वणे ॥ १४ ॥
 जेहिं काले परिकन्तं न पच्छा परितप्पए ।
 ते धीरा बन्धणुम्मुक्का नावकंखन्ति जीवियं ॥ १५ ॥

जहा नई वेयरणी दुत्तरा इह संमया ।
 एवं लोगंसि नारीओ दुत्तरा अमईमया ॥ १६ ॥
 जेहिं नारीण संजोगा पूयणा पिट्ठओ कया ।
 सव्वमेयं निराकिच्चा ते ठिया सुसमाहिए ॥ १७ ॥
 एए ओघं तरिस्सन्ति समुद्धं ववहारिणो ।
 जत्थ पाणा विसन्नासि किच्चन्ती सयकम्मुणा ॥ १८ ॥
 तं च भिक्खू परिन्नाय सुव्वए समिए चरे ।
 मुसावायं च वज्जिजा अदिन्नादाणं च वोसिरे ॥ १९ ॥
 उड्डमहे तिरियं वा जे केई तसथावरा ।
 सव्वत्थ विरइं कुजा सन्ति निव्वाणमाहियं ॥ २० ॥
 इमं च धम्ममायाय कासवेण पवेइयं ।
 कुजा भिक्खू गिलाणस्स अगिलाए समाहिए ॥ २१ ॥
 संखाय पेसलं धम्मं दिट्ठिमं परिनिव्वुडे ।
 उवसग्गे नियामित्ता आ मोक्खाए परिव्वएज्जासि ॥ २२ ॥
 त्ति वेमि ॥

उवसग्गज्झयणं तइयं

इत्थिपरिन्नज्झयणे चउत्थे

1. 4. 1.

जे मायरं च पियरं च विप्पजहाय पुव्वसंजोगं ।
 एगे सहिए चरिस्सामि आरयमेहुणो विवित्तेसु ॥ १ ॥
 सुहुमेणं तं षक्किम्म छन्नपएण इत्थिओ मन्दा ।
 उव्वायं पि ताउ जाणंसु जहा लिस्सन्ति भिक्खुणो एगे ॥ २ ॥

पासे भिसं निसीयन्ति अभिक्खणं पोसवत्थं परिहन्ति ।
 कायं अहे वि दंसन्ति बाहू उद्धट्ठु कक्खमणुव्वए ॥ ३ ॥
 सयणासणेहि जोगेहिं इत्थियो एगया निमन्तेन्ति ।
 एयाणि चेव से जाणे पासाणि विरुवरूवाणि ॥ ४ ॥
 नो तासु चक्खु संधेज्जा नो वि य साहसं समभिजाणे ।
 नो सहियं पि विहरेज्जा एवमप्पा सुरक्खिओ होइ ॥ ५ ॥
 आमन्तिय उस्सविया भिक्खुं आयसा निमन्तेन्ति ।
 एयाणि चेव से जाणे सदाणि विरुवरूवाणि ॥ ६ ॥
 मणबन्धणेहि णेगेहिं कलुणविणीयमुवगासित्ताणं ।
 अदु मञ्जुलाइं भासन्ति आणवयन्ति भिन्नकहाहिं ॥ ७ ॥
 सीहं जहा व कुणिमेणं निब्भयमेगचरं ति पासेणं ।
 एवित्थियाउ बन्धन्ति संवुडं एगइयमणगारं ॥ ८ ॥
 अह तत्थ पुणो नमयन्ती रहकारो व नेमि आणुपुव्वीए ।
 बद्धो भिए व पासेणं फन्दन्ते वि न मुच्चए ताहे ॥ ९ ॥
 अह सेऽणुतप्पई पच्छा भोच्चा पायसं व विसमिस्सं ।
 एवं विवेगमायाय संवासो न वि कप्पए दविए ॥ १० ॥
 तम्हा उ वज्जए इत्थी विसलित्तं व कण्टगं नच्चा ।
 ओए कुलाणि वसवत्ती आघाए न से वि निग्गन्थे ॥ ११ ॥
 जे एयं उच्छं अणुगिद्धा अन्नयरा होन्ति कुसीलाणं ।
 सुतवस्सिए वि से भिक्खू नो विहरे सह णमित्थीसु ॥ १२ ॥
 अवि धूयराहि सुण्हाहिं धाईहिं अदुव दासीहिं ।
 महईहि वा कुमारीहिं संथवं से न कुज्जा अणगारे ॥ १३ ॥
 अदु नाइणं च सुहीणं वा अप्पियं दट्ठु एगया होइ ।
 गिद्धा सत्ता कामेहिं रक्खणपोसणे मणुस्सोऽसि ॥ १४ ॥

समणं पि दद्दुदासीणं तत्थ वि ताव एगे कुप्पन्ति ।
 अदु वा भोगेणेहि नत्थेहिं इत्थीदोसं संकिणो होन्ति ॥ १५ ॥
 कुव्वन्ति संथवं ताहिं पब्भट्ठा समाहिजोगेहिं ।
 तम्हा समणा न समेन्ति आयहियाए संनिसेज्जाओ ॥ १६ ॥
 बहवे गिहाइँ अवहट्ठु मिस्सीभावं पत्थुया य एगे ।
 धुवमग्गमेव पवयन्ति वायावीरियं कुसीलाणं ॥ १७ ॥
 सुद्वं रवइ परिसाए अह रहस्सम्मि दुक्कडं करेन्ति ।
 जाणन्ति य णं तहाविऊ माइल्ले महासट्ठेऽयं ति ॥ १८ ॥
 सयं दुक्कडं च न वयइ आइट्ठो वि पक्कथइ बाले ।
 वेयाणुवीइ मा कासी चोइज्जन्तो गिलाइ से भुज्जो ॥ १९ ॥
 ओसिया वि इत्थिपोसेसु पुरिसा इत्थिवेयखेयन्ना ।
 पन्नासमानिया वेगे नारीणं वसं उवकसन्ति ॥ २० ॥
 अवि हत्थपायल्लेयाए अदु वा वद्धमंसउकन्ते ।
 अवि तेयसाभितावणाणि तच्छिय खारसिंचणाइँ य ॥ २१ ॥
 अदु कण्णनासल्लेयं कण्ठल्लेयणं तिइक्खन्ती ।
 इइ एत्थ पावसंतत्ता न वेन्ति पुणो न काहिन्ति ॥ २२ ॥
 सुयमेयमेवमेगेसिं इत्थीवेयं ति हु सुयक्खायं ।
 एयं पि ता वइत्ताणं अदु वा कम्मणा अवकरेन्ति ॥ २३ ॥
 अन्नं मणेण चिन्तेन्ति वाया अन्नं च कम्मणा अन्नं ।
 तम्हा न सदहे भिक्खू बहुमायाओ इत्थिओ नच्चा ॥ २४ ॥
 जुवई समणं ब्रूया विचित्तलंकारवत्थगाणि परिहिता ।
 विरया चरिस्सहं रुक्खं धम्ममाइक्ख णे भयन्तारो ॥ २५ ॥
 अदु सावियापवाएणं अहमंसि साहम्मिणी य समणाणं ।
 जउकुम्भे जहा उवज्जोई संवासे विऊ विसीएज्जा ॥ २६ ॥

जउकुम्भे जोइउवगूढे आसुभितत्ते नासमुवयाइ ।
 एवित्थियाहि अणगारा संवासेण नासमुवयन्ति ॥ २७ ॥
 कुव्वन्ति पावगं कम्मं पुट्ठा वेगेवमाहिंसु ।
 नो हं करेमि पावं ति अंकेसाइणी ममेस ति ॥ २८ ॥
 बालस्स मन्दयं वीयं जं च कडं अवजाणइ भुज्जो ।
 दुगुणं करेइ से पावं पूयणकामो विसन्नेसी ॥ २९ ॥
 संलोकणिज्जमणगारं आयगयं निमन्तणेणाहंसु ।
 वत्थं च ताइ पायं वा अन्नं पाणगं पडिग्गाहे ॥ ३० ॥
 नीवारमेवं बुज्जेज्जा नो इच्छे अगारमागन्तुं ।
 बद्धे विसयपासेहिं मोहमावज्जइ पुणो मन्दे ॥ ३१ ॥
 ति वेमि ॥

इत्थिपरिन्नज्जयणे पढमुदेसे

1. 4. 2.

ओए सया न रजेज्जा भोगकामी पुणो विरजेज्जा ।
 भोगे समणाण सुणेह जह भुज्जन्ति भिक्खुणो एगे ॥ १ ॥
 अह तं तु भेयमावन्नं मुच्छियं भिक्खुं काममइवड्ढं ।
 पालिभिन्दिया णं तो पच्छ पादुद्धङ्कु मुद्धि पहणन्ति ॥ २ ॥
 जइ केसिया णं मए भिक्खु नो विहरे सह णमित्थीए ।
 केसाणवि हं लुञ्चिस्सं नन्नत्थ मए चरेज्जासि ॥ ३ ॥
 अह णं से होइ उवलद्धो तो पेसन्ति तहाभूएहिं ।
 अलाउच्छेयं पेहेहि वग्गुफलाइं आहराहि ति ॥ ४ ॥
 दारूणि सागपागाए पज्जोओ वा भविस्सई राओ ।
 प्रायण्णि य मे रयावेहि एहि ता मे पिट्ठओमदे ॥ ५ ॥

वत्थाणि य मे पडिलेहेहि अन्नं पाणं च आहराहि त्ति ।
 गन्धं च रओहरणं च कासवगं च मे समणुजाणाहि ॥ ६ ॥
 अदु अज्जणिं अलंकारं कुक्कययं मे पयच्छाहि ।
 लोद्धं च लोद्धकुसुमं च वेणुपलासियं च गुलियं च ॥ ७ ॥
 कुट्टं तगरं च अगरं संपिट्ठं सम्मं उसिरेणं ।
 तेह्लं मुहमिज्जाए वेणुफलाइं संनिहाणाए ॥ ८ ॥
 नन्दीचुण्णगाइं पाहराहि छत्तोवाणहं च जाणाहि ।
 सत्थं च सूवच्छेज्जाए आणीलं च वत्थयं रयावेहि ॥ ९ ॥
 सुफणिं च सागपागाए आमलगाइं दगाहरणं च ।
 तिलगकरणिमज्जणसलागं धिसु मे विहूणयं विजाणेहि ॥ १० ॥
 संडासगं च फणिहं च सीहलिपासगं च आणाहि ।
 आदंसगं च पयच्छाहि दन्तपक्खालणं पवेसाहि ॥ ११ ॥
 पूगफलं तंवोह्लयं सूइ सुत्तगं च जाणाहि ।
 कोसं च मोयमेहाए सुप्पुक्खलगं च खारगालणं च ॥ १२ ॥
 चन्दालगं च करगं च वच्चघरं च आउसो खणाहि ।
 सरपाययं च जायाए गोरहगं च सामणेराए ॥ १३ ॥
 वाडिगं च सडिण्डिमयं च चेलगोलं कुमारभूयाए ।
 वासं समाभिआवण्णं आवसहं च जाण भत्तं च ॥ १४ ॥
 आसन्दियं च नवसुत्तं पाउह्लाइं संकमट्टाए ।
 अदु पुत्तदोहलट्टाए आणप्पा हवन्ति दासा वा ॥ १५ ॥
 जाए फले समुप्पन्ने गेण्हसु वा णं अहवा जहाहि ।
 अह पुत्तपोसिणो एगे भारवहा हवन्ति उट्टा वा ॥ १६ ॥
 राओ वि उट्ठिया सन्ता दारगं च संठवन्ति धाई वा ।
 सुहिरामणा वि ते सन्ता वत्थधोवा हवन्ति हंसा वा ॥ १७ ॥

एवं बहुहिं कयपुव्वं भोगत्थाए जेऽभियावन्ना ।
 दासे मिए व पेसे वा पसुभूए व से न वा केई ॥ १८ ॥
 एवं खु तासु विन्नप्यं संथवं संवासं च वज्जेजा ।
 तज्जातिया इमे कामा वज्जकरा य एवमक्खाए ॥ १९ ॥
 एयं भयं न सेयाए इइ से अप्पगं निरुम्भित्ता ।
 नो इत्थं नो पसुं भिक्खु नो सयं पाणिणा निलिज्जेजा ॥ २० ॥
 सुविसुद्धेलेसे मेहावी परकिरियं च वज्जए नाणी ।
 मणसा वयसा काएणं सव्वफाससहे अणगारे ॥ २१ ॥
 इच्चेवमाहु से वीरे धुरए धुयमोहे से भिक्खु ।
 तम्हा अज्झत्तविसुद्धे सुविमुक्के आ मोक्खाए परिव्वएज्जासि ॥ २२ ॥
 त्ति वेमि ॥

इत्थिपरिन्नज्झयणं चउत्थं

निरयविभत्तियज्झयणे पञ्चमे

1. 5. 1.

पुच्छिस्सहं केवलियं महेसिं कहं भितावा नरगा पुरत्था ।
 अजाणओ मे मुणि बूहि जाणं कहिं नु बाला नरगं उवेन्ति ॥ १ ॥
 एवं मए पुट्ट महाणुभावे इणमोऽव्ववी कासवे आसुपन्ने ।
 पवेयइस्सं दुहमट्टदुग्गं आइणियं दुक्काडिणं पुरत्था ॥ २ ॥
 जे केइ बाला इह जीवियट्ठी पावाइँ कम्माइँ करेन्ति रुदा ।
 ते धोररूवे तमिसन्धयारे तिव्वाभितावे नरगे पडन्ति ॥ ३ ॥
 तिव्वं तसे पाणिणों थावरे य जे हिंसई आयसुहं पडुच्चा ।
 जे लूसए होइ अदत्तहारी न सिक्खई सेयवियस्स किंचि ॥ ४ ॥

पागम्भि वाणे बहुणं तिवाइ अनिच्चुए धायमुवेइ बाले ।
 निहो निसं गच्छइ अन्तकाले अहोसिरं कट्टु उवेइ दुग्गं ॥ ५ ॥
 हण छिन्दह भिन्दह णं दहेति सदे सुणेन्ता परधम्मियाणं ।
 ते नारगाओ भयभिन्नसन्ना कंखन्ति कं नाम दिसं वयामो ॥ ६ ॥
 इङ्गालरासिं जलियं सजेइं तत्तोवमं भूमिमणुकमन्ता ।
 ते डज्झमाणा कलुणं थणन्ति अरहस्सरा तत्थ चिरट्ठिइया ॥ ७ ॥
 जइ ते सुया वेयरणी भिदुग्गा निसिओ जहा खुर इव तिकखसोया ।
 तरन्ति ते वेयरणिं भिदुग्गं उमुचोइया सत्तिसु हम्ममाणा ॥ ८ ॥
 कीलेहि विज्झन्ति असाहुकम्मा नावं उवेन्ते सइविप्पहूणा ।
 अन्ने उ खलाहि तिस्रलियाहिं दीहाहि विदूण अहे करेन्ति ॥ ९ ॥
 केसिं च बन्धित्तु गले सिलाओ उदगंसि बोलेन्ति महालयंसि ।
 कलंवुयावालुयमुम्भुरे य लोलन्ति पच्चन्ति य तत्थ अन्ने ॥ १० ॥
 आखरियं नाम महाभितावं अन्धंतमं दुप्पतरं महन्तं ।
 उट्ठं अहे थं तिरियं दिसासु समाहिओ जत्थगणी झियाइ ॥ ११ ॥
 जंसी गुहाए जलणेऽतिउट्ठे अविजाणओ डज्झइ लुत्तपन्नो ।
 सया य कलुणं पुण धम्मठाणं गाढोवणीयं अइदुक्खधम्मं ॥ १२ ॥
 चत्तारि अगणीओ समारभेत्ता जहिं कूरकम्मा भितवेन्ति बालं ।
 ते तत्थ चिट्ठन्तमितप्पमाणा मच्छा व जीवन्तो व जोइपत्ता ॥ १३ ॥
 संतच्छणं नाम महाभितावं ते नारगा जत्थ असाहुकम्मा ।
 हत्थेहि पाएहि य बन्धित्तुणं कलुणं व तच्छन्ति कुहाडहत्था १४
 रुहरे पुणो वच्चसमुत्तिसयंगे भिन्नत्तमंगे परिवत्तयन्ता ।
 पयन्ति णं नेरइए फुरन्ते सजीवमच्छे व अयोक्वह्णे ॥ १५ ॥
 नो चेव ते तत्थ मसीभवन्ति न मज्जई तिच्चभिवेयणाए ।
 तमाणुभागं अणुवेययन्ता दुक्खन्ति दुक्खी इह दुक्कडेणं ॥ १६ ॥

तहिं च ते लोलणसंपगाढे गाढं सुतत्तं अगाणिं वयन्ति ।
 न तत्थ सायं लहई भिदुग्गे अरहियाभितावा तह वी तवेन्ति ॥१७॥
 से सुच्चई नगरवहे व्व सदे दुहोवणीयाणि पयाणि तत्थ ।
 उदिण्णकम्माण उदिण्णकम्मा पुणो पुणो ते सरहं दुहेन्ति ॥१८॥
 पाणेहि णं पाव वियोजयन्ति तं भे पवक्खामि जहातहेणं ।
 दण्डेहि तत्था सरयान्ति बाला सव्वेहि दण्डेहि पुराकएहिं ॥१९॥
 ते हम्ममाणा नरगे पडन्ति पुण्णे दुरूवस्स महाभितावे ।
 ते तत्थ चिट्ठन्ति दुरूवभक्खी तुट्ठन्ति कम्मोवगया किमीहिं ॥२०॥
 सया कसिणं पुण धम्मठाणं गाढोवणीयं अइदुक्खधम्मं ।
 अन्दसु पक्खिप्प विहत्तु देहं वेहेण सीसं सेंऽभितावयन्ति ॥२१॥
 छिन्दन्ति बालस्स खुरेण नक्कं ओट्टे वि छिन्दन्ति दुवे वि कण्णे ।
 जिब्भं विणिक्कस्स विहत्थिमेत्तं तिक्खाहि सल्लाहि भितावयन्ति ॥२२॥
 • ते तिप्पमाणा तलसंपुडं व राइंदियं तत्थ थणन्ति बाला ।
 गलन्ति ते सोणियपूयमंसं पजोइया खारपइद्वियंगा ॥ २३ ॥
 जइ ते सुया लोहियपूयपाई बालागणी तेअगुणा परेणं ।
 कुम्भी महन्ताहियपोरुसीया समूसिया लोहियपूयपुण्णा ॥२४॥
 पक्खिप्प तासुं पययन्ति बाले अट्टस्सरे ते कलुणं रसन्ते ।
 तण्हाइया ते तउतम्बतत्तं पज्जिज्जमाणइयरं रसन्ति ॥ २५ ॥
 अप्पेण अप्पं इह वञ्चइत्ता भवाहमे पुव्वसए सहस्से ।
 चिट्ठन्ति तत्था बहुक्कूरकम्मा जहा कडं कम्म तहासि भारे ॥२६॥
 समज्जिणित्ता कलुसं अणज्जा इट्ठेहि कन्तेहि य विप्पहूणा ।
 ते दुब्बिगन्धे कसिणे य फासे कम्मोवगा कुणिमे आवसन्ति
 ॥ २७ ॥ ति वेमि ॥

निरयविभत्तियज्झयणे पढमुद्देसे

1. 5. 2.

अहावरं सासयदुक्खधम्मं तं भे पवक्खामि जहातहेणं ।
 बाला जहा दुक्कडकम्मकारी वेयन्तिं कम्माई पुरेकडाई ॥ १ ॥
 हत्थेहि पाएहि य बन्धिऊणं उयरं विकत्तन्ति खुरासिएहिं ।
 गिण्हित्तु बालस्स विहत्तु देहं वद्धं थिरं पिट्ठउ उद्धरान्ति ॥ २ ॥
 बाहू पक्कत्तन्ति य मूलओ से थूलं वियासं मुहे आडहन्ति ।
 रहंसि जुत्तं सरयन्ति बालं आरुस्स विज्झन्ति तुदेण पिट्ठे ॥ ३ ॥
 अयं व तत्तं जलियं सजोइ तउवमं भूमिमणुकमन्ता ।
 ते डज्झमाणा कलुणं थणान्ति उसुचोइया तत्तजुगेसु जुत्ता ॥ ४ ॥
 बाला बला भूमिमणुकमन्ता पविज्जलं लोहपहं च तत्तं ।
 जंसी भिदुग्गंसि पवज्जमाणा पेसे व दण्डेहि पुरा करेन्ति ॥ ५ ॥
 ते संपगाढंसि पवज्जमाणा सिलाहि हम्मन्ति निपातिणीहिं ।
 संतावणी नाम चिरट्ठिइया संतप्पई जत्थ असाहुकम्मा ॥ ६ ॥
 कन्दूसु पक्खिप्प पयन्ति बालं तओ वि दट्ठा पुण उप्पयन्ति ।
 ते उट्ठकाएहि पक्खज्जमाणा अवरेहि खज्जन्ति सणप्फएहिं ॥ ७ ॥
 समूसियं नाम विधूमठाणं जं सोयतत्ता कलुणं थणन्ति ।
 अहोसिरं कट्ठु विगत्तिऊणं अयं व सत्थेहि समोसवेन्ति ॥ ८ ॥
 समूसिया तत्थ विसूणियंगा पक्खीहि खज्जन्ति अयोमुहेहिं ।
 संजीवणी नाम चिरट्ठिइया जंसी पया हम्मइ पावचेया ॥ ९ ॥
 तिक्खाहि सूलाहि निवाययन्ति वसोगयं सावययं व लद्धं ।
 ते सूलविद्धा कलुणं थणान्ति एगन्तदुक्खं दुहओ गिलाणा ॥ १० ॥
 सया जलं नाप निहं महन्तं जंसी जलन्तो अगणी अकट्ठो ।
 चिट्ठन्ति वट्ठा बहुकूरकम्मा अरहस्सरा केइ चिरट्ठिइया ॥ ११ ॥

चिया महन्तीउ समारमिच्चा लुब्भन्ति ते त कलुणं रसन्तं ।
 आवट्ठई तत्थ असाहुकम्मा सप्पी जहा पडियं जोइमज्जे ॥१२॥
 सया कसिणं पुण घम्मठाणं गाढोवणीयं अइदुक्खधम्मं ।
 हत्थेहि पाएहि य बन्धिऊणं सत्तु व्व दण्डेहि समारमन्ति ॥१३॥
 भज्जन्ति बालस्स वहेण पुट्ठी सीसं पि भिन्दन्ति अयोधणेहिं ।
 ते भिन्नदेहा फलणं व तच्छ तत्ताहि आराहि नियोजयन्ति ॥१४॥
 अभिजुंजिया रुद्ध असाहुकम्मा उसुचोइया हत्थिवहं वहन्ति ।
 एगं दुरुहित्तु दुवे तओ वा आरुस्स विज्जन्ति ककाणओ से ॥१५॥
 बाला बला भूमिमणुकमन्ता पविज्जलं कण्ठइलं महन्तं ।
 विवद्धतप्पेहि विवण्णाचित्ते समीरिया कोट्टुवालं करेन्ति ॥१६॥
 वेयालिए नाम महाभितावे एगायए पव्वयमन्तलिक्खे ।
 हम्मन्ति तत्था बहुक्कुरकम्मा परं सहस्साण मुहुत्तगाणं ॥१७॥
 संवाहिया दुक्कडिणो थणन्ति अहो य राओ परितप्पमाणा ।
 एगन्तकूडे नरगे महन्ते कूडेण तत्था विसमे हया उ ॥ १८ ॥
 भज्जन्ति णं पुव्वमरी सरोसं समुग्गरे ते मुसले गहेउं ।
 ते भिन्नदेहा रुहिरं वमन्ता ओयुद्धगा धरणितले पडन्ति ॥१९॥
 अणासिया नाम महासियाला पागब्भिणो तत्थ सयावकोवा ।
 खज्जन्ति तत्था बहुक्कुरकम्मा अदूरगा संखलियाहि बद्धा ॥२०॥
 सयाजला नाम नई भिदुग्गा पविज्जलं लोहविलीणतत्ता ।
 जंसी भिदुग्गंसि पवज्जमाणा एगायताणुकमणं करेन्ति ॥ २१ ॥
 एयाइँ फासाइँ फुसन्ति बालं निरन्तरं तत्थ चिरट्ठिईयं ।
 न हम्ममाणस्स उ होइ ताणं एगो सयं पच्चणुहोइ दुक्खं ॥२२॥
 जं जारिसं पुव्वमकासि कम्मं तमेव आगच्छइ संपराए ।
 एगन्तदुक्खं भवमज्जणित्ता वेयन्ति दुक्खी तमणन्तदुक्खं ॥२३॥

एयाणि सोच्चा नरगाणि धीरे न हिंसए किंचण सव्वलोए ।
 एगन्तदिट्ठी अपरिग्गहे उ बुज्झिज्ज लोगस्स वसं न गच्छे ॥२४॥
 एवं तिरिक्खे मणुयामेसुं चउरन्तणन्तं तयणुव्विवार्गं ।
 स सव्वमेयं इइ वेयइत्ता कंखेज्ज कालं धुयमायरेज्ज ॥ २५॥
 त्ति वेमि ॥

निरयविभत्तियज्झयणं पञ्चमं

सिरिवीरत्थुइयज्झयणे छंदे

1. 6.

पुच्छिस्सु णं सम्मणा माहणा य अगारिणो या परतित्थिया य ।
 से केइ नेगन्तहिंयं धम्ममाहु अणेत्थिंसाहुसमिक्खयाए ॥ १ ॥
 कहं च नाणं कहं दंसणं से सीलं कहं नायसुयस्स आसि ।
 जाणासि णं भिक्खु जहातहेणं अहासुयं बूहि जहा निसन्तं ॥२॥
 खेयन्नए से कुसलासुपन्ने अणन्तनाणी य अणन्तदंसी ।
 जसंसिणो चक्खुपहे ठियस्स जाणाहि धम्मं च धिइं च पेहि ॥३॥
 उट्ठं अहे यं तिरिथं दिसासु तस्सा य जे थावर जे य पाणा ।
 मे निच्चनिच्चेहि समिक्ख पन्ने दीवे व धम्मं समियं उदाहु ॥४॥
 से सव्वदंसी अभिभूयनाणी निरामगन्धे धिइं ठियप्पा ।
 अणुत्तरे सव्वजगंसि विजं गन्था अईए अभए अणाऊ ॥५॥
 से भूइपन्ने अणिएअचारी ओहंतरे धीरे अणन्तचक्खू ।
 अणुत्तरं तप्पइ सूरिए वा वइरोयणिन्दे व तमं पगासे ॥ ६ ॥
 अणुत्तरं धम्ममिणं जिणाणं नेया मुणी कासव आसुपन्ने ।
 इन्दे व देवाण महाणुभावे सहस्सणेया दिवि णं विसिद्धे ॥ ७ ॥

से पन्नया अक्खयसागरे वा मदोदही वा वि अणन्तपारे ।
 अणाविले वा अक्साइ मुक्के सक्के व देवाहिबई जुईमं ॥ ८ ॥
 से वीरिएणं पडिपुण्णवीरिए सुदंसणे वा नगसच्चसेट्ठे ।
 सुरालए वा सि मुदागरे से विरायए नेगगुणोववेए ॥ ९ ॥
 सयं सहस्साण उ जोयणाणं तिकण्डगे पण्डगवेजयन्ते ।
 से जोयणे नवनवते सहस्से उद्धुस्सियो हेट्ठ सहस्समेगं ॥ १० ॥
 पुट्ठे नभे चिट्ठइ भूमिवट्ठिए जं सूरिया अणुपरिवट्ठयन्ति ।
 से हेमवण्णे बहुनन्दणे य जंसी रइं वेययई महिन्दा ॥ ११ ॥
 से पव्वए सहमहप्पगासे विरायई कञ्चणमट्ठवण्णे ।
 अणुत्तरे गिरिसु य पव्वदुग्गे गिरीवरे से जलिए व भोमे ॥ १२ ॥
 महीइ मज्झम्मि ठिए नगिन्दे पन्नायए सूरियसुद्धलेसे ।
 एवं सिरीए उ स भूरिवण्णे मणोरमे जोयइ अचिमाली ॥ १३ ॥
 सुदंसणस्सेव जसो गिरिस्स पवुच्चई महओ पव्वयस्स ।
 एओवमे समणे नायपुत्ते जाईजसोदंसणनाणसीले ॥ १४ ॥
 गिरीवरे वा निसहाययाणं रुयए व सेट्ठे वलयाययाणं ।
 तओवमे से जगभूइपन्ने मुणीण मज्झे तमुदाहु पन्ने ॥ १५ ॥
 अणुत्तरं धम्ममुदीरइत्ता अणुत्तरं ज्ञाणवरं झियाइ ।
 सुसुक्कसुकं अपगण्डसुकं संखिन्दुएगन्तवदायसुकं ॥ १६ ॥
 अणुत्तरगं परमं महेसी असेसकम्मं स विसोहइत्ता ।
 सिद्धिं गए साइमणन्तपत्ते नाणेण सीलेण य दंसणेण ॥ १७ ॥
 रुक्खेसु नाए जह सामली वा जस्सिं रइं वेययई सुवण्णा ।
 वणेसु वा नन्दणमाहु सेट्ठं नाणेण सीलेण य भूइपन्ने ॥ १८ ॥
 थणियं व सहाण अणुत्तरे उ चन्दो व ताराण महाणुभावे ।
 गन्धेसु वा चन्दणमाहु सेट्ठं एवं मुणीणं अपडिन्नमाहु ॥ १९ ॥

जहा सयंभू उदहीण सेट्ठे नागेसु वा धराणिन्दमाहु सेट्ठं ।
 खोओदए वा रस वेजयन्ते तवोवहाणे मुणि वेजयन्ते ॥ २० ॥
 हत्थीसु एरावणमाहु नाए सीहो मिगाणं सलिलाण गङ्गा ।
 पक्खीसु वा गरुळे वेणुदेवो निव्वाणवादीणिह नायपुत्ते ॥ २१ ॥
 जोहेसु नाए जह वीससेणे पुण्फेसु वा जह अरविन्दमाहु ।
 खत्तीण सेट्ठे जह दन्तवक्के इसीण सेट्ठे तह वद्धमाणे ॥ २२ ॥
 दाणाण सेट्ठं अभयप्पयाणं सच्चेसु वा अणवज्जं वयन्ति ।
 तवैसु वा उत्तमं बम्भेचरं लोगुत्तमे समणे नायपुत्ते ॥ २३ ॥
 ठिईण सेट्ठा लवसत्तमा वा सभा सुहम्मा व सभाण सेट्ठा ।
 निव्वाणसेट्ठा जह सव्वधम्मा न नायपुत्ता परमत्थि नाणी ॥ २४ ॥
 पुढोवमे धुणइ विगयगेही न संनिहिं कुव्वइ आसुपन्ने ।
 तरिउं समुदं व महाभवोघं अभयंकरे वीरं अणन्तचक्खू ॥ २५ ॥
 कोहं च माणं च तहेव मायं लोभं चउत्थं अज्झत्तदोसा ।
 एयाणि वन्ता अरहा महेसी न कुव्वई पाव न कारवेइ ॥ २६ ॥
 किरियाकिरियं वेणइयाणुवायं अन्नाणियाणं पडियच्च ठाणं ।
 से सव्ववायं इइ वेयइत्ता उवट्ठिए संजमदीहरायं ॥ २७ ॥
 से वारिया इत्थि सराइभत्तं उवहाणवं दुक्खखयट्ठयाए ।
 लोगं विदित्ता आरं परं च सव्वं पभू वारिय सव्ववारं ॥ २८ ॥
 सोच्चा य धम्मं अरहन्तभासियं समाहियं अट्ठपदोवसुद्धं ।
 तं सदहाणा य जणा अणाऊ इन्दा व देवाहिव आगमिस्सन्ति
 ॥ २९ ॥ त्ति वेमि ॥

कुसीलपरिभासियज्झयणे सत्तमे

1. 7.

पुढवी य आऊ अगणी य वाऊ तण रुक्ख बीया य तसा य पाणा ।
 जे अण्डया जे य जराउ पाणा संसेयया जे रसयाभिहाणा ॥ १ ॥
 एयाइँ कायाइँ पवेइयाइँ एएसु जाणे पडिलेह सायं ।
 एएण काएण य आयदण्डे एएसु या विप्परियासुवेन्ति ॥ २ ॥
 जाईपहं अणुपरिवट्टमाणे तसथावरेहिं विणिघायमेइ ।
 से जाइ जाइं बहुकूरकम्मे जं कुव्वई भिज्जइ तेण वाले ॥ ३ ॥
 अस्सि च लोए अदु वा परत्था सयग्गसो वा तह अन्नहा वा ।
 संसारमावन्न परं परं ते बन्धन्ति वेयन्ति य दुब्बियाणि ॥ ४ ॥
 जे मायरं वा पियरं च हिच्चा समणव्वए अगणिं समारभिज्जा ।
 अहाहु से लोए कुसीलधम्मे भूयाइँ जे हिंसइ आयसाए ॥ ५ ॥
 उज्जालओ पाण निवायएज्जा निव्वावओ अगणिं निवायवेज्जा ।
 तम्हा उ मेहावि समिक्ख धम्मं न पण्डिए अगणिं समारभिज्जा ॥ ६ ॥
 पुढवी वि जीवा आऊ वि जीवा पाणा य संपाइम संपयन्ति ।
 संसेयया कट्टसमास्सिया य एए देहे अगणिं समारभन्ते ॥ ७ ॥
 हरियाणि भूयाणि विलम्बगाणि आहार देहा य पुढो सियाइ ।
 जे छिन्दई आयसुहं पडुच्च पागब्भि पाणे बहुणं तिवाई ॥ ८ ॥
 जाइं च बुद्धिं च विणासयन्ते बीयाइ अस्संजय आयदण्डे ।
 अहाहु से लोए अणज्जधम्मे बीयाइ से हिंसइ आयसाए ॥ ९ ॥
 गम्भाइ भिज्जन्ति बुयाबुयाणा नरा परे पञ्चसिहा कुमारा ।
 जुवाणगा मज्झिम थेरगा य चयन्ति ते आउखए पलीणा ॥ १० ॥

संवुज्झहा जन्तवो साणुसत्तं दट्ठं भयं बालिसेणं अलम्भो ।
 एगन्तदुक्खे जरिए व लोए सकम्मुणा विप्परियासुवेइ ॥ ११ ॥
 इहेग मूढा पवयन्ति मोक्खं आहारसंपज्जनवज्जणेणं ।
 एगे य सीओदगसेवणेणं हुएण एगे पवयन्ति मोक्खं ॥ १२ ॥
 पाओसिणाणाइसु नत्थि मोक्खो खारस्स लोणस्स अणासणेणं ।
 ते मज्झमंसं लसुणं च भोच्चा अन्नत्थ वासं परिकप्पयान्ति ॥ १३ ॥
 उदगेण जे सिद्धिमुदाहरन्ति सायं च पायं उदगं फुसन्ता ।
 उदगस्स फासेण सिया य सिद्धी सिज्झिसु पागा बहवे दगंसि ॥ १४ ॥
 मच्छा य कुम्मा य सिरीसिवा य मग्गू य उट्ठा दगरक्खसा य ।
 अट्ठाणमेयं कुसला वयन्ति उदगेण जे सिद्धिमुदाहरन्ति ॥ १५ ॥
 उदगं जई कम्ममलं हरेज्जा एवं सुहं इच्छामित्तमेव ।
 अन्धं व नेयारमणुस्सरित्ता पाणाणि चेवं विणिहन्ति मन्दा ॥ १६ ॥
 पावाइँ कम्माइँ पकुव्वओ हि सिओदगं ऊ जइ तं हरेज्जा ।
 सिज्झिसु एगे दगसत्तधाई मुसं वयन्ते जलसिद्धिमाहु ॥ १७ ॥
 हुएण जे सिद्धिमुदाहरन्ति सायं च पायं अगणिं फुसन्ता ।
 एवं सिया सिद्धि हवेज्ज तम्हा अगणिं फुसन्ताण कुकम्मिणं पि ॥ १८ ॥
 अपारिक्ख दिट्ठं न हु एव सिद्धी एहन्ति ते वायमवुज्झमाणा ।
 भूएहि जाणं पडिलेह सायं विज्जं गहायं तसथावरेहिं ॥ १९ ॥
 थणन्ति लुप्पन्ति तसन्ति कम्मी पुढो जगा परिसंखाय भिक्खू ।
 तम्हा विऊ विरओ आयगुत्ते दट्ठं तसे या पडिसंहरेज्जा ॥ २० ॥
 जे धम्मलद्धं विणिहाय भुज्जे वियडेण साहडु य जे सिणाई ।
 जे धोवई लूसयई व वत्थं अहाहु ते नागणियस्स दूरे ॥ २१ ॥
 कम्मं परिन्नाय दगंसि धीरे वियडेण जीवेज्ज य आदिमोक्खं ।
 से वीयकन्दाइ अशुज्जमाणे विरए सिणाणाइसु इत्थियासु ॥ २२ ॥

जे मायरं च पियरं च हिच्चा गारं तहा पुत्तपसुं धणं च ।
 कुलाइँ जे धावइ साउगाई अहाहु से सामणियस्स दूरे ॥ २३ ॥
 कुलाइँ जे धावइ साउगाई आघाइ धम्मं उयराणुगिद्धे ।
 अहाहु से आयरियाण सयंसे जे लावएज्जा असणस्स हेऊ ॥ २४ ॥
 निक्खम्म दीणे परभोयणम्मि मुहमङ्गलीए उयराणुगिद्धे ।
 नीवारगिद्धे व महावराहे अदूरए एहिइ घायमेव ॥ २५ ॥
 अन्नस्स पाणस्सिहलोइयस्स अणुप्पियं भासइ सेवमाणे ।
 पासत्थयं चेव कुसीलयं च निस्सारए होइ जहा पुलाए ॥ २६ ॥
 अन्नायपिण्डेण हियासएज्जा नो पूयणं तवसा आवहेज्जा ।
 सदेहि रूवेहि असज्जमाणं सव्वेहि कामेहि विणीय गेहिं ॥ २७ ॥
 सव्वाइँ संगाइँ अइच्च धीरे सव्वाइँ दुक्खाइँ तितिक्खमाणे ।
 अखिले अगिद्धे अणिएयचारी अभयंकरे भिक्खु अणाविलप्पा ॥ २८ ॥
 भारस्स जाआ मुणि भुज्जएज्जा कंखेज्ज पावस्स विवेग भिक्खू ।
 दुक्खेण पुट्ठे धुयमाइएज्जा संगामसीसे व परं दमेज्जा ॥ २९ ॥
 अवि हम्ममाणे फलगावतट्ठी समागमं कंखइ अन्तगस्स ।
 निधूय कम्मं न पवञ्चुवेइ अक्खक्खए वा सगडं ति वेमि ॥ ३० ॥

कुसीलपरिभासियज्जयणं सत्तमं ।

वीरियज्झयणे अट्ठमे

1. 8.

दुहा वेयं सुयक्खायं वीरियं ति पवुच्चई ।
 किं नु वीरस्स वीरत्तं कहं चेयं पवुच्चई ॥ १ ॥
 कम्ममेगे पवेदेन्ति अकम्मं वा वि सुच्चया ।
 एएहिं दोहि ठाणेहिं जेहिं दीसन्ति मच्चिया ॥ २ ॥
 पमायं कम्ममाहंसु अप्पमायं तहावरं ।
 तब्भावादेसओ वा वि बालं पण्डियमेव वा ॥ ३ ॥
 सत्थमेगे तु सिक्खन्ता अइवायाय पाणिणं ।
 एगे मन्ते अहिज्जन्ति पाणभूयविहेडिणो ॥ ४ ॥
 मायिणो कट्टु माया य कामभोगे समारभे ।
 हन्ता छेत्ता पगाब्भित्ता आयसायाणुगामिणो ॥ ५ ॥
 मणसा वयसा चेव कायसा चेव अन्तसो ।
 आरओ परओ वा वि दुहा वि य असंजया ॥ ६ ॥
 वेराइं कुव्वई वेरी तओ वेरोहि रज्जई ।
 पावोवगा य आरम्भा दुक्खफासा य अन्तसो ॥ ७ ॥
 संपरायं नियच्छन्ति अत्तदुक्कडकारिणो ।
 रागदोसस्सिया बाला पावं कुव्वन्ति ते बहुं ॥ ८ ॥
 एवं सकम्मविरियं बालाणं तु पवेइयं ।
 इत्तो अकम्मविरियं पण्डियाणं सुणेह मे ॥ ९ ॥
 दविए बन्धणुम्मुक्के सव्वओ छिन्नबन्धणे ।
 पणोल्ल पावगं कम्मं सल्लं कन्तइ अन्तसो ॥ १० ॥
 नेयाउयं सुयक्खायं उवायाय समीहए ।
 भुज्जो भुज्जो दुहावासं असुहत्तं तहा तहा ॥ ११ ॥

ठाणी विविहठाणाणि चइस्सन्ति न संसओ ।
 अणियए अयं वासे नायएहि सुहीहि य ॥ १२ ॥
 एवमायाय मेहावी अप्पणो गिद्धिमुद्धरे ।
 आरियं उवसंपजे सव्वधम्ममकोवियं ॥ १३ ॥
 सहसंमइए नच्चा धम्मसारं सुणेत्तु वा ।
 समुवाट्टिए उ अणगारे पक्कखायपावए ॥ १४ ॥
 जं किंचुवक्कमं जाणे आउक्खेमस्स अप्पणो ।
 तस्सेव अन्तरा खिप्पं सिक्खं सिक्खेज्ज पण्डिए ॥ १५ ॥
 जहा कुम्मे सअङ्गाइं सए देहे समाहरे ।
 एवं पावाइं मेहावी अज्झप्पेण समाहरे ॥ १६ ॥
 साहरे हत्थपाए य मणं पञ्चिन्दियाणि य ।
 पावगं च परीणामं भासादोसं च तारिसं ॥ १७ ॥
 अणु माणं च मायं च तं परिन्नाय पण्डिए ।
 सायागारवणिहुए उवसन्ते निहे चरे ॥ १८ ॥
 पाणे य नाइवाएज्जा अदिन्नं पि य नायए ।
 साइयं न मुसं बूया एस धम्मे वुसीमओ ॥ १९ ॥
 अइक्कम्मन्ति वायाए मणसा वि न पत्थए ।
 सव्वओ संवुडे दन्ते आयाणं सुसमाहरे ॥ २० ॥
 कडं च कज्जमाणं च आगमिस्सं च पावगं ।
 सव्वं तं नाणुजाणन्ति आयगुत्ता जिइन्दिया ॥ २१ ॥
 जे याबुद्धा महाभागा वीरा असमत्तदंसिणो ।
 असुद्धं तेसिं परक्कन्तं सफलं होइ सव्वसो ॥ २२ ॥
 जे य बुद्धा महाभागा वीरा सम्मत्तदंसिणो ।
 सुद्धं तेसिं परक्कन्तं अफलं होइ सव्वसो ॥ २३ ॥

तेसिं पि न तवो सुद्धो निक्खन्ता जे महाकुला ।
 जं नेवन्ने वियाणन्ति न सिलोगं पवेज्जए ॥ २४ ॥
 अप्पापिण्डासि पाणासि अप्पं भासेज्ज सुव्वए ।
 खन्ते भिनिव्वुडे दन्ते वीयगिद्धी सया जए ॥ २५ ॥
 ज्ञाणजोगं समाहट्ठु कायं विउसेज्ज सव्वसो ।
 तितिक्खं परमं नच्चा आमोक्खाए परिव्वएज्जासि ॥ २६ ॥
 त्ति वेमि ॥

वीरियज्झयणं अट्ठमं

धम्मज्झयणे नवमे

1. 9.

कयरे धम्म अक्खाए माहणेण मईमया ।
 अञ्जु धम्मं जहातच्चं जिणाणं तं सुणेह मे ॥ १ ॥
 माहणा खत्तिया वेस्सा चण्डाला अदु बोक्कसा ।
 एसिया वेसिया सुद्धा जे य आरम्भनिस्सिया ॥ २ ॥
 परिग्गहनिविट्ठाणं पावं तेसिं पवट्ठई ।
 आरम्भसंभिया कामा न ते दुक्खविमोयगा ॥ ३ ॥
 आघायकिच्चमाहेउं नाइओ विसएसिणो ।
 अन्ने हरन्ति तं वित्तं कम्मी कम्मेहि किच्चई ॥ ४ ॥
 माया पिया ण्हुसा भाया भज्जा पुत्ता य ओरसा ।
 नालं ते तव ताणाय लुप्पन्तस्स सकम्मुणा ॥ ५ ॥
 एयमट्ठं सपेहाए परमट्ठाणुगामियं ।
 निम्ममो निरहंकारो चरे भिक्खू जिणाहियं ॥ ६ ॥

चिच्चा वित्तं च पुत्ते य नाइओ य परिग्गहं ।

चिच्चा णं अन्तगं सोयं निरवेक्खो परिव्वए ॥ ७ ॥

पुढवी अगणी वाऊ तणरुक्ख सवीयगा ।

अण्डया पोयजराऊ रससंसेयउब्भिया ॥ ८ ॥

एएहिं छहिं काएहिं तं विज्जं परिजाणिया ।

मणसा कायवक्केणं नारम्भी न परिग्गही ॥ ९ ॥

मुसावायं बहिद्वं च उग्गहं च अजाइया ।

सत्थादाणाइ लोगंसि तं विज्जं परिजाणिया ॥ १० ॥

पलिउञ्चणं च भयणं च थण्डिल्लुस्सयणाणि य ।

धूणादाणाइ लोगंसि तं विज्जं परिजाणिया ॥ ११ ॥

धोयणं रयणं चेव बत्थीकम्मं विरेयणं ।

वमणञ्जणपलीमंथं तं विज्जं परिजाणिया ॥ १२ ॥

गन्धमल्लसिणाणं च दन्तपक्खालणं तहा ।

परिग्गहित्थिकम्मं च तं विज्जं परिजाणिया ॥ १३ ॥

उहेसियं कीयगडं पामिच्चं चेव आहडं ।

पूयं अणेसणिज्जं च तं विज्जं परिजाणिया ॥ १४ ॥

आसूणिमक्खिरागं च गिद्धुवघायकम्मगं ।

उच्छोलणं च कक्कं च तं विज्जं परिजाणिया ॥ १५ ॥

संपसारी कयकिरिए पसिणाययणाणि य ।

सागारियं च पिण्डं च तं विज्जं परिजाणिया ॥ १६ ॥

अट्ठावयं न सिक्खिज्जा वेहाइयं च नो वए ।

हत्थकम्मं विवायं च तं विज्जं परिजाणिया ॥ १७ ॥

पाणहाओ य छत्तं च नालीयं वालवीयणं ।

परकिरियं अन्नमन्नं च तं विज्जं परिजाणिया ॥ १८ ॥

उच्चारं पासवणं हरिणसु न करे मुणी ।
 वियडेण वा वि साहट्ठु नावमजे कयाइ वि ॥ १९ ॥
 परमत्ते अन्नपाणं न भुज्जेज्ज कयाइ वि ।
 परवत्थं अचेलो वि तं विज्जं परिजाणिया ॥ २० ॥
 आसन्दी पलियङ्के य निसिज्जं च गिहन्तरे ।
 संपुच्छणं सरणं वा तं विज्जं परिजाणिया ॥ २१ ॥
 जसं किंतिं सिलोगं च जा य वन्दणपूयणा ।
 सव्वलोयंसि जे कामा तं विज्जं परिजाणिया ॥ २२ ॥
 जेणेहं निव्वहे भिक्खू अन्नपाणं तहाविहं ।
 अणुप्पयाणमन्नेसिं तं विज्जं परिजाणिया ॥ २३ ॥
 एवं उदाहु निग्गन्थे महावीरे महामुणी ।
 अणन्तनाणदंसी से धम्मं देसितवं सुयं ॥ २४ ॥
 भासमाणो न भासेज्जा नेव वम्भेज्ज मम्मयं ।
 माइट्ठाणं विवजेज्जा अणुचिन्तिय वियागरे ॥ २५ ॥
 तत्थिमा तइया भासा जं वइत्ताणुतप्पई ।
 जं छन्नं तं न वत्तव्वं एसा आणा नियण्ठिया ॥ २६ ॥
 होलावायं सहीवायं गोयावायं च नो वए ।
 तुमं तुमं ति अमणुन्नं सव्वसो तं न वत्तए ॥ २७ ॥
 अकुसीले सया भिक्खू नेव संसग्गियं भए ।
 सुहरुवा तत्थुवस्सग्गा पडिबुज्जेज्ज ते विऊ ॥ २८ ॥
 नन्नत्थ अन्तराणं परगेहे न निसीयए ।
 गामकुमारियं किड्डं नाइवेलं हसे मुणी ॥ २९ ॥
 अणुस्सुओ उरालेसु जयमाणो परिव्वए ।
 चरियाए अप्पमत्तो पुटो तत्थ हियात्सए ॥ ३० ॥

हम्ममाणो न कुप्पेज्ज वुच्चमाणो न संजले ।
 सुमणे अहियासेज्जा न य कोलाहलं करे ॥ ३१ ॥
 लद्धे कामे न पत्थेज्जा विवेगे एवमाहिए ।
 आयरियाइं सिक्खेज्जा बुद्धाणं अन्तिए सया ॥ ३२ ॥
 सुस्ससमाणो उवासेज्जा सुप्पन्नं सुतवस्सियं ।
 वीरा जे अत्तपन्नेसी धिइमन्ता जिइन्दिया ॥ ३३ ॥
 गिहे दीवमपासन्ता पुरिसादाणिया नरा ।
 ते वीरा बन्धणुम्मुक्का नावकंखन्ति जीवियं ॥ ३४ ॥
 अगिद्धे सद्दफासेसु आरम्भेसु अनिस्सिए ।
 सच्चं तं समयातीयं जमेयं लवियं बहु ॥ ३५ ॥
 अइमाणं च मायं च तं परिन्नाय पण्डिए ।
 गारवाणि य सच्चाणि निव्वाणं संधए मुणि ॥ ३६ ॥
 त्ति वेमि ॥

धम्मज्झयणं नवमं ॥

समाहियज्झयणे दसमे

1. 10.

आद्यं मईमं अणुवीइ धम्मं अज्झू समाहिं तमिमं सुणेह ।
 अपडिन्न भिक्खू उ समाहिपत्ते अणियाण भूएसु परिव्वएज्जा ॥ १ ॥
 उट्ठं अहे यं तिरियं दिसासु तसा य जे थावर जे य पाणा ।
 हत्थेहि पाएहि य संजमित्ता अदिन्नमन्नेसु य नो गहेज्जा ॥ २ ॥
 सुयक्खायधम्मो वित्तिगिच्छतिणो लाढे चरे आयतुले पयासु ।
 आयं न कुज्जा इह जीवियट्ठी चयं न कुज्जा सुतवस्सि भिक्खू ॥ ३ ॥

सव्विन्दियाभिनिव्वुडे पयासु चरे मुणी सव्वउ विप्पमुक्के ।
 पासाहि पाणे य पुढो वि सत्ते दुक्खेन अट्टे परितप्पमाणे ॥ ४ ॥
 एणसु वाले य पकुव्वमाणे आवड्डई कम्मसु पावएसु ।
 अइवायओ कीरइ पावकम्मं निउज्जमाणे उ करेइ कम्मं ॥ ५ ॥
 आदीणविच्ची व करेइ पावं मन्ता उ एगन्तसमाहिमाहु ।
 वुद्धे समाहीय रए विवेगे पाणाइवाया विरए ठियप्पा ॥ ६ ॥
 सव्वं जगं तू समयगुपेही पियमप्पियं कस्स वि नो करेज्जा ।
 उट्ठाय दीणो य पुणो विसण्णो संपूयणं चेव सिलोयकामी ॥ ७ ॥
 आहाकडं चेव निकासमीणे नियामचारी न विसण्णमेस्सी ।
 इत्थीसु सत्ते य पुढो य वाले परिग्गहं चेव पकुव्वमाणे ॥ ८ ॥
 वेरागुणिद्धे निचयं करेइ इओ चुए से इहमट्ठदुग्गं ।
 तम्हा उ मेहावि सभिक्ष धम्मं चरे मुणी सव्वउ विप्पमुक्के ॥ ९ ॥
 आयं न कुज्जा इह जीवियट्ठी असज्जमाणो य परिव्वएज्जा ।
 निसम्मभासी य विणीय गिद्धिं हिंसन्नियं वा न कहं करेज्जा ॥ १० ॥
 आहाकडं वा न निकासएज्जा निकामयन्ते य न संथवेज्जा ।
 धुणे उरालं अणुवेहमाणे चिच्चा न सोयं अणवेक्खमाणो ॥ ११ ॥
 एगत्तमेयं अभिपत्थएज्जा एवं पमोक्खो न मुसं ति पासं ।
 एस प्पमोक्खो अमुसे वरे वि अकोहणे सच्चरणं तवस्सी ॥ १२ ॥
 इत्थीसु या आरय मेहुणाओ परिग्गहं चेव अकुव्वमाणे ।
 उच्चावएसुं विसएसु ताई निस्संसयं भिक्खु समाहिपत्ते ॥ १३ ॥
 अरइं रइं च अभिभूय भिक्खू तणाइफासं तह सीयफासं ।
 उण्हं च दंसं चहियासएज्जा सुब्बिं व दुब्बिं व तितिक्खएज्जा ॥ १४ ॥
 गुत्तो वईए य समाहिपत्तो लेसं समाहड्डु परिव्वएज्जा ।
 गिहं न छाए न वि छाएज्जा संमिस्सभावं पयहे पयासु ॥ १५ ॥

जे केइ लोगम्मि उ अकिरियआया अन्नेण पुढा धुयमादिसन्ति ।
 आरम्भसत्ता गढिया य लोए धम्मं न जाणन्ति विमोक्खहेउं ॥ १६ ॥
 पुढो य छन्दा इह माणवा उ किरियाकिरीयं च पुढो य वायं ।
 जायस्स बालस्स पकुव्व देहं पवड्डई वेरमसंजयस्स ॥ १७ ॥
 आउक्खयं चेव अबुज्झमाणे ममाइ से साहसकारि मन्दे ।
 अहो य राओ परितप्पमाणे अट्टेसु मूढे अजरामरे व्व ॥ १८ ॥
 जहाहि वित्तं पसवो य सव्वं जे बन्धवा जे य पिथा य मित्ता ।
 लालप्पई से वि य एइ मोहं अन्ने जणा तंसि हरन्ति वित्तं ॥ १९ ॥
 सीहं जहा खुड्डमिगा चरन्ता दूरे चरन्ति परिसंक्रमाणा ।
 एवं तु मेहावि समिक्ख धम्मं दूरेण पावं परिवज्जएज्जा ॥ २० ॥
 संबुज्झमाणे उ नरे मईमं पावाउ अप्पाण निवट्टएज्जा ।
 हिंसपप्पयाइँ दुहाइँ मत्ता वेरानुबन्धीणि महब्भयाणि ॥ २१ ॥
 मुसं न बूया मुणि अत्तगामी निव्वाणमेयं कसिणं समाहिं ।
 सयं न कुज्जा न य कारवेज्जा करन्तमन्नं पि य नाणुजाणे ॥ २२ ॥
 सुद्धे सिया जाएँ न दूसएज्जा अमुच्छिण न य अज्झोववन्ने ।
 धिइमं विमुक्के न य पूयणट्ठी न सिलोयगामी य परिव्वएज्जा ॥ २३ ॥
 निक्खम्म गेहाउ निरावकंखी कायं विउस्सेज्ज नियाणछिन्ने ।
 नो जीवियं नो मरणाभिकंखी चरेज्ज भिक्खू वलया विमुक्के ॥ २४ ॥
 त्ति वेमि ॥

समाहियज्झयणं दसमं

मग्गज्झयणे एयारहमे

1. 11.

कयरे मग्ग अक्खाए माहणेणं मईमया ।
 जं मग्गं उज्जु पावित्ता ओहं तरइ दुत्तरं ॥ १ ॥
 जं मग्गं गुत्तरं सुद्धं सव्वदुक्खविमोक्खणं ।
 जाणासि णं जहा भिक्खू तं णो बूहि महामुणी ॥ २ ॥
 जइ णो केइ पुच्छिज्जा देवा अदुव माणुसा ।
 तेसिं तु कयरं मग्गं आइक्खेज्ज कहाहि णो ॥ ३ ॥
 जइ वो केइ पुच्छिज्जा देवा अदुव माणुसा ।
 तेसिमं पडिसाहेज्जा मग्गसारं सुणेह मे ॥ ४ ॥
 अणुपुब्बेण महाघोरं कासवेण पवेइयं ।
 जमायाय इओ पुब्बं समुदं ववहारिणो ॥ ५ ॥
 अतरिंसु तरन्तेगे तरिस्सन्ति अणागया ।
 तं सोच्चा पडिवक्खामि जन्तवो तं सुणेह मे ॥ ६ ॥
 पुढवीजीवा पुढो सत्ता आउजीवा तहागणी ।
 वाउजीवा पुढो सत्ता तणरुक्खा सवीयगा ॥ ७ ॥
 अहावरा तसा पाणा एवं छक्काय आहिया ।
 एयावए जीवक्काए नावरे कोइ विज्जई ॥ ८ ॥
 सव्वाहिं अणुजुत्तीहिं मइमं पडिलेहिया ।
 सव्वे अकन्तदुक्खा य अओ सव्वे न हिंसया ॥ ९ ॥
 एयं खु नाणिणो सारं जं न हिंसइ कंचण ।
 अहिंसा समयं चेव एयावन्तं वियाणिया ॥ १० ॥

उट्ठं अहे य तिरियं जे केइ तसथावरा ।

सव्वत्थ विरइं विज्जा सन्ति निव्वाणमाहियं ॥ ११ ॥

पभू दोसे निराकिच्चा न विरुज्जेज्ज केण वि ।

मणसा वयसा चेव कायसा चेव अन्तसो ॥ १२ ॥

संवुडे से महापत्ते धीरे दत्तेसणं चरे ।

एसणासभिए निच्चं वज्जयन्ते अणेसणं ॥ १३ ॥

भूयाइं च समारम्भ तमुदिस्सा य जं कडं ।

तारिसं तु न गिण्हेज्जा अन्नपाणं सुसंजए ॥ १४ ॥

पूर्इकम्मं न सेवेज्जा एस धम्मो वुसीमओ ।

जं किंचि अभिकंखेज्जा सव्वसो तं न कप्पए ॥ १५ ॥

हणन्तं नाणुजाणेज्जा आयगुत्ते जिइन्दिए ।

ठाणाइं सन्ति सट्ठीणं गामेसु नगरेसु वा ॥ १६ ॥

तहा गिरं समारम्भ अत्थि पुण्णं ति नो वए ।

अहवा नत्थि पुण्णं ति एवमेयं महब्भयं ॥ १७ ॥

दाणइया य जे पाणा हम्मन्ति तसथावरा ।

तेसिं सारक्खणट्ठाए तम्हा अत्थि ति नो वए ॥ १८ ॥

जेसिं तं उवकप्पन्ति अन्नपाणं तहाविहं ।

तेसिं लाभन्तरायं ति तम्हा नत्थि ति नो वए ॥ १९ ॥

जे य दाणं पसंसन्ति वहमिच्छन्ति पाणिणं ।

जे य णं पाडिसेहन्ति वित्तिच्छेयं करन्ति ते ॥ २० ॥

दुहओ वि ते न भासन्ति अत्थि वा नत्थि वा पुणो ।

आयं रयस्स हेच्चा णं निव्वाणं पाउणन्ति ते ॥ २१ ॥

निव्वाणं परमं बुद्धा नक्खत्ताण व चन्दिमा ।

तम्हा सया जए दन्ते निव्वाणं संधए मुणी ॥ २२ ॥

वुज्झमाणाण पाणाणं किच्चन्ताण सकम्मुणा ।
 आधाइ साहु तं दीवं पइठेसा पवुच्चई ॥ २३ ॥
 आधगुत्ते सया दन्ते छिन्नसोए अणासवे ।
 जे धम्मं सुद्धमक्खाइ पडिपुण्णमणेत्तिसं ॥ २४ ॥
 तमेव अविद्याणन्ता अबुद्धा बुद्धमाणिणो ।
 बुद्धा भो त्ति य मन्नन्ता अन्त एए समाहिए ॥ २५ ॥
 ते य बीयोदगं चेव तमुद्दिस्सा य जं कडं ।
 भोच्चा ज्ञाणं झियायन्ति अखेयन्नासमाहिया ॥ २६ ॥
 जहा ढंका य कंका य कुलला मग्गुका सिही ।
 मच्छेसणं झियायन्ति ज्ञाणं ते कलुसाधमं ॥ २७ ॥
 एवं तु समणा एगे मिच्छदिट्ठी अणारिया ।
 विसएसणं झियायन्ति कंका वा कलुसाहमा ॥ २८ ॥
 सुद्धं मग्गं विराहित्ता इहमेगे उ दुम्मई ।
 उम्मग्गया दुक्खं घायमेसन्ति तं तहा ॥ २९ ॥
 जहा आसाविणिं नावं जाइअन्धो दुरूहिया ।
 इच्छई पारमागन्तुं अन्तरा य विसीयइ ॥ ३० ॥
 एवं तु समणा एगे मिच्छदिट्ठी अणारिया ।
 सोयं कसिणभावन्ना आगन्तारो महब्भयं ॥ ३१ ॥
 इमं च धम्ममायाय कासवेण पवेइयं ।
 तरे सोयं महाघोरं अत्ताए परिव्वए ॥ ३२ ॥
 विरए गामधम्मोहिं जे केइ जगई जगा ।
 तेसिं अवुत्तमायाए थामं कुव्वं परिव्वए ॥ ३३ ॥
 अइमाणं च मायं च तं परिन्नाय पण्डिए ।
 सव्वमेयं निराकिच्चा निव्वाणं संधए मुणी ॥ ३४ ॥

संधए साहुधम्मं च पावधम्मं निराकरे ।
 उवहाणवीरिए भिक्खू कोहं माणं न पत्थए ॥ ३५ ॥
 जे य बुद्धा अतिकन्ता जे य बुद्धा अणागया ।
 सन्ति तेसिं पइट्ठाणं भूयाणं जगई जहा ॥ ३६ ॥
 अह णं वयमावन्नं फासा उच्चावया फुसे ।
 न तेसु विणिहण्णेज्जा वाएण व महागिरी ॥ ३७ ॥
 संबुडे से महापन्ने धीरे दत्तेसणं चरे ।
 निव्वुडे कालमाकंखी एवं केवल्लिणो मयं ॥ ३८ ॥
 ति वेमि ॥

मग्गज्झयणं एयारहमं ॥

समोसरणज्झयणे वारहमे

1. 12.

चत्तारि समोसरणाणिमाणि पावादुया जाइँ पुढो वयन्ति ।
 किरियं अकिरियं विणयं ति तइयं अन्नाणमाहंसु चउत्थमेव ॥ १ ॥
 अन्नाणिया ता कुसला वि सन्ता असंथुया नो वितिगिच्छतिण्णा ।
 अकोविया आहु अकोवियेहिं अणाणुवीइत्तु मुसं वयन्ति ॥ २ ॥
 सच्चं असच्चं इति चिन्तयन्ता असाहु साहु ति उदाहरन्ता ।
 जेमे जणा वेणइया अणेगे पुट्ठा वि भावं विणइंसु नाम ॥ ३ ॥
 अणोवसंखा इइ ते उदाहु अट्टे स ओभासइ अम्ह एवं ।
 लवावसंकी य अणागएहिं नो किरियमाहंसु अकिरियवाई ॥ ४ ॥
 संमिस्सभावं च गिरा गहीए से मुम्मुई होइ अणाणुवाई ।
 इमं दुपक्खं इममेगपक्खं आहंसु छलाययणं च कम्मं ॥ ५ ॥

ते एवमक्खन्ति अबुज्झमाणा विरूवरूवाणि अकिरियवाई ।
 जे मायइत्ता बहवे मणूसा भमन्ति संसारमणोवदग्गं ॥ ६ ॥
 नाइच्चो उदेइ न अत्थमेइ न चन्दिमा वट्टइ हायई वा ।
 सलिला न सन्दन्ति न वन्ति वाया वज्झो नियओ कसिणे हु लोए ॥ ७ ॥
 जहा हि अन्धे सह जोइणा वि रूवाई नो पस्सइ हीणनेत्ते ।
 सन्तं पि ते एवमकिरियवाई किरियं न पस्सन्ति निरुद्धपन्ना ॥ ८ ॥
 संवच्छरं सुविणं लक्खणं च निमित्तदेहं च उप्पाइयं च ।
 अट्ठग्गेयं बहवे अहिता लोगांसि जाणन्ति अणागयाइं ॥ ९ ॥
 केई निमित्ता तहिया भवन्ति केसिंचि तं विप्पडिण्ह नाणं ।
 ते विज्जभावं अणहिज्जमाणा आहंसु विज्जापरिमोक्खमेव ॥ १० ॥
 ते एवमक्खन्ति समिच्च लोगं तहा तहा समणा माहणा य ।
 सयंकडं नन्नकडं च दुक्खं आहंसु विज्जाचरणं पमोक्खं ॥ ११ ॥
 ते चक्खु लोगांसिह नायगा उ भग्गाशुसासन्ति हियं पयाणं ।
 तहा तहा सासयमाहु लोए जंसी पया माणव संपगाढा ॥ १२ ॥
 जे रक्खसा वा जमलोइया वा जे वा सुरा गंधव्वा य काया ।
 आगासगामी य पुढोसिया जे पुणो पुणो विप्परियासुवेन्ति ॥ १३ ॥
 जमाहु ओहं सलिलं अपारगं जाणाहि णं भवगहणं दुमोक्खं ।
 जंसी विसण्णा विसयङ्गणाहिं दुहओ वि लोयं अणुसंचरन्ति ॥ १४ ॥
 न कम्मणा कम्म खवेन्ति वाला अकम्मणा कम्म खवेन्ति धीरा ।
 मेहाविणो लोभभयावईया संतोसिणो नो पक्रेन्ति पावं ॥ १५ ॥
 ते तीयउप्पन्नमणागयाइं लोगस्स जाणन्ति तहागयाइं ।
 नेयारो अन्नेसि अणन्ननेया बुद्धा हु ते अन्तकडा भवन्ति ॥ १६ ॥
 ते नेव कुव्वन्ति न कारवेन्ति भूयाहिसंकाइ दुगुच्छमाणा ।
 सया जया विप्पणमन्ति धीरा विन्नत्ति धीरा य हवन्ति एगे ॥ १७ ॥

હહરે ય પાળે બુદ્ધે ય પાળે તે અત્તઓ પાસઈ સવ્વલોણે ।
 ઉવ્વેહઈ લોગમિણં મહન્તં બુદ્ધેપમત્તેસુ પરિવ્વણ્ણા ॥ ૧૮ ॥
 જે આયઓ પરઓ વા વિ નચ્ચા અલમ્પ્પણો હોન્તિ અલં પરેસિં ।
 તં જોઈભૂયં ચ સયાવસેજ્ઞા જે પાઠકુજ્ઞા અણુવીઈ ધમ્મં ॥ ૧૯ ॥
 અત્તાણ જો જાણઈ જો ય લોગં ગઈં ચ જો જાણઈ નાગઈં ચ ।
 જો સાસયં જાણ અસાસયં ચ જાઈં ચ મરણં ચ જણોવવાયં ॥ ૨૦ ॥
 અહો વિ સત્તાણ વિઉટ્ઠણં ચ જો આસવં જાણઈ સંવરં ચ ।
 દુક્ખં ચ જો જાણઈ નિજરં ચ સો માસિઉમરિહઈ કિરિયવાયં ॥ ૨૧ ॥
 સદેસુ રૂવેસુ અસજ્જમાળે ગન્ધેસુ રસેસુ અદુસ્સમાળે ।
 નો જીવિયં નો મરણાહિકંઘી આયાણગુત્તે વલયા વિમુક્કે ॥ ૨૨ ॥
 તિ વેમિ ॥

સમોસરણજ્ઞયણં વારહમં

આહત્તહીયજ્ઞયણે તેરહમે

1. 13.

આહત્તહીયં તુ પવેયઈસ્સં નાળપ્પકારં પુરિસસ્સ જાયં ।
 સઓ ય ધમ્મં અસઓ અસીલં સન્તિ અસન્તિં કરિસ્સામિ પાઠં ॥ ૧ ॥
 અહો ય રઓ યુ સમુટ્ટિણ્ણિં તહાગણ્ણિં પઢિલગ્ગમ્ ધમ્મં ।
 સમાહિમાધાયમજોસયન્તા સત્થારમેવ ફરુસં વયન્તિ ॥ ૨ ॥
 વિસોહિયં તે અણુકાહયન્તે જે આયભાવેણ વિયાગરેજ્ઞા ।
 અદ્વાણે હોઈ બહુગુણાણ જે નાળસંકાઈ મુસં વણ્ણા ॥ ૩ ॥
 જે યાવિ પુટ્ટા પલિઉચ્ચયન્તિ આયાણમટ્ટં ચલુ વચ્ચઈત્તા ।
 અસાહુણો તે ઇહ સાહુમાણી માયણિણે એસસન્તિ અણન્તઘાયં ॥ ૪ ॥

जे कोहणे होइ जयटभासी विओसियं जे उ उदीरणजा ।
 अन्धे व से दण्डपहं गहाय अविओसिए धासइ पावकम्मी ॥ ५ ॥
 जे विग्गहीए अन्नायभासी न से समे होइ अज्ञञ्जपत्ते ।
 ओवायकारी य हिरीमणे य एगन्तदिट्ठी य अमाइरूवे ॥ ६ ॥
 से पेसले सुहुमे पुरिसजाए जच्चन्निए चेव सुउज्जुयोर ।
 बहं पि अणुसासिएँ जे तहच्चा समे हु से होइ अज्ञञ्जपत्ते ॥ ७ ॥
 जे यावि अणं वसुमं ति मत्ता संखाय वायं अपरिक्ख कुज्जा ।
 तवेण वाहं सहिउ त्ति मत्ता अन्नं जणं पस्सइ विम्बभूयं ॥ ८ ॥
 एगन्तकूडेण उ से पलेइ न विज्जई मोणपयंसि गोत्ते ।
 जे माणणट्ठेण विउकसेज्जा वसुमन्नतरेण अबुज्जमाणे ॥ ९ ॥
 जे माहणे खत्तियजायए वा तहुग्गपुत्ते तह लेच्छई वा ।
 जे पव्वईए परदत्तभोई गोत्ते न जे थब्भइ माणवद्धे ॥ १० ॥
 न तस्स जाई व कुलं व ताणं नन्नत्थ विज्जाचरणं सुचिण्णं ।
 निक्खम्म से सेवइ गारिक्खं न से पारए होइ विमोयणाए ॥ ११ ॥
 निक्किंचणे भिक्खु सुलहजीवी जे गारवं होइ सिलोकामी ।
 आजीवमेयं तु अबुज्जमाणो पुणो पुणो विप्परियासुवेन्ति ॥ १२ ॥
 जे भासवं भिक्खु सुसाहुवाई पडिहाणवं होइ विसारए य ।
 आगाढपन्ने सुविभावियप्पा अन्नं जणं पन्नया परिहवेज्जा ॥ १३ ॥
 एवं न से होइ समाहिपत्ते जे पन्नवं भिक्खु विउकसेज्जा ।
 अहवा वि जे लाहमयावलित्ते अन्नं जणं खिंसइ बालपन्ने ॥ १४ ॥
 पन्नामयं चेव तवोमयं च निन्नामए गोयमयं च भिक्खू ।
 आजीवगं चेव चउत्थमाहु से पण्डिए उत्तमपोग्गले से ॥ १५ ॥
 मयाइँ एयाइँ विगिञ्च धीरा न ताणि सेवन्ति सुधीरधम्मा ।
 ते सव्वगोत्तावगया महेसी उच्चं अगोत्तं च गतिं वयन्ति ॥ १६ ॥

भिक्खू सुयच्चे तह दिट्ठधम्मं गामं च नगरं च अणुप्पविस्सा ।
 से एसणं जाणमणेसणं च अन्नस्स पाणस्स अणाणुगिद्धे ॥ १७ ॥
 अरइं रइं च अभिभूय भिक्खू बहूजणे वा तह एगचारी ।
 एगन्तमोणेण वियागरेज्जा एगस्स जन्तो गइरागई य ॥ १८ ॥
 सयं समेच्चा अदुवा वि सोच्चा भासेज्ज धम्मं हिययं पयाणं ।
 जे गरहिया सणियाणप्पओगा न ताणि सेवन्ति सुधीरधम्मा ॥ १९ ॥
 केसिंचि तक्काइ अबुज्ज भावं खुदं पि गच्छेज्ज असदहाणे ।
 आउस्स कालाइयारं वधाए लद्धाणुमाणे य परेसु अट्ठे ॥ २० ॥
 कम्मं च छन्दं च विगिञ्च धीरे विणइज्ज ऊ सव्वउ आयभावं ।
 रूवेहिं लुप्पन्ति भयावहेहिं विज्जं गहाया तसथावरेहिं ॥ २१ ॥
 न पूयणं चेव सिलोयकामी पियमप्पियं कस्सइ नो करेज्जा ।
 सव्वे अणट्ठे परिवज्जयन्ते अणाउले या अकसाइ भिक्खू ॥ २२ ॥
 आहत्तहीयं समुपेहमाणे सव्वेहि पाणेहि निहाय दण्डं ।
 नो जीवियं नो मरणाहिकंखी परिव्वएज्जा वलया विमुक्के ॥ २३ ॥
 त्ति वेमि ॥

आहत्तहीयज्जयणं तेरहमं

गन्थज्जयणे चोद्दहमे

1. 14.

गन्थं विहाय इह सिक्खमाणो उट्ठाय सुवम्भचेरं वसेज्जा ।
 ओवायकारी विणयं सुसिक्खे जे छेय से विप्पमायं न कुज्जा ॥ १ ॥
 जहा दियापोयमपत्तजायं सावासगा पविउं मन्नमाणं ।
 तमचाइयं तरुणमपत्तजायं ढंकाइ अव्वत्तगमं हरेज्जा ॥ २ ॥

एवं तु सेहं पि अपुट्ठधम्मं निस्सारियं वुसिमं मन्नमाणा ।
 दियस्स छायं व अपत्तजायं हरिंसु णं पावधम्मा अणेगे ॥ ३ ॥
 ओसाणमिच्छे मणुए समाहिं अणोसिए णन्तकरिं ति नच्चा ।
 ओभासमाणे दवियस्स वित्तं न निकसे वहिया आसुपन्नो ॥ ४ ॥
 जे ठाणओ य सयणासणे य परक्कमे यावि सुसाहुजुत्ते ।
 समिईसु गुत्तीसु य आयपन्ने वियागरिं ते य पुढो वएज्जा ॥ ५ ॥
 सदाणि सोच्चा अदु भेरवाणि अणासवे तेसु परिच्चएज्जा ।
 निदं च भिक्खू न पमाय कुज्जा कहंकहं वा वित्तिगिच्छतिण्णे ॥ ६ ॥
 डहरेण वुट्ठेणसुसिए उ राइणिण्णावि समव्वएणं ।
 सम्मं तयं थिरओ नाभिगच्छे निज्जन्तए वावि अपारए से ॥ ७ ॥
 विउट्ठिएणं समयणुसिद्धे डहरेण वुट्ठेण उ चोइए य ।
 अच्चुट्ठियाए घडदासिए वा अगारिणं वा समयणुसिद्धे ॥ ८ ॥
 न तेसु कुज्जे न य पच्चहेज्जा न यावि किंची फरुसं वएज्जा ।
 तहा करिस्सं ति पडिस्सुणेज्जा सेयं खु मेयं न पमाय कुज्जा ॥ ९ ॥
 वणंसि मूढस्स जहा अमूढा मग्गाणुसासन्ति हियं पयाणं ।
 तेणेव मज्झं इणमेव सेयं जं मे बुहा समणुसासयन्ति ॥ १० ॥
 अह तेण मूढेण अमूढगस्स कायव्व पूया सविसेसजुत्ता ।
 एओवमं तत्थ उदाहु वीरे अणुगम्म अत्थं उवणेइ सम्मं ॥ ११ ॥
 नेया जहा अन्धकारंसि राओ मग्गं न जाणाइ अपस्समाणे ।
 से सूरियस्स अब्भुग्गमेणं मग्गं वियाणाइ पगासियंसि ॥ १२ ॥
 एवं तु सेहे वि अपुट्ठधम्मे धम्मं न जाणाइ अबुज्झमाणे ।
 से कोविए जिणवयणेण पच्छा सूरुदए पासइ चक्खुणेव ॥ १३ ॥
 उट्ठं अहे यं तिरियं दिसासु तसा य जे थावर जे य पाणा ।
 सया जए तेसु परिच्चएज्जा मणप्पओसं अविकम्पमाणे ॥ १४ ॥

कालेण पुच्छे समियं पयासु आइक्खमाणो द्वियस्स वित्तं ।
 तं सोयकारी य पुढो पवेसे संखा इमं केवलियं समाहिं ॥ १५ ॥
 अस्मिं सुठिच्चा तिविहेण तायी एएसु या सन्ति निरोहमाहु ।
 ते एवमक्खन्ति तिलोगदंसी न भुज्जमेयन्ति पमायसंगं ॥ १६ ॥
 निसम्म से भिक्खु समीहियदं पडिभागवं होइ विसारए य ।
 आयाणअट्ठी वोदाणमोणं उवेच्च सुद्वेण उवेइ भोक्खं ॥ १७ ॥
 संखाइ धम्मं च वियागरन्ति बुद्धा हु ते अन्तकरा भवन्ति ।
 ते पारगा दोण्ह वि मोयणाए संसोधियं पण्हमुदाहरन्ति ॥ १८ ॥
 नो छायए नो वि य लूसएज्जा क्षाणं न सेवेज्ज पमासणं च ।
 न यावि पन्ने परिहास कुज्जा न यासियावाय वियागरेज्जा ॥ १९ ॥
 भूयाभिसंकाइ दुमुच्छमाणे न निव्वहे भन्तपएण गोयं ।
 न किंचिमिच्छे मणुए पयासुं असाहुधम्माणि न संवएज्जा ॥ २० ॥
 हासं पि नो संधइ पावधम्मे ओए तईयं फरुसं वियाणे ।
 नो तुच्छए नो य विकंथइज्जा अणाइले या अकसाइ भिक्खू ॥ २१ ॥
 संकेज्ज यासंक्रियभाव भिक्खू विभज्जवायं च वियागरेज्जा ।
 भासादुयं धम्मसमुट्ठिहं वियागरेज्जा समयसुपन्ने ॥ २२ ॥
 अणुगच्छमाणे वितहं विजाणे तहा तहा साहु अकक्सेणं ।
 न कत्थई भास विहिंसइज्जा निरुद्धगं वा वि न दीहइज्जा ॥ २३ ॥
 समालवेज्जा पडिपुण्णभासी निसाभिया समियाअदुदंसी ।
 आणाइ सुद्वं वयणं भिउज्जे अभिसंधए पावविवेग भिक्खू ॥ २४ ॥
 अहावुइयाइं सुसिक्खएज्जा जइज्जया नाइवेलं वएज्जा ।
 से दिट्ठिं दिट्ठि न लूसएज्जा से जाणइ भासिउं तं समाहिं ॥ २५ ॥
 अलूसए नो पच्छन्नभासी नो सुत्तमत्थं च करेज्ज ताई ।
 सत्थारभत्ती अणुवीइ वायं सुयं च सम्मं पडिवाययन्ति ॥ २६ ॥

से सुद्वसुत्ते उवहाणवं च धम्मं च जे विन्दइ तत्थ तत्थ ।
 आणज्जक्के कुसले वियत्ते स अरिहइ भासिउं तं समाहिं ॥ २७ ॥
 ति वेमि ॥

गन्धज्झयणं चोदहमं

आयाणियज्झयणे पण्णरहमे

1. 15.

जमईअं पडुप्पन्नं आगमिस्सं च नायओ ।
 सव्वं सन्नइ तं ताई दंसणावरणन्तए ॥ १ ॥
 अन्तए वितिगिच्छाए से जाणइ अणेलिसं ।
 अणेलिसस्स अक्खाया न से होइ तहिं तहिं ॥ २ ॥
 तहिं तहिं सुयक्खायं से य सच्चे सुआहिए ।
 सया सच्चेण संपन्ने भेत्तिं भूएहि कप्पए ॥ ३ ॥
 भूएहि न विरुज्जेजा एस धम्मे वुसीमओ ।
 वुत्थिभं जगं परिन्नाय अस्सि जीवियभावणा ॥ ४ ॥
 भावणाजोगसुद्वप्पा जले नावा व आहिया ।
 नावा व तीरसंपन्ना सव्वदुक्खा तिउट्ठइ ॥ ६ ॥
 तिउट्ठई उ मेहावी जाणं लोगंसि पावगं ।
 तुट्ठन्ति पावकम्माणि नवं कम्ममकुव्वओ ॥ ६ ॥
 अकुव्वओ नवं नत्थि कम्मं नाम विजाणइ ।
 विन्नाय से महावीरे जेण जाई न मिज्जई ॥ ७ ॥
 न मिज्जई महावीरे जस्स नत्थि पुरेकडं ।
 वाउ व्व जालमच्चेइ पिया लोगंसि इत्थियो ॥ ८ ॥

इत्थियो जे न सेवन्ति आइमोक्खा हु ते जणा ।
 ते जणा बन्धणुम्मुक्का नावकंखन्ति जीवियं ॥ ९ ॥
 जीवियं पिट्ठओ किच्चा अन्तं पावन्ति कम्मणं ।
 कम्मणा संमुहीभूया जे मग्गमणुसासई ॥ १० ॥
 अणुसासणं पुट्ठो पाणी वसुमं पूयणासु ते ।
 अणासए जए दन्ते दढे आरयमेहुणे ॥ ११ ॥
 नीवारे व न लीएज्जा छिन्नसोए अणाविले ।
 अणाइले सया दन्ते संधिं पत्ते अणेलिसं ॥ १२ ॥
 अणेलिसस्स खेयन्ने न विरुज्जेज्ज केणइ ।
 मणसा वयसा चेव कायसा चेव चक्खुमं ॥ १३ ॥
 से हु चक्खू मणुस्साणं जे कंखाए य अन्तए ।
 अन्तेण खुरो वहई चक्कं अन्तेण लोढई ॥ १४ ॥
 अन्ताणि धीरा सेवन्ति तेण अन्तकरा इह ।
 इह माणुस्सए ठाणे धम्ममाराहिउं नरा ॥ १५ ॥
 निट्ठियिष्ठा व देवा वा उत्तरीए इयं सुयं ।
 सुयं च मेयमेगेसिं अमणुस्सेसु नो तहा ॥ १६ ॥
 अन्तं करन्ति दुक्खाणं इहमेगेसिमाहियं ।
 आघायं पुण एगेसिं दुल्लभेयं समुस्सए ॥ १७ ॥
 इओ विट्ठंसमाणस्स पुणो संबोहि दुल्लहा ।
 दुल्लहाओ तहच्चाओ जे धम्मट्ठं वियागरे ॥ १८ ॥
 जे धम्मं सुद्धमक्खन्ति पडिपुण्णमणेलिसं ।
 अणेलिसस्स जं ठाणं तस्स जम्मकहा कओ ॥ १९ ॥
 कओ कयाइ मेहावी उप्पज्जन्ति तहागया ।
 तहागया अप्पडिन्ना चक्खू लोगस्सणुत्तरा ॥ २० ॥

अणुत्तरे य ठाणे से कासवेण पवेइए ।
 जं किच्चा निव्वुडा एगे निट्ठं पावन्ति पण्डिया ॥ २१ ॥
 पण्डिए वीरियं लद्धुं निग्वायाय पवत्तगं ।
 धुणे पुव्वकडं कम्मं नवं वा वि न कुव्वई ॥ २२ ॥
 न कुव्वई महावीरे अणुपुव्वकडं रयं ।
 रयसा संमुहीभूया कम्मं हेच्चाण जं मयं ॥ २३ ॥
 जं मयं सव्वसाहूणं तं मयं सल्लगत्तणं ।
 साहज्झत्ताण तं तिण्णा देवा वा अभविसु ते ॥ २४ ॥
 अभविसु पुरा धीरा आगमिस्सा वि सुव्वया ।
 दुब्बिवोहस्स मग्गस्स अन्तं पाउकरा तिण्णे ॥ २५ ॥
 त्ति वेमि ॥

आयाणियज्झयणं पण्णरहमं

गाहज्झयणे सोळसमे

I. 16.

अहाह भगवं—एवं से दन्ते दविण वोसट्टकाए त्ति वच्चे माहणे
 त्ति वा १ समणे त्ति वा २ भिक्खु त्ति वा ३ निग्गन्थे त्ति वा ४ ।
 पडिआह—मन्ते क्हं नु दन्ते दविण वोसट्टकाए त्ति वच्चे माहणे त्ति वा
 समणे त्ति वा भिक्खु त्ति वा निग्गन्थे त्ति वा । तं नो बूहि महामुणी ॥
 इति विरए सव्वपावकम्मेहिं पिज्जदोसकलह० अब्भक्खाण० पेमुन्न०
 परपरिवाय० अरुइ० मायामोस० मिच्छादंसणसल्लविरए समिए सहिए
 सया जए नो कुज्जे नो माणी माहणे त्ति वच्चे ॥ १ ॥

एत्थ वि समणे अनिस्सिए अणियाणे आयाणं च अइवायं च
 मुसावायं च बहिट्ठं च कोहं च माणं च मायं च लोहं च पिज्जं च

दोसं च इच्चेव जओ जओ आयाणं अप्पणो पद्दोसहेऊ तओ तओ
आयाणाओ पुव्वं पडिविए पाणाइवाया सिआ दन्ते दविए वोसट्टकाए
समणे त्ति वच्चे ॥ २ ॥

एत्थ वि भिक्खू अणुन्नए विणीए नामए दन्ते दविए वोसट्टकाए
संविधुणीय विरूवरूवे परीसहोवसग्गे अज्झप्पजोगमुद्धादाणे उवट्टिए
ठिअप्पा संखाए परदत्तभोई भिक्खु त्ति वच्चे ॥ ३ ॥

एत्थ वि निग्गन्थे एगे एगविऊ बुद्धे संछिन्नसोए सुसंजए सुस-
मिए सुसामाइए आयवायपत्ते विऊ दुहओ वि सोयपल्लिछिन्ने धम्मट्ठी
धम्मविऊ नियागपडिवन्ने सामियं चरे दन्ते दविए वोसट्टकाए निग्गन्थे
त्ति वच्चे ॥ ४ ॥ से एवमेव जाणह जमहं भयन्तारो ॥ त्ति बेमि ॥

गाहज्झयणं सोळसमं

पढमे सुयक्खन्धे समत्ते ॥

सूयगडं

चिइये रुयक्खन्धे

पोण्डरियज्ज्ञयणे पढमे

2. 1.

सुयं मे आउसं तेणं भगवया एवमक्खायं । इह खलु पोण्डरीए नामज्ज्ञयणे तस्स णं अयमद्वे पन्नत्ते । से जहानामए पुक्खरिणी सिया बहुउदगा बहुसेया बहुपुक्खला लद्धवा पुण्डरिकिणी पासादिया दरिसणिया अभिरूवा पडिरूवा । तीसे णं पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया, अणुपुव्वुट्टिया असिया रुइला वण्णमन्ता गन्धमन्ता रसमन्ता फासमन्ता पासादिया दरिसणिया अभिरूवा पडिरूवा । तीसे णं पुक्खरिणीए बहुमज्झदेसभाए एगे महं पउमवरपोण्डरीए बुइए, अणुपुव्वुट्टिए असिए रुइले वण्णमन्ते गन्धमन्ते रसमन्ते फासमन्ते पासादीए जाव पडिरूवे । सव्वावन्ति च णं तीसे पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया अणुपुव्वुट्टिया असिया रुइला जाव पडिरूवा । सव्वावन्ति च णं तीसे णं पुक्खरिणीए बहुमज्झदेसभाए एगे महं पउमवरपोण्डरीए बुइए अणुपुव्वुट्टिए जाव पडिरूवे ॥ १ ॥

अह पुरिसे पुरित्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्टियं असियं जाव पडिरूवं । तए णं से पुरिसे एवं वयासी-अहमंसि पुरिसे खेयन्ने कुसले पण्डिए वियत्ते मेहावी अबाले मग्गट्टे मग्गविऊ मग्गस्स गइपरिकमन्नू । अहमेयं पउमवरपोण्डरीयं उन्निक्खिस्सामि त्ति कट्ठु इइ बुया से पुरिसे अभिकमेइ तं पुक्खरिणिं । जावं जावं च णं अभिकमेइ तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे पढमे पुरिसजाए ॥ २ ॥

अहावरे दोचे पुरिसजाए । अह पुरिसे दक्खिणाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्ठियं पासादीयं जाव पडिरुवं । तं च एत्थ एगं पुरिसजायं पासइ पहीणतीरं अपत्तपउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णं । तए णं से पुरिसे तं पुरिसं एवं वयासी-अहो णं इमे पुरिसे अखेयन्ने अकुसले अपण्डिए अवियत्ते अमेहावी वाले नो मग्गट्ठे नो मग्गविउ नो मग्गस्स गइपरिकमन्नू जं णं एस पुरिसे । अहमंसि खेयन्ने कुसले जाव पउमवरपोण्डरीयं उन्निक्खिस्सामि । नो य खलु एयं पउमवरपोण्डरीयं एवं उन्निक्खेयव्वं जहा णं एस पुरिसे मन्ने । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे मग्गविउ मग्गस्स गइपरिकमन्नू, अहमेयं पउमवरपोण्डरीयं उन्निक्खिस्सामि ति कट्ठु इइ बुया से पुरिसे अभिक्रमे तं पुक्खरिणिं । जावं जावं च णं अभिक्रमेइ तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे दोचे पुरिसजाए ॥ ३ ॥

अहावरे तच्चे पुरिसजाए । अह पुरिसे पच्चत्थिणाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं एगं पउमवरपोण्डरीयं अणुपुव्वुट्ठियं जाव पडिरुवं । ते तत्थ दोण्णि पुरिसजाए पासइ पहीणे तीरं अपत्ते पउमवरपोण्डरीयं नो हव्वाए नो पाराए जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना अकुसला अपण्डिया अवियत्ता अमेहावी वाला नो मग्गट्ठा नो मग्गविउ नो मग्गस्स गइपरिकमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खिस्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे मग्गविउ

मग्गस्स गइपरिकमन्नू अहमेयं पउमवरपोण्डरीयं उन्निक्खिस्सामि त्ति कट्ठु इति वुच्चा से पुरिसे अभिक्रमे तं पुक्खरिणिं । जावं जावं च णं अभिक्रमे तावं तावं च णं महन्ते उदए महन्ते सेए जाव अन्तरा पुक्खरिणीए सेयंसि निसण्णे तच्चे पुरिसजाए ॥ ४ ॥

अहावरे चउत्थे पुरिसजाए । अह पुरिसे उत्तराओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवर-पोण्डरीयं अणुपुव्वुट्ठियं जाव पडिरूवं । ते तत्थ तिणिण पुरिसजाए पासइ पहीणे तीरं अपत्ते जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना जाव नो मग्गस्स गइपरिकमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खि-स्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने जाव मग्गस्स गइपरि-कमन्नू, अहमेयं पउमवरपोण्डरीयं एवं उन्निक्खिस्सामि त्ति कट्ठु इतिच्चा से पुरिसे अभिक्रमे तं पुक्खरिणिं । जावं जावं च णं अभिक्रमे तावं तावं च णं महन्ते उदए महन्ते सेए जाव निसण्णे चउत्थे पुरिसजाए ॥ ५ ॥

अह भिक्खू ल्हहे तीरट्ठी खेयन्ने जाव गइपरिकमन्नू अन्नयराओ दिसाओ वा अणुदिसाओ वा आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं जाव पडिरूवं । ते तत्थ चत्तारि पुरिसजाए पासइ पहीणे तीरं अपत्ते जाव पउमवरपोण्ड-रीयं नो हव्वाए नो पाराए अन्तरा पुक्खरिणीए सेयंसि निसण्णे । तए णं से भिक्खू एवं वयासी-अहो णं इमे पुरिसा अखेयन्ना जाव नो मग्गस्स गइपरिकमन्नू जं एए पुरिसा एवं मन्ने-अम्हे एयं पउमवरपोण्डरीयं उन्निक्खिस्सामो, नो य खलु एयं पउमवरपोण्डरीयं एवं उन्निक्खे-यव्वं जहा णं एए पुरिसा मन्ने । अहमंसि भिक्खू ल्हहे तीरट्ठी खेयन्ने

जाव गइपरिकमन्नू अहमेयं पउमवरपोण्डरीयं उन्निक्खिस्सामि त्ति कट्ठु इति वुच्चा से भिक्खू नो अभिक्कमे तं पुक्खरिणिं तीसे पुक्खरिणीए तीरे ठिच्चा सदे कुज्जा-उप्पयाहि खलु भो पउमवरपोण्डरीया उप्पयाहि । अह उप्पइए से पउमवरपोण्डरीए ॥ ६ ॥

किट्टिए नाए समणाउसो, अट्ठे पुण से जाणियव्वे भवइ । भन्ते त्ति समणं भगवं महावीरं निग्गन्था य निग्गन्थीओ य वन्दन्ति नमंसन्ति वन्दित्ता नमंसित्ता एवं वयासी-किट्टिए नाए समणाउसो, अट्ठं पुण से न जाणामो समणाउसो त्ति । समणे भगवं महावीरे ते य बहवे निग्गन्थे य निग्गन्थीओ य आमन्तेत्ता एवं वयासी-हन्त समणाउसो आइक्खामि विभावेमि कित्तेमि पवेएमि सअट्ठं सहेउं सनिमित्तं भुज्जो भुज्जो उवदंसेमि । से वेमि ॥ ७ ॥

लोयं च खलु मए अप्पाहट्ठु समणाउसो पुक्खरिणी वुइया । कम्मं च खलु मए अप्पाहट्ठु समणाउसो से उदए वुइए । कामभोगे य खलु मए अप्पाहट्ठु समणाउसो से सेए वुइए । जणजाणवयं च खलु मए अप्पाहट्ठु समणाउसो ते बहवे पउमवरपोण्डरीए वुइए । रायाणं च खलु मए अप्पाहट्ठु समणाउसो से एगे महं पउमवरपोण्डरीए वुइए । अन्नतित्थिया य खलु मए अप्पाहट्ठु समणाउसो ते चत्तारि पुरिसजाया वुइया । धम्मं च खलु मए अप्पाहट्ठु समणाउसो से भिक्खू वुइए । धम्मतित्थं च खलु मए अप्पाहट्ठु समणाउसो से तीरे वुइए । धम्मकहं च खलु मए अप्पाहट्ठु समणाउसो से सदे वुइए । निव्वाणं च खलु मए अप्पाहट्ठु समणाउसो से उप्पाए वुइए । एवमेयं च मए अप्पाहट्ठु समणाउसो से एवमेयं वुइयं ॥ ८ ॥

इह खलु पाईणं वा पडीणं वा उदीणं वा दाहिणं वा सन्तेगइया मणुस्सा भवन्ति अणुपुव्वेणं लोगं उववन्ना । तं जहा-आरिया वेगे

अणारिया वेगे उच्चागोत्ता वेगे णीयागोया वेगे कायमन्ता वेगे रहस्स-
मन्ता वेगे सुवण्णा वेगे दुव्वण्णा वेगे सुरूवा वेगे दुरूवा वेगे । तेसिं च
णं मणुवाणं एगे राया भवइ सहया हिमवन्तमलयमन्दरमहिन्दसारे
अचन्तविसुद्धरायकुलवंसप्पमूए निरन्तरायलक्खणविराइयङ्गमङ्गे बहु-
जणवहुमाणपूइए सव्वगुणसमिद्धे खत्तिए मुदिए मुद्धाभिसित्ते भाउ-
पिउमुजाए दयप्पिए सीसंकरे सीसंधरे खेमंकरे खेमंधरे मणुस्सिन्दे
जणवयपिया जणवयपुरोहिए सेउकरे केउकरे नरपथरे पुरिस्सपवरे पुरिस-
सीहे पुरिसआसीविसे पुरिस्सवरपोण्डरीए पुरिस्सवरगन्धहत्थी अट्टे
दित्ते वित्ते वित्थिण्णविउलभवणसयणासणजाणवाहणाइण्णे बहुधण-
वहुजायसूवरयए आओगपओगसंपउत्ते विच्छड्डियपउरभत्तपाणे बहुदासी-
दासगोमहिसगवेलगप्पमूए पडिपुण्णकोसकोट्टागाराउहागारे बलवं दुव्वल-
पच्चामित्ते ओहयकण्ठयं निहयकण्ठयं मलियकण्ठयं उद्वियकण्ठयं अकण्ठयं
ओहयसत्तू निहयसत्तू मलियसत्तू उद्वियसत्तू निज्जियसत्तू पराइयसत्तू
ववगयदुब्बिभवस्समारिभयविप्पमुकं (रायवण्णओ जहा ओववाइए) जाव
पसन्तडिण्वडमरं रज्जं पसासेमाणे विहरइ । तस्स णं रत्तो परिसा भवइ-
उग्गा उग्गपुत्ता भोगा भोगपुत्ता इक्खागाइ इक्खागाइपुत्ता नाया नायपुत्ता
कोरव्वा कोरव्वपुत्ता भट्टा भट्टपुत्ता माहणा माहणपुत्ता लेच्छइ लेच्छइ-
पुत्ता पसत्थारो पसत्थपुत्ता सेणावई सेणावइपुत्ता । तेसिं च णं एग-
इए सट्ठी भवइ कामं तं समणा वा माहणा वा संपहारिंसु गमणाए ।
तत्थ अन्नयरेणं धम्मणेणं पन्नत्तारो वयं इमेणं धम्मणेणं पन्नवइस्सामो से
एवमायाणह भयन्तारो जहा मए एस धम्मो सुयक्खाए सुपन्नत्ते भवइ ।
तं जहा-उड्डं पायतला अहे केसग्गमत्थया तिरियं तयपरियन्ते जीवे एस
आयापज्जे कसिणे एस जीवे जीवइ, एस मए नो जीवइ, सरीरे धर-
माणे धरइ विणट्ठम्मि य नो धरइ । एयं तं जीवियं भवइ, आदहणाए
पेहिं निज्जइ, अगणिज्जामिए सरीरे कवोयवण्णाणि अट्ठीणि भवन्ति,
आसन्दीपञ्चमा पुरिसा गामं पच्चागच्छन्ति, एवं असन्ते असंविज्ज-

माणे । जेसिं तं असन्ते असंविज्जमाणे तेसिं तं सुयक्खायं भवइ-अन्नो भवइ जीवो अन्नं सरीरं, तम्हा ते एवं नो विपडिवेदेन्ति-अयमाउसो आया दीहे त्ति वा हस्से त्ति वा परिमण्डले त्ति वा वड्डे त्ति वा तंसे त्ति वा चउरंसे त्ति वा आयए त्ति वा छलंसिए त्ति वा अठंसे त्ति वा किण्हे त्ति वा नीले त्ति वा लोहियहालिदे त्ति वा सुक्खिले त्ति वा सुब्भिगन्धे त्ति वा दुब्भिगन्धे त्ति वा तित्ते त्ति वा कडुए त्ति वा कसाए त्ति वा अम्बिले त्ति वा महुरे त्ति वा कक्खडे त्ति वा मउए त्ति वा गुरुए त्ति वा लहुए त्ति वा सीए त्ति वा उसिणे त्ति वा निद्धे त्ति वा लुक्खे त्ति वा । एवं असन्ते असंविज्जमाणे । जेसिं तं सुयक्खायं भवइ-अन्नो जीवो अन्नं सरीरं, तम्हा ते नो एवं उवलब्भन्ति । से जहानामए-केइ पुरिसे कोसीओ असिं अभिनिव्वट्ठित्ता णं उवदंसेज्जा अयमाउसो असी अयं कोसी, एवमेव नत्थि केइ पुरिसे अभिनिव्वट्ठित्ता णं उवदंसेत्तारो अयमाउसो आया इयं सरीरं । से जहानामए-केइ पुरिसे मुज्जाओ इसियं अभिनिव्वट्ठित्ता णं उवदंसेज्जा अयमाउसो मुज्जे इयं इसियं, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे मंसाओ अट्ठिं अभिनिव्वट्ठित्ता णं उवदंसेज्जा अयमाउसो मंसे अयं अट्ठी, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे करयलाओ आमलकं अभिनिव्वट्ठित्ता णं उवदंसेज्जा अयमाउसो करयले अयं आसलए, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे दहीओ नवणीयं अभिनिव्वट्ठित्ता णं उवदंसेज्जा अयमाउसो नवणीयं अयं तु दही, एवमेव नत्थि केइ पुरिसे जाव सरीरं । से जहानामए-केइ पुरिसे तिलेहिन्तो तेह्लं अभिनिव्वट्ठित्ता णं उवदंसेज्जा अयमाउसो तेह्लं अयं पिण्णाए, एवमेव जाव सरीरं । से जहानामए-केइ पुरिसे इम्बूओ खोयरसं अभिनिव्वट्ठित्ता

णं उवदंसेज्जा अयमाउसो खोयरसे अयं छोए, एवमेव जाव सरीरं । से जहानामए-केइ पुरिसे अरणीओ अग्गिं अभिनिव्वट्ठित्ता णं उवदंसेज्जा अयमाउसो अरणी अयं अग्गी, एवमेव जाव सरीरं । एवं असन्ते असंविज्जमाणे । जेसिं तं सुयक्खायं भवइ तं जहा-अन्नो जीवो अन्नं सरीरं । तम्हा ते मिच्छा ॥ से हन्ता तं हणह खणह छणह डहह पयह आलुम्पह विलुम्पह सहसक्कारेह विपरामुसह, एया-वया जीवे नत्थि परलोए । ते नो एवं विप्पडिवेदेन्ति, तं जहा-किरिया इ वा अकिरिया इ वा सुक्कडे इ वा दुक्कडे इ वा कल्लणे इ वा पावए इ वा साहु इ वा असाहु इ वा सिद्धी इ वा असिद्धी इ वा निरए इ वा अणिरए इ वा । एवं ते विरूवरूवेहिं कम्मसमारंभेहिं विरूवरूवाइं कामभोगाइं समारभन्ति भोयणाए ॥ एवं एगे पागब्भिया निक्खम्म मामगं धम्मं पन्नवेन्ति । तं सदहमाणा तं पत्तियमाणा तं रोएमाणा साहु सुयक्खाए समणे त्ति वा माहणे त्ति वा कामं खलु आउसो तुमं पूययामि, तं जहा-असणेण वा पाणेण वा खाइमेण वा साइमेण वा वत्थेण वा पडिग्गहेण वा कम्बलेण वा पायपुच्छणेण वा । तत्थेगे पूयणाए समाउट्ठिसु तत्थेगे पूयणाए निकाइंसु ॥ पुव्वमेव तेसिं नायं भवइ-समणा भविस्सामो अणगारा अकिंचणा अपुत्ता अपन्नू परदत्तभोइणो भिक्खुणो पावं कम्मं नो करिस्सामो समुट्ठाए । ते अप्पणा अप्पडिविरया भवन्ति, सयमाइयन्ति, अन्ने वि आइयावेन्ति अन्नं पि आययन्तं समणुजाणन्ति । एवमेव ते इत्थिकामभोगेहिं मुच्छिया गिद्धा गढिया अज्झोववन्ना लुद्धा रागदोसवसट्ठा । ते नो अप्पणां समुच्छेदेन्ति ते नो परं समुच्छेदेन्ति ते नो अन्नाइं पाणाइं भूयाइं जीवाइं सत्ताइं समुच्छेदेन्ति, पहीणा पुव्वसंजोगं आयरियं मग्गं असंपत्ता इति ते नो हव्वाए नो पाराए अन्तरा कामभोगेसु विसण्णा । इति पढमे पुरिसजाए तज्जीवतच्छरीरए त्ति आहिए ॥ ९ ॥

अहावरे दोच्चे पुरिसजाए पञ्चमहब्भूइए त्ति आहिज्जइ । इह खलु पाईणं वा ६ सन्तेगइया मणुस्सा भवन्ति अणुपुब्बेण लोयं उववन्ना, तं जहा-अरिया वेगे अणारिया वेगे एवं जाव दुरूवा वेगे । तेसिं च णं महं एगे राया भवइ महया एवं चेव निरवसेसं जाव सेणा-वइपुत्ता । तेसिं च णं एगइए सट्ठा भवन्ति कामं तं समणा य माहणा य पहारिंसु गमणाए । तत्थ अन्नयरेणं धम्मणेणं पन्नत्तारो वयं इमेणं धम्मणेणं पन्नवइस्सामो से एवमायाणह भयन्तारो जहा मए एस धम्मे सुअक्खाए सुपन्नत्ते भवइ । इह खलु पञ्चमहब्भूया जेहिं नो विज्जइ किरिया त्ति वा अकिरिया त्ति वा सुकडे त्ति वा दुक्डे त्ति वा कल्लणे त्ति वा पावए त्ति वा साहु त्ति वा असाहु त्ति वा सिद्धि त्ति वा निरए त्ति वा अनिरए त्ति वा अवि अन्तसो तणमाय-मवि ॥ तं च पिहुद्देसेणं पुढोभूयसमवायं जाणेज्जा । तं जहा पुढवी एगे महब्भूए, आऊ दुच्चे महब्भूए, तेऊ तच्चे महब्भूए, वाऊ चउत्थे महब्भूए, आगासे पञ्चमे महब्भूए । इच्चेए पञ्च महब्भूया अनिम्मिया अनिम्माविया अकडा नो कित्तिमा नो कडगा अणाइया अणिहणा अवब्झा अपुरोहिया संतता सासया आयल्लट्ठा । पुण एगे एवमाहु-सओ नत्थि विणासो असओ नत्थि संभवो । एयावया व जीवकाए एयावया व अत्थिकाए एयावया व सच्चलोए, एयं मुहं लोगस्स करणयाए, अवि अन्तसो तणमायमवि । से किणं किणावेमाणे हणं घायमाणे पयं पयावेमाणे अवि अन्तसो पुरिसमवि कीणिच्चा घायइत्ता एत्थं पि जाणाहि नत्थित्थ दोसो । ते नो एवं विप्पडिवेदेन्ति । तं जहा-किरिया इ वा जाव अनिरए इ वा । एवं ते विरूवरूवेहिं कम्म-समारंभेहिं विरूवरूवाइं कामभोगाइं समारभन्ति भोयणाए । एवमेव ते अणारिया विप्पडिवन्ना तं सदहमाणा तं पत्तियमाणा जाव ते नो हव्वाए नो पाराए अन्तरा कामभोगेसु विसण्णा । दोच्चे पुरिसजाए पञ्चमहब्भूइए त्ति आहि ॥ १० ॥

अहावरे तच्चे पुरिसजाए ईसरकारणिए त्ति आहिज्जइ । इह खलु पाईणं
वा ६ सन्तेगइया मणुस्सा भवन्ति अणुपुव्वेणं लोयं उववन्ना । तं जहा—
आरिया वेगे जाव तेसिं च णं महन्ते एगे राया भवइ जाव सेणावइपुत्ता ।
तेसिं च णं एगइए सट्ठी भवइ, कामं तं समणा य माहणा य
पहारिंसु गमणाए जाव जहा मए एस धम्मे सुयक्खाए सुपन्नत्ते भवइ ।
इह खलु धम्मा पुरिसादिया पुरिसोत्तरिया पुरिसप्पणीया पुरिससंभूया
पुरिसपजोइया पुरिसअभिसमन्नागया पुरिसमेव अभिभूय चिट्ठन्ति । से
जहानामए—गण्डे सिया सरीरे जाए सरीरे संवुट्ठे सरीरे अभिसमन्नागए
सरीरमेव अभिभूय चिट्ठइ, एवमेव धम्मा पुरिसादिया जाव पुरिसमेव
अभिभूय चिट्ठन्ति । से जहानामए—अरई सिया सरीरे जाया सरीरे संवुट्ठा
सरीरे अभिसमन्नागया सरीरमेव अभिभूय चिट्ठइ, एवमेव धम्मा वि
पुरिसादिया जाव पुरिसमेव अभिभूय चिट्ठन्ति । से जहानामए—वम्मिए
सिया पुढविजाए पुढविसंवुट्ठे पुढविअभिसमन्नागए पुढविमेव अभिभूय
चिट्ठइ, पुरिसमेव अभिभूय चिट्ठन्ति । एवमेव धम्मा वि पुरिसादिया जाव
से जहानामए—रुक्खे सिया पुढविजाए पुढविसंवुट्ठे पुढविअभिसमन्नागए
पुढविमेव अभिभूय चिट्ठइ, एवमेव धम्मा वि पुरिसादिया जाव पुरिसमेव
अभिभूय चिट्ठन्ति । से जहानामए—पुस्सरिणी सिया पुढविजाया जाव
पुढविमेव अभिभूय चिट्ठइ, एवमेव धम्मा वि पुरिसादिया जाव पुरिस-
मेव अभिभूय चिट्ठन्ति । से जहानामए—उदगपुक्खले सिया उदगजाए
जाव उदगमेव अभिभूय चिट्ठइ, एवमेव धम्मा वि पुरिसादिया जाव पुरिस-
मेव अभिभूय चिट्ठन्ति । से जहानामए—उदगवुव्वुए सिया उदगजाए जाव
उदगमेव अभिभूय चिट्ठइ, एवमेव धम्मा वि पुरिसादिया जाव पुरिसमेव
अभिभूय चिट्ठन्ति । जं पि य इमं समणाणं निग्गन्थाणं उदिट्ठं षणीयं
वियज्जियं दुवालसङ्गं गणिपिडगं, तं जहा—आयारो खूयगडो जाव दिट्ठि-
वाओ, सच्चमेवं मिच्छा, न एयं तहियं न एयं आहातहियं, इमं सच्चं इमं
तहियं इमं आहातहियं । ते एवं सन्नं कुव्वन्ति, ते एवं सन्नं संठवेन्ति,

ते एवं सन्नं सोवट्ठवन्ति । तमेवं ते तज्जाइयं दुक्खं नाइउट्ठन्ति सउणी पञ्जरं जहा । ते नो एवं विप्पडिवेदेन्ति तं जहा—किरिया इ वा जाव अणिए इ वा, एवामेव ते विरूवरूवेहिं कम्मसमारम्भेहिं विरूवरूवाइं कामभोगाइं समारम्भन्ति भोयणाए । एवामेव ते अणारिया विप्पडिवन्ना एवं सदहभाणा जाव इति ते नो हव्वाए नो पाराए, अन्तरा कामभोगेसु विसण्णे त्ति, तच्चे पुरिसजाए ईसरकाराणिए त्ति आहिए ॥ ११ ॥

अहावरे चउत्थे पुरिसजाए नियइवाइए त्ति आहिज्जइ । इह खलु पाईणं वा ६ तहेव जाव सेणावइयुत्ता वा । तेसिं च णं एगइए सट्ठी भवइ, कामं तं समणा य माहणा य संपहारिंसु गमणाए जाव मए एस धम्मे सुअक्खाए सुपन्नत्ते भवइ । इह खलु दुवे पुरिसा भवन्ति—एगे पुरिसे किरियमाइक्खइ एगे पुरिसे नोकिरियमाइक्खइ । जे य पुरिसे किरियमाइक्खइ जे य पुरिसे नोकिरियमाइक्खइ दो वि ते पुरिसा तुल्ला एगट्ठा कारणमावन्ना । वाले पुण एवं विप्पडिवेदेन्ति कारणमावन्ने—अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा अहमेयमकासि, परो वा जं दुक्खइ वा सोयइ वा जूरइ वा तिप्पइ वा पीडइ वा परितप्पइ वा परो एवमकासि । एवं से वाले सकारणं वा परकारणं वा एवं विप्पडिवेदेन्ति कारणमावन्ने । मेहावी पुण एवं विप्पडिवेदेन्ति कारणमावन्ने—अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा, नो अहं एवमकासि । परो वा जं दुक्खइ वा जाव परितप्पइ वा नो परो एवमकासि, एवं से मेहावी सकारणं वा परकारणं वा एवं विप्पडिवेदेन्ति कारणमावन्ने । से वेमि पाईणं वा ६ जे तसथावरा पाणा ते एवं संघायमागच्छन्ति ते एवं विप्परियासमावज्जन्ति ते एवं विवेगमागच्छन्ति ते एवं विहाणमागच्छन्ति ते एवं संगइयन्ति उवेहाए । नो एवं विप्पडिवेदेन्ति, तं जहा—किरिया इ वा जाव निरए इ वा अनिरए इ वा । एवं ते विरूवरूवेहिं कम्मसमारम्भेहिं विरूवरूवाइं कामभोगाइं समारम्भन्ति भोयणाए । एवमेव ते

अणारिया विप्पडिवन्ना तं सदहमाणा जाव इति ते नो हव्वाए नो पाराए
अन्तरा कामभोगेसु विसण्णा । चउत्थे पुरिसजाए नियइवाइए त्ति आहिए ॥
इच्चे चत्तारि पुरिसजाया नाणापन्ना नाणाछन्दा नाणासीला नाणादिट्ठी
नाणारुई नाणारम्भा नाणाअज्झवसाणसंजुत्ता पहीणपुव्वसंजोगा आरियं
मग्गं असंपत्ता इति ते नो हव्वाए नो पाराए अन्तरा कामभोगेसु
विसण्णा ॥ १२ ॥

से वेमि पाईणं वा ६ सन्तेगइया मणुस्सा भवन्ति । तं जहा—आरिया
वेगे अणारिया वेगे उच्चागोया वेगे नीयागोया वेगे कायमन्ता वेगे
हस्समन्ता वेगे सुवण्णा वेगे दुवण्णा वेगे सुरूवा वेगे दुरूवा वेगे ।
तेसिं च णं जणजाणवयाइं परिग्गहियाइं भवन्ति, तं जहा अप्पयरा
भुज्जयरा वा । तहप्पगारेहिं कुलेहिं आगम्म अभिभूय एगे भिक्खायरि-
याए समुट्ठिया । सओ वा वि एगे नायओ (अणायओ) य उवगरणं च
विप्पजहाय भिक्खायरियाए समुट्ठिया । असओ वा वि एगे नायओ
(अणायओ) य उवगरणं च विप्पजहाय भिक्खायरियाए समुट्ठिया ।
[जे ते सओ वा असओ वा नायओ य अणायओ य उवगरणं च विप्प-
जहाय भिक्खायरियाए समुट्ठिया] पुव्वमेवं तेहिं नायं भवइ । तं जहा—
इह खलु पुरिसे अन्नमन्नं ममट्ठाए एवं विप्पडिवेदेन्ति । तं जहा— खेत्तं
मे वत्थू मे हिरण्णं मे सुवण्णं मे धणं मे धन्नं मे कंसं मे दूसं मे विपुल-
धणकणगरयणमणिशौत्तियसंखसिलप्पवालरत्तरयणसन्तसारसावएयं मे ।
सदा मे रूवा मे गन्धा मे रसा मे फासा मे । एए खलु मे कामभोगा
अहमवि एएसिं । से मेहावी पुव्वामेव अप्पणो एवं समभिजाणेज्जा ।
तं जहा—इह खलु मम अन्नयरे दुक्खे रोगायंके समुप्पजेज्जा अणिट्ठे
अकन्ते अप्पिए असुमे अमणुन्ने अमणामे दुक्खे नो सुहे । से हन्ता भय-
न्तारो कामभोगाइं मम अन्नयरं दुक्खं रोगायंके परियाइयह अणिट्ठं
अकन्तं अप्पियं असुमं अमणुन्नं अमणामं दुक्खं नो सुहं । ता अहं

दुक्खामि वा सोयामि वा जूरामि वा तिप्पामि वा पीडामि वा परित्तिप्पामि वा इमाओ मे अन्नयराओ दुक्खाओ रोगायंकाओ पडिमोयह अणिट्ठाओ अकन्ताओ अप्पियाओ असुभाओ अमगुन्नाओ अमणामाओ दुक्खाओ नो सुहाओ । एवमेव नो लद्धपुच्चं भवइ । इह खलु कामभोगा नो ताणाए वा नो सरणाए वा । पुरिसे वा एगया पुच्चिं कामभोगे विप्पजहइ, कामभोगा वा एगया पुच्चिं पुरिसं विप्पजहन्ति । अन्ने खलु कामभोगा अन्नो अहमंसि । से किमंग पुण वयं अन्नमन्नेहिं कामभोगेहिं मुच्छामो । इति संखाए णं वयं च कामभोगेहिं विप्पजहिस्सामो । से मेहावी जाणेज्जा बहिरङ्गमेयं इणमेव उवणीययरंगं । तं जहा-माया मे पिया मे भाया मे भगिणी मे भज्जा मे पुत्ता मे धूया मे पेसा मे नत्ता मे सुण्हा मे सुहा मे पिया मे सहा मे सयणसंगन्थसंयुया मे । एए खलु मम नायओ अहमवि एएसिं । एवं से मेहावी पुच्चामेव अप्पणा एवं समभिजाणेज्जा । इह खलु मम अन्नयरे दुक्खे रोगायंके समुप्पजेज्जा अणिट्ठे जाव दुक्खे नो सुहे । से हन्ता भयन्तारो नायओ इमं मम अन्नयरं दुक्खं रोगायंकं परियाइयह अणिट्ठं जाव नो सुहं । ता अहं दुक्खामि वा सोयामि वा जाव परित्तिप्पामि वा, इमाओ मे अन्नयराओ दुक्खाओ रोगायंकाओ परिमोएह अणिट्ठाओ जाव नो सुहाओ, एवमेव नो लद्धपुच्चं भवइ । तेसिं वा वि भयन्ताराणं मम नाययाणं अन्नयरे दुक्खे रोगायंके समुप्पजेज्जा अणिट्ठे जाव नो सुहे, से हन्ता अहमेएसिं भयन्ताराणं नाययाणं इमं अन्नयरं दुक्खं रोगायंकं परियाइयामि अणिट्ठं जाव नो सुहे, मा मे दुक्खन्तु वा जाव मा मे परित्तिप्पन्तु वा, इमाओ णं अन्नयराओ दुक्खाओ रोगायंकाओ परिमोएमि अणिट्ठाओ जाव नो सुहाओ, एवमेव नो लद्धपुच्चं भवइ । अन्नस्स दुक्खं अन्नो न परियाइयइ अन्नेण कडं अन्नो नो पडिसंवेदेइ पत्तेयं जायइ पत्तेयं मरइ पत्तेयं चयइ पत्तेयं उववज्जइ पत्तेयं झंझा पत्तेयं सन्ना पत्तेयं मन्ना एवं विन्नु वेयणा । इइ खलु नाइसंजोगा नो ताणाए वा नो सरणाए वा । पुरिसे वा एगया पुच्चिं नाइसंजोगे

विप्पजहइ, नाइसंजोगा वा एगया पुर्वि पुरिसं विप्पजहन्ति, अन्ने खलु नाइसंजोगा अन्नो अहमंसि, से किमंग पुण वयं अन्नमन्नेहिं नाइसंजोगे-हिं मुच्छामो, इति संखाए णं वयं नाइसंजोगं विप्पजहिस्सामो । से मेहावी जाणेज्जा बहिरङ्गमेयं, इणमेव उवणीययरागं । तं जहा-हत्था मे पाया मे वाहा मे उरू मे उयरं मे सीसं मे सीलं मे आऊ मे बलं मे वण्णो मे तथा मे छाया मे सोयं मे चक्खू मे घाणं मे जिब्भा मे फासा मे ममाइज्जइ, वयाउ पडिजूरइ । तं जहा-आउओ बलाओ वण्णाओ तथाओ छायाओ सोयाओ जाव फासाओ । सुसंधिओ संधी विसंधीभवइ, वलियतरंगे गाए भवइ, किण्हा केसा पलिया भवन्ति । तं जहा-जं पि य इमं सरीरगं उरालं आहारोवइयं एयं पि य अणुपुब्बेणं विप्पजहियव्वं भविस्सइ । एयं संखाए से भिक्खू भिक्खवायरियाए समुट्ठिए दुहओ लोगं जाणेज्जा, तं जहा-जीवा चेव अजीवा चेव, तस्सा चेव थावरा चेव ॥१३॥

इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, जे इमे तस्सा थावरा पाणा ते सयं समारभन्ति अन्नेण वि समारम्भावेति अन्नं पि समारभन्तं समणुजाणन्ति । इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, जे इमे कामभोगा सचित्ता वा अचित्ता वा ते सयं परि-गिण्हन्ति अन्नेण वि परिगिण्हावेन्ति अन्नं पि परिगिण्हन्तं समणुजाणन्ति । इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, अहं खलु अणारम्भे अपरिग्गहे, जे खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, एवसिं चेव निस्साए वम्भचेरवासं वसिस्सामो । कस्स णं तं हेउं ? जहा पुव्वं तहा अवरं जहा अवरं तहा पुव्वं, अज्जू एए अणुवरया अणुवट्ठिया पुणरवि तारिसगा चेव । जे खलु गारत्था सारम्भा सपरिग्गहा, सन्ते-गइया समणा माहणा वि सारम्भा सपरिग्गहा, दुहओ पावाइं कुव्वन्ति इति संखाए देहि वि अन्तेहिं अदिस्समाणो इति भिक्खू रीएज्जा । से

वेमि पाईणं वा ६ जाव एवं से परिन्नायकम्मे, एवं से ववेयकम्मे, एवं से विअन्तकारेण भवइ त्ति-मक्खायं ॥ १४ ॥

तत्थ खलु भगवया छज्जीवनिकायहेऊ पन्नत्ता । तं जहा-पुढवीकाए जाव तसकाए । से जहानामए-मम अस्सायं दण्डेण वा अट्ठीण वा मुट्ठीण वा लेल्लण वा कवालेण वा आउट्टिजमाणस्स वा हम्ममाणस्स वा तज्जिजमाणस्स वा ताडिजमाणस्स वा परियाविज्जमाणस्स वा किला-मिज्जमाणस्स वा उद्विज्जमाणस्स वा जाव लोमुक्खणणमायमवि हिंसा-कारगं दुक्खं भयं पडिसंवेदेमि, इच्चेवं जाण सव्वे जीवा सव्वे भूया सव्वे पाणा सव्वे सत्ता दण्डेण वा जाव कवालेण वा आउट्टिजमाणा वा हम्ममाणा वा तज्जिजमाणा वा ताडिजमाणा वा परियाविज्जमाणा वा किलामिज्जमाणा वा उद्विज्जमाणा वा जाव लोमुक्खणणमायमवि हिंसा-कारगं दुक्खं भयं पडिसंवेदेन्ति । एवं नच्चा सव्वे पाणा जाव सत्ता न हन्तव्वा न अज्जावेयव्वा न परिधेयव्वा न परितावेयव्वा न उद्वेयव्वा । से वेमि जे य अईया जे य पडुप्पन्ना जे य आगमिस्सा अरिहन्ता भगवन्ता सव्वे ते एवमाइक्खन्ति एवं भासन्ति एवं पन्नवेन्ति एवं परूवेन्ति सव्वे पाणा जाव सत्ता न हन्तव्वा न परिधेयव्वा न अज्जावेयव्वा न परितावेयव्वा न उद्वेयव्वा । एस धम्मे ध्रुवे नीइए सासए समिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव विरए परिग्गहाओ नो दन्तपक्खालणेणं दन्ते पक्खालेज्जा नो अज्जणं नो वमणं नो ध्रुवणे नो तं परिआविएज्जा ॥ से भिक्खू अकिरिए अल्लसए अकोहे अस्सणे अमाए अलोहे उवसन्ते परिनिव्वुडे नो आसंसं पुरओ करेज्जा इमेण भे दिट्ठेण वा सुएण वा सएण वा विन्नाएण वा इमेण वा सुचरियतव-नियमवम्भचेरवासेण इमेण वा जायामायावुत्तिएणं धम्मेणं इओ चुए पेच्चा देवे सिया कामभोगाण वसवत्ती सिद्धे वा अदुक्खमसुमे एत्थ वि सिया एत्थ वि नो सिया । से भिक्खू सदेहिं अमुच्छिए रूवेहिं अमु-च्छिए गन्धेहिं अमुच्छिए रसेहिं अमुच्छिए फासेहिं अमुच्छिए विरए

कोहाओ माणाओ मायाओ लोभाओ पेजाओ दोसाओ कलहाओ
 अब्भक्खाणाओ पेसुन्नाओ परपरिवायाओ अरइरईओ मायामोसाओ
 मिच्छादंसणसल्लाओ इति से महओ आयाणाओ उवसन्ते उवट्टिए
 पडिविरए से भिक्खू । जे इमे तसथावरा पाणा भवन्ति ते नो सयं
 समारम्भइ नो वन्नेहिं समारम्भावेइ अन्ने समारम्भन्ते वि न समणुजाणइ
 इति से महओ आयाणाओ उवसन्ते उवट्टिए पडिविरए से भिक्खू । जं
 पि य इमं संपराइयं कम्मं किज्जइ, नो तं सयं करेइ नो अन्नाणं कारवेइ
 अन्नं पि करेन्तं न समणुजाणइ, इति से महओ आयाणाओ उवसन्ते
 उवट्टिए पडिविरए । से भिक्खू जाणेज्जा असणं वा ४ अरिंस पडियाए
 एगं साहम्मियं समुदिरस पाणाइं भूयाइं जीवाइं सत्ताइं समारम्भ समुदिरस
 कीयं पाभिचं अच्छिज्जं अनिसट्ठं अभिहडं आहट्टुदेसियं तं चेइयं सिया
 तं (अप्पणो पुत्ताइणट्टाए जाव आएसाए पुढो पहेणाए सामासाए
 पायरासाए संनिहिसंनिचओ किज्जइ इह एएसिं माणवाणं भोयणाए)
 नो सयं भुज्जइ नो अन्नेणं भुज्जावेइ अन्नं पि भुज्जन्तं न समणुजाणइ, इति
 से महओ आयाणाओ उवसन्ते उवट्टिए पडिविरए । तत्थ भिक्खू परकडं
 परनिट्ठियमुग्गमुप्पायणेसणासुद्धं सत्थाइयं सत्थपरिणामियं अविहिंसियं
 एसियं वेसियं सामुदाणियं पत्तमसणं कारणट्टा पमाणजुत्तं अक्खोव-
 ज्जणवणलेवणभूयं संजमजायामायावत्तियं विलमिव पन्नगभूएणं अप्पाणेणं
 आहारं आहारेज्जा अन्नं अन्नकाले पाणं पाणकाले वत्थं वत्थकाले लेणं
 लेणकाले सयणं सयणकाले । से भिक्खू मायन्ने अन्नयरं दिसं अणुदिसं
 वा पडिवन्ने धम्मं आइक्खे विमए किट्ठे उवट्टिएसु वा अणुवट्टिएसु
 वा सुस्ससमाणेसु पवेयए, सन्तिविरइं उवसमं निव्वाणं सोयवियं
 अज्जवियं मद्दवियं लाघवियं अणइवाइयं सच्चोसिं पाणाणं सच्चोसिं भूयाणं
 जाव सत्ताणं अणुवाइं किट्ठए धम्मं । से भिक्खू धम्मं किट्ठमाणे नो
 अन्नस्स हेउं धम्ममाइक्खेज्जा, नो पाणस्स हेउं धम्ममाइक्खेज्जा, नो
 वत्थस्स हेउं धम्ममाइक्खेज्जा, नो लेणस्स हेउं धम्ममाइक्खेज्जा, नो

सयणस्स हेउं धम्ममाइक्खेज्जा, नो अब्भेसिं विरूवरूवाणं कामभागोणं हेउं धम्ममाइक्खेज्जा, अगिलाए धम्ममाइक्खेज्जा, नन्नत्थ कम्मनिज्जर-
ट्टाए धम्ममाइक्खेज्जा । इह खलु तस्स भिक्खुस्स अन्तिए धम्मं सोच्चा निसम्म उट्ठाणेणं उट्ठाय वीरा अस्सिं धम्मे समुट्ठिया । जे तस्स भिक्खुस्स अन्तिए धम्मं सोच्चा निसम्म सम्मं उट्ठाणेण उट्ठाय वीरा अस्सिं धम्मे समुट्ठिया ते एवं सव्वोवगया ते एवं सव्वोवरया ते एवं सव्वोवसन्ता ते एवं सव्वत्ताए परिणिव्वुड त्ति वेमि । एवं से भिक्खू धम्मट्ठी धम्म-
विऊ नियागपडिवन्ने से जहेयं बुइयं अदुवा पत्ते पउमवरपोण्डरीयं अदुवा अपत्ते पउमवरपोण्डरीयं, एवं से भिक्खू परिन्नायकम्मे परिन्नाय-
संगे परिन्नायगेहवासे उवसन्ते समिए सहिए सयाजए । सेवं वयणिजे तं जहा-समणे त्ति वा माहणे त्ति वा खन्ते त्ति वा दन्ते त्ति वा गुत्ते त्ति वा मुत्ते त्ति वा इसि त्ति वा मुणि त्ति वा कइ त्ति वा विउ त्ति वा भिक्खु त्ति वा ल्हे त्ति वा तीरट्ठि त्ति वा चरणकरणपाराविउ त्ति वेमि ॥ १५ ॥

पोण्डरियज्झयणं पढमं

किरियाठाणज्झयणे विइये

2. 2.

सुयं मे आउसं तेणं भगवया एवमक्खायं । इह खलु किरियाठाणे नामज्झयणे पन्नत्ते, तस्स णं अयमट्ठे । इह खलु संजृहेणं दुवे ठाणे एवमाहिज्जन्ति । तं जहा । धम्मे चेव अधम्मे चेव उवसन्ते चेव अणुव-
सन्ते चेव । तत्थ णं जे से पढमस्स ठाणस्स अहम्मपक्खस्स विभज्जे तस्स णं अयमट्ठे पन्नत्ते । इह खलु पार्इणं वा ६ सन्तेगइया मणुस्सा भवन्ति । तं जहा-आरिया वेगे अणारिया वेगे उच्चागोया वेगे नीया-
गोया वेगे कायमन्ता वेगे हस्समन्ता वेगे सुवण्णा वेगे दुव्वण्णा वेगे मुरूवा वेगे दुरूवा वेगे । तेसिं च णं इमं एयारूवं दण्डसमादाणं

संवेहाए । तं जहा-नेरइएसु वा तिरिक्खजोणिएसु वा मणुस्सेसु वा देवेसु वा जे यावन्ने तहप्पगारा पाणा विन्नू वेयणं वेयन्ति ॥ तेसिं पि य णं इमाइं तेरस्स किरियाठाणाइं भवन्तीतिमक्खायं । तं जहा-अट्टादण्डे १, अणट्टादण्डे २, हिंसादण्डे ३, अकम्हादण्डे ४, दिट्ठिविपरियासिया-दण्डे ५, मोसवत्तिए ६, अदिन्नादाणवत्तिए ७, अज्झत्थवत्तिए ८, माणवत्तिए ९, मित्तदोसवत्तिए १०, मायावत्तिए ११, लोभवत्तिए १२, इरियावहिण १३ ॥ १ ॥

पढमे दण्डसमादाणे अट्टादण्डवत्तिए ति आहिज्जइ । से जहा-नामए-केइ पुरिसे आयहेउं वा नाइहेउं वा अगारहेउं वा परिवारहेउं वा मित्तहेउं वा नागहेउं वा भूयहेउं वा जक्खहेउं वा तं दण्डं तसथावरेहिं पाणेहिं सयमेव निसिरइ अन्नेण वि निसिरावेइ अन्नं पि निसिरन्तं समणुयाणइ, एवं खलु तस्स तप्पत्तियं सावज्जं ति आहिज्जइ । पढमे दण्डसमादाणे अट्टादण्डवत्तिए ति आहिण ॥ २ ॥

अहावरे दोब्बे दण्डसमादाणे अणट्टादण्डवत्तिए ति आहिज्जइ । से जहानामए-केइ पुरिसे जे इमे तसा पाणा भवन्ति ते नो अच्चाए नो अजिणाए नो मंसाए नो सोणियाए एवं हिययाए पिताए वसाए पिच्छाए पुच्छाए वालाए सिंगाए विसाणाए दन्ताए दाढाए नहाए ष्हासुणिए अट्ठीए अट्ठिमज्जाए नो हिंसिसु मे ति नो हिंसन्ति मे ति नो हिंसिस्सन्ति मे ति नो पुत्तपोसणाए नो पसुपोसणाए नो अगार-परिवृहणयाए नो समणमाहणवत्तणाहेउं नो तस्स सरीरगस्स किंचि विपरियाइत्ता भवन्ति । से हन्ता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं वाले वेरस्स आभागी भवइ अणट्टादण्डे । से जहा-नामए केइ पुरिसे जे इमे थावरा पाणा भवन्ति । तं जहा-इक्कडा इ वा कडिणा इ वा जन्तुगा इ वा परगा इ वा मोक्खा इ वा तणा इ वा कुसा इ वा कुच्छगा इ वा पव्वगा इ वा पलाला इ वा, ते नो पुत्तपोस-

णाए नो पसुपोसणाए नो अगारपरिवूहणयाए नो समणमाहणपोसणयाए
नो तस्स सरीरगस्स किंचि विपरियाइत्ताः भवन्ति । से हन्ता छेत्ता भेत्ता
लुम्पइत्ता विलुम्पइत्ता उद्वइत्ता उज्झिउं वाले वेरस्स आभागी भवइ
अणट्ठादण्डे ॥ से जहानामए केइ पुरिसे कच्छंसि वा दहंसि वा उद-
गंसि वा दवियंसि वा वलयंसि वा नूसंसि वा गहणंसि वा गहण-
विदुग्गंसि वा वणंसि वा वणविदुग्गंसि वा पव्वयंसि वा पव्वयविदुग्गंसि
वा तणाइं ऊसविय ऊपविय सयमेव अगणिकायं निसिरइ अन्नेण वि
अगणिकायं निसिरावेइ अन्नं पि अगणिकायं निसिरन्तं समणुजाणइ
अणट्ठादण्डे । एवं खलु तस्स तप्पत्तियं सावज्जं ति आहिज्जइ । दोचे
दण्डसमादाणे अणट्ठादण्डवत्तिए ति आहिए ॥ ३ ॥

अहावरे तच्चे दण्डसमादाणे हिंसादण्डवत्तिए ति आहिज्जइ । से
जहानामए—केइ पुरिसे भमं वा भमिं वा अन्नं वा अन्निं वा हिंसिं
वा हिंसइ वा हिंसिस्सइ वा तं दण्डं तसथावरेहिं पाणेहिं सयमेव निसि-
रइ अन्नेण वि निसिरावेइ अन्नं पि निसिरन्तं समणुजाणइ हिंसादण्डे,
एवं खलु तस्स तप्पत्तियं सावज्जं ति आहिज्जइ । तच्चे दण्डसमादाणे
हिंसादण्डवत्तिए ति आहिए ॥ ४ ॥

अहावरे चउत्थे दण्डसमादाणे अकम्हादण्डवत्तिए ति आहि-
ज्जइ । से जहानामए—केइ पुरिसे कच्छंसि वा जाव वणविदुग्गंसि वा
भियवत्तिए भियसंकप्थे भियपणिहाणे भियवहाए गन्ता एए भिय ति
काउं अन्नयरस्स भियस्स वहाए उरुं आयामेत्ता णं निसिरेज्जा, स
भियं वहिस्सामि ति कटु तित्तिरं वा वट्ठगं वा चडगं वा लावगं वा
कवोयगं वा कविं वा कविजलं वा विन्धित्ता भवइ, इह खलु से अन्नस्स
अट्ठाए अन्नं फुसइ अकम्हादण्डे । से जहानामए केइ पुरिसे सालीणि
वा वीहीणि वा कोदवाणि वा कंगूणि वा परगाणि वा रालाणि वा
निलिज्जमाणे अन्नयरस्स तणस्स वहाए सत्थं निसिरेज्जा, से सामगं

तणं कुमुदुगं वीहीऊसियं कलेसुयं तणं छिन्दिस्साभि ति कडु सालिं
वा वीहिं वा कोदवं वा कंणुं वा परणं वा रालयं वा छिन्दिता भवइ । इति
खलु से अन्नस्स अट्ठाए अन्नं फुसइ अकम्हादण्डे । एवं खलु तस्स तप्प-
त्तियं सावज्जं आहिज्जइ । चउत्थे दण्डसमादाणे अकम्हादण्डवत्तिए
आहिए ॥ ५ ॥

अहावरे पञ्चमे दण्डसमादाणे दिट्ठिविपरियासियादण्डवत्तिए ति
आहिज्जइ । से जहानामए—केइ पुरिसे भाईहिं वा पिईहिं वा भाईहिं
वा भगिणीहिं वा भज्जाहिं वा पुत्तेहिं वा धूयाहिं वा सुण्हाहिं वा सद्धिं
संवसमाणे भित्तं अमित्तमेव मन्नमाणे भित्ते हयपुब्बे भवइ दिट्ठिविपरि-
यासियादण्डे । से जहानामए—केइ पुरिसे गामघायंसि वा नगरघायंसि
वा खेडघायंसि कव्वडघायंसि मडंबघायंसि वा दोगमुहघायंसि वा पट्टण-
घायंसि वा आसमघायंसि वा संनिवेसघायंसि वा निग्गमघायंसि वा
रायहाणिघायंसि वा अतेणं तेणमिति मन्नमाणे अतेणं हयपुब्बे भवइ
दिट्ठिविपरियासियादण्डे । एवं खलु तस्स तप्पत्तियं सावज्जं ति आहि-
ज्जइ । पञ्चमे दण्डसमादाणे दिट्ठिविपरियासियादण्डवत्तिए ति आहिए ॥ ६ ॥

अहावरे छठे किरियट्ठाणे मोसावत्तिए ति आहिज्जइ । से जहा-
नामए—केइ पुरिसे आयहेउं वा नाइहेउं वा अगारहेउं वा परिवारहेउं
वा सयमेव मुसं वयइ मुसं वयन्तं पि अन्नं समणुजाणइ, एवं खलु तस्स
तप्पत्तियं सावज्जं ति आहिज्जइ । छठे किरियट्ठाणे मोसावत्तिए ति
आहिए ॥ ७ ॥

अहावरे सत्तमे किरियट्ठाणे अदिन्नादाणवत्तिए ति आहिज्जइ ।
से जहानामए—केइ पुरिसे आयहेउं वा जाव परिवारहेउं वा सयमेव
अदिन्नं आदियइ अन्नेणं वि अदिन्नं आदियावइ अदिन्नं आदियन्तं अन्नं
समणुजाणइ, एवं खलु तस्स तप्पत्तियं सावज्जं ति आहिज्जइ । सत्तमे
किरियट्ठाणे अदिन्नादाणवत्तिए ति आहिए ॥ ८ ॥

अहावरे अट्टमे किरियट्टाणे अज्झत्थवत्तिए त्ति आहिज्जइ । से जहानामए—केइ पुरिसे नत्थि णं केइ. किंचि विसंवादेइ सयमेव हीणे दीणे दुट्ठे दुम्मणे ओहयमणसंकप्पे चिन्तासोगसागरसंपविट्ठे करयल-पल्हत्थमुहे अट्टज्जाणोवगए भूमिगयदिट्ठिए झियाइ, तस्स णं अज्झत्थया आसंसइया चत्तारि ठाणा एवमाहिज्जन्ति । तं जहा—कोहे माणे माया लोहे । अज्झत्थमेव कोहमाणमायालोहे । एवं खलु तस्स तप्प-त्तियं सावज्जं ति आहिज्जइ । अट्टमे किरियट्टाणे अज्झत्थवत्तिए त्ति आहिए ॥ ९ ॥

अहावरे नवमे किरियट्टाणे माणवत्तिए त्ति आहिज्जइ । से जहा-नामए—केइ पुरिसे जाइमएण वा कुलमएण वा बलमएण वा रूवमएण वा तवमएण वा सुयमएण वा लाभमएण वा इस्सरियमएण वा पन्ना-मएण वा अन्नयरेण वा मयट्टाणेणं मत्ते समाणे परं हीलेइ निन्देइ खिसइ गरहइ परिभवइ अवमन्नेइ, इत्तरिए अयं, अहमंसि पुण विसिट्ठ-जाइकुलबलाइगुणोववेए । एवं अप्पाणं समुक्कस्से, देहचुए कम्मविइए अवसे पयाइ । तं जहा—गब्भाओ गब्भं ४ जम्माओ जम्मं माराओ मारं नरगाओ नरगं चण्डे थट्ठे चवले माणी यावि भवइ । एवं खलु तस्स तप्पत्तियं सावज्जं ति आहिज्जइ । नवमे किरियट्टाणे माणवत्तिए त्ति आहिए ॥ १० ॥

अहावरे दसमे किरियट्टाणे भित्तदोसवत्तिए त्ति आहिज्जइ । से जहानामए—केइ पुरिसे माईहिं वा पिईहिं वा भाईहिं वा भइणीहिं वा भज्जाहिं वा धूयाहिं वा पुत्तेहिं वा सुण्हाहिं वा सट्ठिं संवसमाणे तेसिं अन्नयरंसि अहालहुगंसि अवराहंसि सयमेव गरुयं दण्डं निवत्तेइ । तं जहा—सीओ-दगवियडंसि वा कायं उच्छोलित्ता भवइ, उप्पिणोदगवियडेण वा कायं ओसिञ्चित्ता भवइ, अगणिकायेणं कायं उवडहित्ता भवइ, जोत्तेण वा वेत्तेण वा नेत्तेण वा तयाइ वा [कण्णेण वा छियाए वा] लयाए वा

(अन्नयेणे वा दवरणे) पासाई उदालिता भवइ, दण्डेण वा अट्ठीण वा मुट्ठीण वा लेट्ठण वा कवालेण वा कायं आउट्ठिता भवइ । तह-
प्पगारे पुरिसजाए संवसमाणे दुम्मणा भवइ, पवसमाणे सुमणा भवइ,
तहप्पगारे पुरिसजाए दण्डपासी दण्डगुरुए दण्डपुरकडे अहिए इमंसि
लोगंसि अहिए परंसि लोगंसि संजलणे कोहणे पिट्ठिमंसी यावि भवइ ।
एवं खलु तस्स तप्पत्तिं सावजं ति आहिजइ । दसमे किरियट्ठाणे
मित्तदोसवत्तिए ति आहिए ॥ ११ ॥

अहावरे एकारसमे किरियट्ठाणे मायावत्तिए ति आहिजइ । जे इमे
भवन्ति—गूढायारा तमोकसिया उडुगपत्तलहुया पव्वयगुरुया ते आ-
रिया वि सन्ता अणारियाओ भासाओ वि पउज्जन्ति, अन्नहासन्तं
अप्पाणं अन्नहा भन्नन्ति, अन्नं पुट्ठा अन्नं वागरन्ति, अन्नं आइक्खि-
यव्वं अन्नं आइक्खन्ति । से जहानामए केइ पुरिसे अन्तोसल्ले तं सल्लं
नो सयं निहरइ नो अन्नेण निहरावेइ नो पडिविद्वंसेइ, एवमेव निण्ह-
वेइ, अविउट्ठमाणे अन्तोअन्तो रियइ, एवमेव माई मायं कट्ठु नो आलो-
एइ नो पडिकमेइ नो निन्दइ नो गरहइ नो विउट्ठइ नो विसोहेइ
नो अकरणाए अब्भुट्ठेइ नो अहारिहं तवोकम्मं पायच्छित्तं पडिवज्जइ,
माई अस्सि लोए पच्चायाइ माई परंसि लोए पुणो पुणो पच्चायाइ निन्दइ
गरहइ पसंसइ निच्चरइ न नियट्ठइ निसिरियं दण्डं छाएइ, माई असमा-
हडसुहलेस्से यावि भवइ । एवं खलु तस्स तप्पत्तिं सावजं ति
आहिजइ । एकारसमे किरियट्ठाणे मायावत्तिए ति आहिए ॥ १२ ॥

अहावरे बारसमे किरियट्ठाणे लोभवत्तिए ति आहिजइ । जे इमे
भवन्ति, तं जहा—आरणिंया आवसहिंया गामन्तिंया कण्हुईरहस्सिया
नो बहुसंजया नो बहुपडिविरया सव्वपाणभूयजीवसत्तेहिं ते अप्पणो
सच्चा मोसाई एवं विउज्जन्ति । अहं न हन्तव्वो अन्ने हन्तव्वा, अहं न
अज्जावेयव्वो अन्ने अज्जावेयव्वा, अहं न परिधेयव्वो अन्ने परिधेयव्वा,

अहं न परितवेयव्वो, अन्ने परितवेयव्वा, अहं न उदवेयव्वो अन्ने उदवे-
यव्वा, एवमेव ते इत्थिकामेहिं मुच्छिया गिद्धा गटिया गरहिया अज्जोववन्ना
जाव वासाइं चउपञ्चमाइं छदसमाइं अप्पयरो वा भुज्जयरो वा भुज्जित्तु
भोगभोगाइं कालमासे कालं किच्चा अन्नयरेसु आसुरिएसु किब्बिसिएसु
ठाणेसु उववत्तारो भवन्ति । तओ विप्पमुच्चमाणे भुज्जो भुज्जो एलमूय-
त्ताए तमूयत्ताए जाइमूयत्ताए पच्चायन्ति । एवं खलु तस्स तप्पत्तियं
सावज्जं ति आहिज्जइ । दुवालसमे किरियट्टाणे लोभवत्तिए त्ति
आहिए । इच्चेयाइं दुवालस किरियट्टाणाइं दविएणं समणेण वा माह-
णेण वा सम्मं सुपरिजाणियव्वाइं भवन्ति ॥ १३ ॥

अहावरे तेरसमे किरियट्टाणे इरियावहिए त्ति आहिज्जइ । इह खलु
अत्तत्ताए संबुडस्स अणगारस्स ईरियासमियस्स भासासमियस्स एसणा-
समियस्स आयाणभण्डमत्तनिक्खेवणासमियस्स उच्चारपासवणखेल-
सिंघाणजल्लपारिट्ठावणियासमियस्स मणसमियस्स वयसमियस्स काय-
समियस्स मणगुत्तस्स वयगुत्तस्स कायगुत्तस्स गुत्तिन्दियस्स गुत्त-
वम्भयारिस्स आउत्तं गच्छमाणस्स आउत्तं चिट्ठमाणस्स आउत्तं निसीय-
माणस्स आउत्तं तुयट्ठमाणस्स आउत्तं भुज्जमाणस्स आउत्तं भासमाण-
स्स आउत्तं वत्थं पडिग्गहं कम्बलं पायपुञ्छणं गिण्हमाणस्स वा
निक्खिखमाणस्स वा जाव चक्खुपम्हनिवायमवि अत्थि विमाया सुहुमा
किरिया ईरियावहिया नाम कज्जइ । सा पढमसमए बद्धा पुट्ठा विईय-
समए वेइया तइयसमए निज्जिण्णा सा बद्धा पुट्ठा उदीरिया वेइया
निज्जिण्णा सेयकाले अकम्मे यावि भवइ । एवं खलु तस्स तप्पत्तियं
सावज्जं ति आहिज्जइ, तेरसमे किरियट्टाणे ईरियावहिए त्ति आहिज्जइ ।
से वेमि जे य अईया जे य पडुपन्ना जे य आगमिस्सा अरिहन्ता भग-
वन्ता सव्वे ते एयाइं चेव तेरस्स किरियट्टाणाइं भासिंसु वा भासेन्ति
वा भासेस्सन्ति वा पन्नविंसु वा पन्नवेन्ति वा पन्नविस्सन्ति वा, एवं
चेव तेरस्समं किरियट्टाणं सेविंसु वा सेवन्ति वा सेविस्सन्ति वा ॥ १४ ॥

अदुत्तरं च णं पुरिसविजयं विभङ्गमाइन्निस्सामि । इह खलु
 नाणापन्नाणं नागालन्दाणं नागासीलाणं नागादिट्ठीणं नाणारूढिणं
 नाणाग्ग्भाणं नाणज्झवसाणसंजुत्ताणं नागाविहपावसुयज्झयणं एवं
 भवइ । तं जहा—भोमं उप्पायं सुविणं अन्तलिक्खं अङ्गं सरं लक्खणं
 वज्झणं इत्थिलक्खणं पुरिसलक्खणं हयलक्खणं गयलक्खणं गोण-
 लक्खणं सेण्ढलक्खणं कुक्कुडलक्खणं तित्तिरलक्खणं वट्ठगलक्खणं
 लावयलक्खणं चकलक्खणं लत्तलक्खणं चम्मलक्खणं दण्डलक्खणं
 अमिलक्खणं मणिलक्खणं कागिणिलक्खणं सुभगाकरं दुब्भगाकरं
 गम्भाकरं मोहगकरं आहव्वणिं पागसासाणिं दव्वहोमं खत्तिथविज्जं
 चन्दचरियं सरचरियं सुक्कचरियं बहस्सइचरियं उक्कापायं दिसादाहं
 मियचकं वायमपरिमण्डलं पंमुवुट्ठिं केसवुट्ठिं मंसवुट्ठिं रुहिरवुट्ठिं वेयालिं
 अद्रवेयालिं ओसोवणिं तालुग्घाडणिं सोवाणिं सोवारिं दामिलिं कालिङ्गिं
 गोणिं गन्धाणिं ओवयणिं उप्पयणिं जम्भणिं थम्मणिं लेसणिं आमय-
 करणिं विमल्लकगणिं पक्कसणिं अन्तद्वाणिं आयामेणिं, एवमाइयाओ
 विज्जाओ अन्नस्स हेउं पउज्जन्ति पाणस्स हेउं पउज्जन्ति वत्थस्स हेउं
 पउज्जन्ति लेणस्स हेउं पउज्जन्ति मयणस्स हेउं पउज्जन्ति, अन्नेमिं वा
 विरूवरूवाणं कामभोगाणं हेउं पउज्जन्ति । तिरिच्छं ते विज्जं सेवन्ति, ते
 अणारिया विप्पडिवन्ना कालमासे कालं किच्चा अन्नयराइं आसुरियाइं
 किच्चिसयाइं ठाणाइं उव्वत्तारे भवन्ति । तओ वि विप्पमुच्चमाणा
 भुज्जा एलसूययाए तमअन्धयाए पचायन्ति ॥ १५ ॥

से एगइओ आयहेउं वा नायहेउं वा सयणहेउं वा अगारहेउं वा
 परिवारेहेउं वा नायगं वा सहवासियं वा निस्साए अदुवा अणुगामिए १
 अदुवा उव्वचए २ अदुवा पडिपहिए ३ अदुवा संधिच्छेयए ४
 अदुवा गण्ठिच्छेयए ५ अदुवा उरब्भिए ६ अदुवा सोवरिए ७
 अदुवा वागुरिए ८ अदुवा साउणिए ९ अदुवा मच्छिए १०
 अदुवा गोवायए ११ अदुवा गोवालए १२ अदुवा सोवणिए १३

अदुवा सविणयान्तए १४ । एगइओ आणुगामियभावं पडिसंधाय तमेव
 अणुगामियाणुगामियं हन्ता छेत्ता भेत्ता लुम्पइत्ता विलुम्पइत्ता उद्वइत्ता
 आहारं आहारेइ, इति से महया पावेहिं कम्मेहिं अत्ताणं उवक्खा-
 इत्ता भवइ । से एगइओ उवचरयभावं पडिसंधाय तमेव उवचरियं
 हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ ।
 इति से पावेहिं कम्मेहिं अत्ताणं उवक्खाइत्ता भवइ । से एगइओ
 पाडिपहियभावं पडिसंधाय तमेव पडिपहे ठिच्चा हन्ता छेत्ता भेत्ता लुम्प-
 इत्ता विलुम्पइत्ता उद्वइत्ता आहारं आहारेइ, इति से महया पावेहिं
 कम्मेहिं अत्ताणं उवक्खाइत्ता भवइ । से एगइओ संधिच्छेदगभावं पडिसं-
 धाय तमेव संधिं छेत्ता भेत्ता जाव इति से महया पावेहिं कम्मेहिं अत्ताणं
 उवक्खाइत्ता भवइ । से एगइओ गण्ठिच्छेदगभावं पडिसंधाय तमेव
 गण्ठिं छेत्ता भेत्ता जाव इति से महया पावेहिं कम्मेहिं अत्ताणं उवक्खा-
 इत्ता भवइ । से एगइओ उरब्भियभावं पडिसंधाय उरब्भं वा अन्नयरं वा
 तसं पाणं हन्ता जाव उवक्खाइत्ता भवइ । (एसो अभिलावो सव्वत्थ)
 से एगइओ सोयरियभावं पडिसंधाय महिसं वा अन्नयरं वा तसं पाणं
 हन्ता जाव उवक्खाइत्ता भवइ । से एगइओ वागुरियभावं पडिसंधाय मियं
 वा अन्नयरं वा तसं पाणं हन्ता जाव उवक्खाइत्ता भवइ । से एगइओ सउ-
 णियभावं पडिसंधाय सउणिं वा अन्नयरं वा तसं पाणं हन्ता जाव उव-
 क्खाइत्ता भवइ । से एगइओ मच्छियभावं पडिसंधाय मच्छं वा अन्न-
 यरं वा तसं पाणं हन्ता जाव उवक्खाइत्ता भवइ । से एगइओ गोघाय-
 भावं पडिसंधाय तमेव गोणं वा अन्नयरं वा तसं पाणं हन्ता जाव उव-
 क्खाइत्ता भवइ । से एगइओ गोवालभावं पडिसंधाय तमेव गोवालं
 वा परिजविय परिजविय हन्ता जाव उवक्खाइत्ता भवइ । से एगइओ
 सोवणियभावं पडिसंधाय तमेव सुणगं वा अन्नयरं वा तसं पाणं हन्ता
 जाव उवक्खाइत्ता भवइ । से एगइओ सोवणियन्तियभावं पडिसंधाय
 तमेव मणुस्सं वा अन्नयरं वा तसं पाणं हन्ता जाव आहारं आहारेइ

इति से महया पावेहिं कम्मेहिं अत्ताणं उवक्खाइत्ता भवइ ॥ १६ ॥

से एगइओ परिसामज्झाओ उट्ठित्ता अहमेयं हणामि त्ति कटु
 तित्तिरं वा वट्ठगं वा लावगं वा कवोयगं वा कविञ्जलं वा अन्नयरं वा
 तसं वा पाणं हन्ता जाव उवक्खाइत्ता भवइ । से एगइओ केणइ आया-
 णेणं विरुद्धे समाणे अदुवा खलदाणेणं अदुवा सुराथालएणं गाहावईण
 वा गाहावइपुत्ताण वा सयमेव अगणिकाएणं सस्साइं ज्ञामेइ अन्नेण वि
 अगणिकाएणं सस्साइं ज्ञामावेइ अगणिकाएणं सस्साइं ज्ञामन्तं पि अन्नं
 समणुजाणइ, इति से महया पावक्कम्मेहिं अत्ताणं उवक्खाइत्ता भवइ ।
 से एगइओ केणइ आयाणेणं विरुद्धे समाणे अदुवा खलदाणेणं अदुवा
 सुराथालएणं गाहावईण वा गाहावइपुत्ताण वा उट्ठाण वा गोणाण वा
 धोडगाण वा गद्दमाण वा सयमेव घूराओ कप्पेइ अन्नेण वि कप्पवेइ
 कप्पन्तं पि अन्नं समणुजाणइ, इति से महया जाव भवइ । से एगइओ
 केणइ आयाणेणं विरुद्धे समाणे अदुवा खलदाणेणं अदुवा सुराथालएणं
 गाहावईण वा गाहावइपुत्ताण वा उट्ठसालाओ वा गोगसालाओ वा
 धोडगसालाओ वा गद्दमसालाओ वा कण्टकवोंदियाए पडिपेहिता सय-
 मेव अगणिकाएणं ज्ञामेइ अन्नेण वि ज्ञामावेइ ज्ञामन्तं पि अन्नं समणु-
 जाणइ, इति से महया जाव भवइ । से एगइओ केणइ आयाणेणं विरुद्धे
 समाणे अदुवा खलदाणेणं अदुवा सुराथालएणं गाहावईण वा गाहावइ-
 पुत्ताण वा कुण्डलं वा मणिं वा मोत्तियं वा सयमेव अवहरइ अन्नेण वि
 अवहरावेइ अवहरन्तं पि अन्नं समणुजाणइ इति से महया जाव भवइ ॥
 से एगइओ केणइ वि आयाणेणं विरुद्धे समाणे अदुवा खलदाणेणं
 अदुवा सुराथालएणं समणाण वा माहणाण वा छत्तगं वा दण्डगं वा
 भण्डगं वा मत्तगं वा लट्ठिं वा भिसिगं वा चेलगं वा चिलिमिलिगं वा
 चम्मय वा छेयणगं वा चम्मकोसियं वा सयमेव अवहरइ जाव समणु-
 जाणइ, इति से महया जाव उवक्खाइत्ता भवइ ॥ से एगइओ नो विति-
 गिञ्छइ । तं जहा—गाहावईण वा गाहावइपुत्ताण वा सयमेव अगणिकाएणं

ओसहीओ झामेइ जाव अन्नं पि झामन्तं समणुजाणइ, इति से महया जाव उवक्खाइत्ता भवइ । से एगइओ नो वितिगिञ्छइ, तं जहा—गाहावईण वा गाहावइपुत्ताण वा उट्टाण वा गोणाण वा घोडगाण वा गद्भाण वा सयमेव घूराओ कप्पेइ अन्नेण वि कप्पावेइ अन्नं पि कप्पन्त समणुजाणइ । से एगइओ नो वितिगिञ्छइ, तं जहा—गाहावईण वा गाहावइपुत्ताण वा उट्टसालाओ वा जाव गद्भसालाओ वा कण्टकवोदि-याहिं पडिपेहिता सयमेव अगणिकाएणं झामेइ जाव समणुजाणइ । से एगइओ नो वितिगिञ्छइ, तं जहा—गाहावईण वा गाहावइपुत्ताण वा जाव मोत्तियं वा सयमेव अवहरइ जाव समणुजाणइ । से एगइओ नो वितिगिञ्छइ तं जहा—समणाण वा माहणाण वा छत्तगं वा दण्डगं वा जाव चम्मछेयणगं वा सयमेव अवहरइ जाव समणुजाणइ । इति से महया जाव उवक्खाइत्ता भवइ । से एगइओ समणं वा माहणं वा दिस्सा नाणाविहेहिं पावकम्महेहिं अत्ताणं उवक्खाइत्ता भवइ, अदुवा णं अच्छराए आफालित्ता भवइ, अदुवा णं फरुसं वदिता भवइ, कालेण वि से अणुपविट्ठस्स असणं वा पाणं वा जाव नो दवावेत्ता भवइ, जे इमे भवन्ति वोणमन्ता भारकन्ता अलसगा वसलगा किवणगा समणगा पव्वयन्ति ते इणमेव जीवियं धिज्जीवियं संपडिवूहेन्ति, नाइ ते परलोगस्स अट्ठाए किंचि वि सिलीसन्ति, ते दुक्खन्ति ते सोयन्ति ते जूरन्ति ते तिप्पन्ति ते पिट्ठन्ति ते परित्तिप्पन्ति ते दुक्खणजूरणसोयणतिप्पण-पिट्ठणपरित्तिप्पणवहवन्धणपरिकिलेसाओ अप्पडिविरया भवन्ति । ते महया आरम्भेण ते महया समारम्भेण ते महया आरम्भसमारम्भेण विरूव-रूवेहिं पावकम्मकिचेहिं उरालाई माणुस्सगाई भोगभोगाई भुज्जित्तारो भवन्ति । तं जहा—अन्नं अन्नकाले पाणं पाणकाले वत्थं वत्थकाले लेणं लेणकाले सयणं सयणकाले सपुच्चावरं च णं ण्हाए कयबलिकम्मे कय-कोउयमङ्गलपायच्छित्ते सिरसा ण्हाए कण्ठेमालाकडे आविद्धमणिसुवण्णे कप्पियमालामउली पडिबद्धसरीरे वग्घारियसोणिसुत्तगमल्लदामकलावे

अहयवत्थपरिहिए चन्दणोविखत्तगायसरीरे महइमहालियाए कूडागार-
 सालाए महइमहालयंमि सीहासणंसि इत्थीगुम्मसंपरिकडे सच्चराइएणं
 जोइणा झियायमाणेणं महयाहयनडुगीयवाइयतन्तीतलतालतुडियघण-
 मुइंगपडुप्पवाइयखेणं उरालाई माणुस्सगाई भोगभोगाई भुज्जमाणे विह-
 रइ । तस्स णं एगमवि आणवेमाणरस जाव चत्तारि पञ्च जणा अवुत्ता
 चेव अब्भुट्टन्ति । भणह देवाणुप्पिया किं करेमो ? किं आहरेमो ? किं
 उवणेमो ? किं आचिट्टामो ? किं भे हियं इच्छियं ? किं भे आसगस्स
 सयइ ? तमेव पासित्ता अणारिया एवं वयन्ति—देवे खलु अयं पुरिसे,
 देवसिणाए खलु अयं पुरिसे, देवजीवणिज्जे खलु अयं पुरिसे, अन्ने वि
 य णं उवजीवन्ति । तमेव पासित्ता आरिया वयन्ति—अभिकन्तकूरकम्मे
 खलु अयं पुरिसे अइधुए अइयायरक्खे दाहिणगामिए नेरइए कण्ह-
 पक्खिए आगमिस्साणं दुल्लहवोहियाए यावि भविस्सइ । इच्चैयस्स ठाणस्स
 उट्ठिया वेगे अभिगिज्जन्ति अणुट्ठिया वेगे अभिगिज्जन्ति अभिङ्गझाउरो
 अभिगिज्जन्ति । एस ठाणे अणारिए अकेवले अप्पडिपुण्णे अणेयाउए
 असंसुद्धे असल्लगतणे असिद्धिमग्गे अमुत्तिमग्गे अनिव्वाणमग्गे अनि-
 ज्ञाणमग्गे असच्चदुक्खपहीणमग्गे एगन्तमिच्छे असाहु । एस खलु
 पढमस्स ठाणस्स अधम्मपक्खस्स विभङ्गे एवमाहिए ॥ १७ ॥

अहावरे दोच्चस्स ठाणस्स धम्मपक्खस्स विभङ्गे एवमाहिज्जइ ।
 इह खलु पाईणं वा पडीणं वा उदीणं वा दाहिणं वा सन्तेगइया
 मणुस्सा भवन्ति । तं जहा—आरिया वेगे अणारिया वेगे उच्चागोया
 वेगे नीयागोया वेगे कायमन्ता वेगे हस्समन्ता वेगे सुवण्णा वेगे
 दुवण्णा वेगे सुरुवा वेगे दुरुवा वेगे । तेसिं च णं खेत्तवत्थूणि
 परिग्गहियाइं भवन्ति, एसो आलावगो जहा पोण्डरीए तहा नेयव्वो,
 तेणेव अभिलावेण जाव सव्वोवसन्ता सच्चत्ताए परिनिव्वुडे ति वेमि ॥
 एस ठाणे आरिए केवले जाव सच्चदुक्खपहीणमग्गे एगन्तसम्मे साहु ।
 दोच्चस्स ठाणस्स धम्मपक्खस्स विभङ्गे एवमाहिए ॥ १८ ॥

अहावरे तच्चस्स ठाणस्स मिससगस्स विभङ्गे एवमाहिज्झइ । जे इमे भवन्ति आरणिंया आवसहिया गामणियन्तिया कण्हुईगहस्सिया जाव ते तओ विप्पमुच्चमाणा भुजो एलमूयाए तमूयत्ताए पचायन्ति । एस ठाणे अणारिए अकेवले जाव असव्वदुक्खपर्हाणमग्गे एगन्त-मिच्छे असाहू । एस खलु तच्चस्स ठाणस्स मिससगस्स विभङ्गे एव-माहि ॥ १९ ॥

अहावरे पढमस्स ठाणस्स अधम्मपक्खस्स विभङ्गे एवमाहिज्झइ । इह खलु पाईणं वा ४ सन्तेगइया मणुस्सा भवन्ति—गिहत्था महिच्छा महारम्भा महापरिग्गहा अधम्मिया अधम्माणुया अधम्मिद्वा अधम्मक्खई अधम्मपायजीविणो अधम्मपलोई अधम्मपलज्जणा अधम्मसीलसमुदायारा अधम्मेषं चेव वित्तिं कप्पेमाणा विहरन्ति । हण छिन्द भिन्द विग-त्तगा लोहियपाणी चण्डा रुदा खुदा साहस्सिया उक्कुञ्चणवञ्चणमाया-नियडिकूडकवडसाइसंपओगवहुला दुस्सीला दुव्वया दुप्पडियाणन्दा असाहू सव्वाओ पाणाइवायाओ अप्पडिविरया जावजीवाए जाव सव्वाओ परिग्गहाओ अप्पडिविरया जावजीवाए सव्वाओ कोहाओ जाव मिच्छादंसणसल्लाओ अप्पडिविरया, सव्वाओ ण्हाणुम्मदणवण्णगन्ध-विलेवणसदफरिसरसरूवगन्धमल्लालंकाराओ अप्पडिविरया जावजीवाए सव्वाओ सगडरहजाणजुग्गागिह्लिथिल्लिसियासंदमाणियासयणासणजाण-वाहणभोगभोयणपवित्थरविहीओ अप्पडिविरया जावजीवाए सव्वाओ हिरण्णसुवण्णधणधन्नमणिमोत्तियसंखसिलप्पवालाओ अप्पडिविरया जावजीवाए सव्वाओ कूडतुलकूडमाणाओ अप्पडिविरया जावजी-वाए सव्वाओ आरम्भसमारम्भाओ अप्पडिविरया जावजीवाए सव्वाओ करणकारावणाओ अप्पडिविरया जावजीवाए सव्वाओ पयणपयावणाओ अप्पडिविरया जावजीवाए सव्वाओ कुट्टणपिट्ठणतज्जणताडणवहवन्ध-परिकिलेसाओ अप्पडिविरया जावजीवाओ । जे यावण्णे तहप्पगारा सावज्जा अबोहिया कम्मन्ता परपाणपरियावणकरा जे अणारिएहिं कज्जन्ति

तओ अप्पडिविरया जावजीवाए । से जहानामए केइ पुरिसे कलम-
मसूरतिलमुग्गमासनिष्कावकुलत्थआलिसन्दगपलिसन्थगमादिएहिं अयन्ते
कूरे भिच्छादण्डं पउञ्जति, एवमेव तहप्पगारे पुरिसजाए तित्तिर-
वडुगलावगकवोयकविञ्जलमियसहिसवराहगाहगोहकुम्भसिरिसिवमादिएहिं
अयन्ते कूरे भिच्छादण्डं पउञ्जन्ति । जा वि य से बाहिरिया परिसा
भवइ, तं जहा—दासे इ वा पेसे इ वा भयए इ वा भाइछे इ वा
कम्मकरए इ वा भोगपुरिमे इ वा तेसिं पि य णं अन्नयरसि अहालहु-
गांसि अवराहांसि सयमेव गरुयं दण्डं निवत्तेइ । तं जहा—इमं दण्डेह इमं
मुण्डेह इमं तजेह इमं तालेह इमं अदुयवन्धणं करेह इमं नियलवन्धणं
करेह इमं हड्डिवन्धणं करेह इमं चारगवन्धणं करेह इमं नियलजुयल-
संकोधियमोडियं करेह इमं हत्थच्छिन्नयं करेह इमं पायच्छिन्नयं करेह
इमं कण्णच्छिन्नं करेह इमं नक्कओट्सीसमुहच्छिन्नयं करेह वेयगच्छहियं
अङ्गच्छहियं पक्खाफोडियं करेह इमं नयणुप्पाडियं करेह इमं दंसणु-
प्पाडियं वसणुप्पाडियं जिन्हुप्पाडियं ओलभियं करेह घसियं करेह
घोलियं करेह सूलाइयं करेह सूलमिन्नयं करेह खारवत्तियं करेह वज्झ-
वत्तियं करेह सीहपुच्छियगं करेह वसभपुच्छियगं करेह दवग्गिदड्डयङ्गं
कागणिमंसखावियङ्गं भत्तपाणनिरुद्धगं इमं जावजीवं वहवन्धणं करेह
इमं अन्नयेरेण असुभेणं कुमारेणं मारेह । जा वि य से अब्भिमन्तरिया
परिसा भवइ, तं जहा—भाया इ वा पिया इ वा भाया इ वा भगिणी
इ वा भज्जा इ वा पुत्ता इ वा धूया इ वा सुप्पा इ वा, तेसिं पि य णं
अन्नयरंसि अहालहुगांसि अवराहांसि सयमेव गरुयं दण्डं निवत्तेइ,
सीओदगावियडंसि उच्छोलित्ता भवइ जहा भित्तदोसवत्तिए जाव अहिए
परंसि लोगंसि । ते दुक्खन्ति सोयन्ति जूरन्ति तिप्पन्ति पिड्डन्ति परि-
तप्पन्ति ते दुक्खणसोयणजूरणतिप्पणपिड्डणपरितप्पणवहवन्धणपरिकिले-
साओ अप्पडिविरया भवन्ति । एवमेव ते इत्थिकामेहिं मुच्छिया गिद्धा
गहिया अञ्जोववन्ना जाव वासां चउपञ्चमाइं छद्दसमाइं वा अप्पयो

वा भुज्जयरो वा कालं भुज्जितु भोगभोगाई पविसुइत्ता वेराययणाई सांचि
णित्ता बहूई पावाई कम्माई उस्सन्नाई संभारकडेण कम्मुणा से जहा-
नामए अयगोले इ वा सेलगोले इ वा उदगांसि पक्खित्ते समाणे उदग-
यलमइवइत्ता अहे धरणियलपइट्ठाणे भवइ, एवमेव तहप्पगारे पुरिसजाए
वज्जबहुले धूयबहुले पङ्कबहुले वेरबहुले अप्पत्तियबहुले दम्भवहुले
नियडिबहुले साइबहुले अयसबहुले उस्सन्नतसपाणघाई कालमासे कालं
किच्चा धरणियलमइवइत्ता अहे नरगयलपइट्ठाणे भवइ ॥ २० ॥

ते णं नरगा अन्तो वट्ठा बाहिं चउरंसा अहे खुरप्पसंठाणसंठिया
निच्चन्धकारतमसा ववगयगहचन्दसूरनक्खत्तजोइसप्पहा मेदवसामंस-
रुहिरपूयपडलचिक्खिल्ललित्ताणुलेवणयला असुई वीसा परमदुब्भिमग्धा
कण्हा अगणिवण्णाभा कक्खडफासा दुरहियासा असुभा नरगा असुभा
नरएसु वेयणाओ ॥ नो चेव नरएसु नेरइया निदायन्ति वा पयलायन्ति
वा सुइं वा रइं वा बिइं वा मइं वा उवलभन्ते । ते णं तत्थ उज्जलं
विउलं पगाढं कडुयं ककसं चण्डं दुक्खं दुग्गं तिव्वं दुरहियासं नेरइया
वेयणं पच्चणुभवमाणा विहरन्ति ॥ २१ ॥

से जहानामए रुक्खे सिया पव्वयग्गे जाए मूले छिन्ने अग्गे गरुए
जओ निण्णं जओ विसमं जओ दुग्गं तओ पवडइ, एवमेव तहप्पगारे
पुरिसजाए गब्भाओ गब्भं जम्माओ जम्मं माराओ मारं नरगाओ नरगं
दुक्खाओ दुक्खं दाहिणगामिए नेरइए कण्हपक्खिए आगमिस्साणं दुल्लह-
बोहिए यावि भवइ । एस ठाणे अणारिए अकेवले जाव असच्च-
दुक्खपहीमणग्गे एगन्तमिच्छे असाहू । पढमस्स ठाणस्स अधम्म-
पक्खस्स विभङ्गे एवमाहिए ॥ २२ ॥

अहावरे दोच्चस्स ठाणस्स धम्मपक्खस्स विभङ्गे एवमाहिज्जइ । इह
खलु पाईणं वा ४ सन्तेगइया मगुस्सा भवन्ति । तं जहा-अणारम्भा अप-
रिग्गहा धम्मिया धम्माणुगा धम्मिट्ठा जाव धम्मेणं चेव वित्तिं कप्पेमाणा

विहरन्ति, सुसीला सुव्वया सुप्पडियाणन्दा सुसाहू सव्वओ पाणाइवा-
याओ पडिविरया जावजीवाए जाव जे यावन्ने तहप्पगारा सावज्जा अबोहिया
कम्मन्ता परपाणपरियावणकरा कज्जन्ति तओ वि पडिविरया जाव
जीवाए ॥ से जहानामए—अणगारा भगवन्तो ईरियासमिया भासासमिया
एसणासमिया आयाणमण्डमत्तनिक्खेवणसमिया उच्चारपासवणखेलसिं-
घाणजल्लपरिट्ठावणियासमिया मणसमिया वयसमिया कायसमिया मण-
गुत्ता वयगुत्ता कायगुत्ता गुत्ता गुत्तिन्दिया गुत्तवम्भयारी अकोहा अमाणा
अमाया अलोभा सन्ता पसन्ता उवसन्ता परिनिव्वुडा अणासवा अग्गन्था
छिन्नसोया निरुव्वेवा कंसयाइ व्व मुक्कतोया संखो इव निरञ्जणा जीव इव
अपडिहयगई गगणतलं पिव निरालम्बणा वाउरिव अपडिबद्धा सारद-
मलिलं व सुद्धहियया पुक्खरपत्तं व निरुव्वेवा कुम्भो इव गुत्तिन्दिया
विहग इव विप्पमुक्का खग्गिविसाणं व एगजाया भारुण्डपक्खी व अप्प-
मत्ता कुञ्जरो इव सोण्डीरा वसभो इव जायत्थामा सीहो इव दुद्धरिसा
मन्दरो इव अप्पकम्पा सागरो इव गम्भीरा चन्दो इव सोल्लेसा सूरु
इव दित्तेया जच्चकञ्चणगं व जायरूवा वसुंधरा इव सव्वफासविसहा
सुहुयहुयासणो विय तेयसा जलन्ता । नत्थि णं तेषिं भगवन्ताणं कत्थ
वि पडिवन्धे भवइ । से पडिवन्धे चउव्विहे पन्नत्ते । तं जहा—अण्डए इ वा
पोयए इ वा उग्गहे इ वा पग्गहे इ वा जं णं जं णं दिसं इच्छन्ति तं णं तं णं
दिसं अपडिबद्धा सुइभूया लहुभूया अप्पग्गन्था संजमेणं तवसा अप्पाणं
भावेमाणा विहरन्ति ॥ तेषिं णं भगवन्ताणं इमा एयारूवा जायामायावित्ती
होत्था । तं जहा—चउत्थे भत्ते छट्ठे भत्ते अट्ठमे भत्ते दसमे भत्ते दुवालसमे
भत्ते चउदसमे भत्ते अट्ठमासिए भत्ते मासिए भत्ते दोमासिए तिमासिए
चाउम्मासिए पञ्चमासिए छम्मासिए अदुत्तरं च णं उक्खित्तचरया-
निक्खित्तचरया उक्खित्तनिक्खित्तचरया अन्तचरगा पन्तचरगा ल्हचरगा
समुदागचरगा संसट्ठचरगा असंसट्ठचरगा तज्जायसंसट्ठचरगा दिट्ठलाभिया
अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खलाभिया

अन्नायचरगा उवनिहिया संखादत्तिया परिभियपिण्डवाइया सुद्वेसणिया
 अन्ताहारा पन्ताहारा अरसाहारा विरसाहारा लूहाहारा तुच्छाहारा अन्तजीवी
 पन्तजीवी आयम्बिलिया पुरिमड्डिया निव्विगइया अमज्जमंसासिणो नो
 नियामरसभोई ठाणाइया पडिमाठाणाइया उक्कडुआसणिया नेसज्जिया
 वीरासणिया दण्डायइया लगण्डसाइणो अप्पाउडा अगत्तया अकण्डुया
 अणिदुहा (एवं जहोववाइए) धुयकेसमंसुरोमनहा सव्वगायपडिकम्म-
 विप्पमुक्का चिट्ठन्ति । ते णं एएणं विहारेणं विहरमाणा बहूइं वासाइं
 सामन्नपरियागं पाउणन्ति २ बहुबहु आवाहांसि उप्पन्नंसि वा अणुप्पन्नं-
 सि वा बहूइं भत्ताइं पच्चक्खन्ति पच्चक्खाइत्ता बहूइं भत्ताइं अणसणाए
 छेदेन्ति, अणसणाए छेदित्ता जस्सट्ठाए कीरइ नग्गभावे मुण्डभावे अण्हा-
 णभावे अदन्तवणगे अछत्तए अणोवाहणए भूमिसेज्जा फलगसेज्जा कट्ट-
 सेज्जा केसलोए वम्भचेरवासे परघरपवेसे लद्धावलद्वे माणावमाणणाओ
 हीलणाओ निन्दणाओ खिसणाओ गरहणाओ तज्जणाओ तालणाओ
 उच्चावया गामकण्टगा बावीसं परीसहोवसग्गा अहियासिज्जन्ति तमट्ठं
 आराहेन्ति तमट्ठं आराहित्ता चरमेहिं उस्सासानिस्सासेहिं अणन्तं अणुत्तरं
 निव्वाघायं निरावरणं कसिणं पडिपुण्णं केवलवरनाणदंसणं समुप्पाडेन्ति,
 समुप्पाडित्ता तओ पच्छा सिज्जन्ति बुज्जन्ति मुच्चन्ति परिणिव्वायन्ति
 सव्वदुक्खाणं अन्तं करन्ति । एगच्चाए पुण एगे भयन्तारो
 भवन्ति, अवरे पुण पुव्वकम्मावसेसेणं कालमासे कालं
 किच्चा अन्नयरेसु देवलोएसु देवत्ताए उववत्तारो भवन्ति । तं
 जहा—महड्डिएसु महज्जुइएसु महापरक्कमेसु महाजसेसु महावलेसु
 महाणुभावेसु महासुक्खेसु । ते णं तत्थ देवा भवन्ति महड्डिया मह-
 ज्जुइया जाव महासुक्खा हारविराइयवच्छा कडगतुडियथम्भियभुया
 अङ्गयकुण्डलमट्टगण्डयलकण्णपीढधारी विचित्तहत्थाभरणा विचित्तमाला-
 मउलिमउडा कल्लाणगन्धपवरवत्थपरिहिया कल्लाणगपवरमल्लाणुलेवण-
 धरा भासुरबोदी पलम्बवणमालाधरा दिव्वेणं रूवेणं दिव्वेणं वण्णेणं

दिव्वेणं गन्धेणं दिव्वेणं फासेणं दिव्वेणं संधाएणं दिव्वेणं संठाणेणं दिव्वाए इड्डीए दिव्वाए जुईए दिव्वाए पभाए दिव्वाए छायाए दिव्वाए अंचाए दिव्वेणं तेएणं दिव्वाए लेसाए दस दिसाओ उज्जोवे-
माणा पभासेमाणा गइक्कळाणा ठिइक्कळाणा आगमेसिभइया यावि भवन्ति । एस ठाणे आरिए जाव सव्वदुक्खपहीणमग्गे एगन्तसम्मे सुसाहू । दोच्चस्स ठाणस्स धम्मपक्खस्स विभङ्गे एवमाहिए ॥ २३ ॥

अहावरे तच्चस्स ठाणस्स मीसगस्स विभङ्गे एवमाहिज्जइ । इह खलु पाईणं वा ४ सन्तेगइया मशुस्सा भवन्ति । तं जहा-अप्पिच्छा अप्पा-
रम्भा अप्पपरिग्गहा धम्मिया धम्माणुया जाव धम्मेणं चेव विट्ठि कप्पे-
माणा विहरन्ति सुसीला सुव्वया सुपाडियाणन्दा साहू एगच्चाओ पाणाइ-
वायाओ पडिविरया जावजीवाए एगच्चाओ अप्पडिविरया जाव जे यावन्ने तहप्पगारा सावज्जा अबोहिया कम्मन्ता परपाणपरितावणकरा
कज्जन्ति तओ वि एगच्चाओ अप्पडिविरया । से जहानामए समणो-
वासगा भवन्ति अभिगयजीवाजीवा उवलद्वपुण्णपावा आसवसंवरवेयणा-
निज्जराकिरियाहिगरणबन्धमोक्खकुसला असहेज्जदेवासुरनागसुवण्णजक्ख-
रक्खसकिंनरकिंपुरिसगरुलगन्धव्वमहोरगाइएहिं देवगणेहिं निग्गन्थाओ
पावयणाओ अणइक्कमणिज्जा, इणमेव निग्गन्थे पावयणे निस्सं-
किया निक्कंखिया निव्विइगिच्छा लद्धट्ठा गहियट्ठा पुच्छिअद्द विणिच्छि-
यट्ठा अभिगयट्ठा अट्ठिभिज्जपेम्माणुरागरत्ता । अयमाउसो निग्गन्थे पाव-
यणे अट्ठे अयं परमट्ठे सेसे अणट्ठे उसियफलिहा अवंगुयदुवारा अचियत्त-
न्तेउरपरघरपवेसा चाउइसट्ठमुट्ठिपुण्णिमासिणीसु पडिपुण्णं पोसहं
सम्मं अणुपालेमाणे समणे निग्गन्थे फासुएसणिज्जेणं असणपाणखाइम-
साइमेणं वत्थपाडिग्गहक्कम्बलपायपुच्छणेणं ओसहभेसज्जेणं पीठफलगसेज्जा-
सन्थारएणं पडिलाभेमाणा बहूहिं सीलव्वयगुणवेरमणपच्चक्खाणपोसहो-
ववासेहिं अहापरिग्गहिएहिं तवोकम्मेहिं अप्पाणं भावेमाणा विहरन्ति ॥
ते णं एयारूवेणं विहारेणं विहरमाणा बहूइं वासाइं समणोवासगपरियागं

पाउणन्ति पाउणिता आवाहंसि उप्पन्नंसि वा अणुप्पन्नंसि वा बहूइं भत्ताइं पच्चक्खायन्ति, बहूइं भत्ताइं पच्चक्खाएत्ता बहूइं भत्ताइं अणसणाए छेदेन्ति, बहूइं भत्ताइं अणसणाए छेइत्ता आलोइयपडिक्कन्ता समाहिपत्ता कालमासे कालं किच्चा अन्नयेरेसु देवलोएसु देवत्ताए उववत्तारो भवन्ति । तं जहा—महिद्धिएसु महज्जुइएसु जाव महासुक्खेसु सेसं तहेव जाव एस ठाणे आरिए जाव एगन्तसम्मे साहू । तच्चस्स ठाणस्स मिस्सगस्स विभङ्गे एवं आहिए ॥ अविरइं पडुच्च बाले आहिज्जइ, विरइं पडुच्च पण्डिए आहिज्जइ, विरयाविरइं पडुच्च बालपण्डिए आहिज्जइ । तत्थ णं जा सा सव्वओ अविरइं एस ठाणे आरम्भट्ठाणे अणारिए जाव असव्वदुक्खपहीणमग्गे एगन्तमिच्छे असाहू । तत्थ णं जा सा सव्वओ विरइं एस ठाणे अणारम्भट्ठाणे आरिए जाव सव्वदुक्खपहीणमग्गे एगन्तसम्मे साहू । तत्थ णं जा सा सव्वओ विरयाविरइं एस ठाणे आरम्भनो-आरम्भट्ठाणे एस ठाणे आरिए जाव सव्वदुक्खपहीणमग्गे एगन्तसम्मे साहू ॥ २४ ॥

एवमेव समणुग्गम्माणा इमेहिं चेव दोहिं ठाणेहिं समोअरन्ति । तं जहा—धम्मे चेव अधम्मे चेव उवसन्ते चेव अणुवसन्ते चेव । तत्थ णं जे से पढमस्स ठाणस्स अधम्मपक्खस्स विभङ्गे एवमाहिए, तत्थ णं इमाइं तिन्नि तेवट्ठाइं पावादुयसयाइं भवन्तीति मक्खायाइं । तं जहा—किरियावाईणं अकिरियावाईणं अन्नाणियवाईणं वेणइयवाईणं । ते वि परिनिव्वाणमाहंसु मोक्खमाहंसु ते वि लवन्ति, सावगा, ते वि लवन्ति सावइत्तारो ॥ २५ ॥

ते सव्वे पावाउया आइगरा धम्माणं नाणापन्ना नाणाछन्दा नाणासीला नाणादिट्ठी नाणारूई नाणारम्भा नाणज्झवसाणसंजुत्ता एगं महं मण्डलिबन्धं किच्चा सव्वे एगओ चिट्ठन्ति ॥ पुरिसे य सागणियाणं इङ्गालाणं पाई बहुपडिपुण्णं अयोमएणं संडासएणं गहाय ते सव्वे पावाउए आइगरे धम्माणं नाणापन्ने जाव नाणज्झवसाणसंजुत्ते एवं वयासी ।

हं भो पावाउया आइगरा धम्माणं नाणापन्ना जाव नाणज्झवसाण-
 संजुत्ता इमं ताव तुब्भे सागणियाणं इङ्गालाणं पाइं बहुपडिपुण्णं गहाय
 मुहुत्तयं मुहुत्तगं पाणिणा धरेह, नो बहुसंडासगं संसारियं कुज्जा नो
 बहुअग्गिथम्मणियं कुज्जा नो बहुसाहम्मियवेयावडियं कुज्जा नो बहु-
 परधम्मियवेयावडियं कुज्जा उज्जुया नियागपडिवन्ना अमायं कुव्वमाणा
 पाणिं पमागेह । इति वुच्चा से पुरिसे तेसिं पावादुयाणं तं सागणियाणं
 इङ्गालाणं पाइं बहुपडिपुण्णं अयोमएणं संडासएणं गहाय पाणिंसु
 निमिग्ग । तए णं ते पावादुया आइगरा धम्माणं नाणा-
 पन्ना जाव नाणज्झवसाणसंजुत्ता पाणिं पडिसाहरन्ति । तए णं से
 पुरिसे ते सव्वे पावाउए आइगरे धम्माणं जाव नाणज्झवसाणसंजुत्ते
 एवं वयासी । हं भो पावादुया आइगरा धम्माणं नाणापन्ना जाव
 नाणज्झवसाणसंजुत्ता । कम्हा णं तुब्भे पाणिं पडिसाहरह ? पाणिं नो
 डहिज्जा, देह्हे किं भविस्सइ ? दुक्खं दुक्खं ति भन्नमाणा पडिसाहरह ।
 एस तुला एस पमाणे एस समोसरणे, पत्तेयं तुला पत्तेयं पमाणे पत्तेयं
 समोसरणे । तन्थ णं जे ते समणा माहणा एवमाइक्खन्ति जाव परू-
 वेन्ति—सव्वे पाणा जाव सव्वे सत्ता हन्तव्वा अज्जावेयव्वा परिधेयव्वा
 परितावेयव्वा किलामेयव्वा उदवेयव्वा, ते आगन्तुच्छेयाए ते आगन्तु-
 भेयाए जाव ते आगन्तुजाइजरामरणजोणिजम्मणसंसारपुणव्वभवगव्वभास-
 भवपवंचकलंकलीभागिणो भविस्सन्ति । ते बहूणं दण्डणाणं बहूणं मुण्ड-
 णाणं तज्जणाणं तालणाणं अन्दुबन्धणाणं जाव घोलणाणं माइमरणाणं
 पिइमरणाणं भाइमरणाणं भगिणीमरणाणं भज्जापुत्तधूयमुण्हामरणाणं
 दरिदाणं दोहग्गाणं अप्पियसंवासाणं पियविप्पयोगाणं बहूणं दुक्ख-
 दोम्मणस्माणं आभागिणो भविस्सन्ति । अणाइयं च णं अणवयगं
 दीहमद्वं चाउरन्तमंसारकन्तारं भुज्जो भुज्जो अणुपरियडिस्सन्ति । ते
 नो सिज्झिस्सन्ति नो बुज्झिस्सन्ति जाव नो सव्वदुक्खाणं अन्तं करि-
 स्सन्ति । एस तुला एस पमाणे एस समोसरणे, पत्तेयं तुला पत्तेयं

यमाणे पतेयं समोसरणे । तत्थ णं जे ते समणा माहणा एवमाइक्खन्ति जाव परूवेन्ति । सव्वे पाणा सव्वे भूया सव्वे जीवा सव्वे सत्ता न हन्तव्वा न अज्जावेयव्वा न परिधेयव्वा न उद्वेयव्वा ते नो आगन्तु-
च्छेयाए ते नो आगन्तुमेयाए जाव जाइजरामरणजोगिजम्मगसंसारपुण-
ब्भवगब्भवासभवपवंचकलंकलीभागिणो भविस्सन्ति, अणाइयं च णं
अणवयग्गं दीहमद्वं चाउरन्तसंसारकन्तारं भुज्जो भुज्जो नो अणुपरि-
यट्ठिस्सन्ति, ते सिज्झिस्सन्ति जाव सव्वदुक्खाणं अन्तं करिस्सन्ति ॥२६॥

इच्चेहिं बारसहिं किरियाठाणेहिं वट्टमाणा जीवा नो सिज्झिस्सु नो
बुज्झिस्सु नो मुच्चिंस्सु नो परिणिव्वाइंस्सु जाव नो सव्वदुक्खाणं अन्तं
करेंस्सु वा नो करेन्ति वा नो करिस्सन्ति वा । एयंसि चेव तेरसमे
किरियाठाणे वट्टमाणा जीवा सिज्झिस्सु बुज्झिस्सु मुच्चिंस्सु परिणिव्वाइंस्सु
जाव सव्वदुक्खाणं अन्तं करेंस्सु वा करान्ति वा करिस्सन्ति वा । एवं से
भिक्षू आयदी आयहिए आयगुत्ते आयजोगे आयपरक्कमे आयरक्खिए
आयाणुकम्पए आयणिप्फेडए आयाणमेव पडिसाहरेज्जासि ति वेभि ॥२७॥

किरियाठाणज्झयणं विइयं

आहारपरिन्नज्झयणे तइये

2. 3.

सुयं मे आउसं तेणं भगवया एवमक्खायं । इह खलु आहारपरिन्ना
नामज्झयणे तस्स णं अयमद्वे । इह खलु पाईणं वा ४ सव्वओ
सव्वावन्ति य णं लोगंसि चत्तारि वयिकाया एवमाहिज्जन्ति । तं जहा-
अग्गवीया मूलवीया पोरवीया खन्धवीया । तेसिं च णं अहावीएणं
अहावगासेणं इहेगइया सत्ता पुढवीजोणिया पुढवीसंभवा पुढवीवुकमा

तज्जोगिया तस्संभवा तदुवक्कमा कम्मोवगा कम्मनियोगेणं तत्थवुक्कमा नाणाविहजोगियासु पुढवीसु रुक्खत्ताए विउड्डन्ति ॥ ते जीवा तेसिं नाणाविहजोगियाणं पुढवीणं सिणेहमाहारेन्ति । ते जीवा आहारेन्ति पुढवीसरीरं आउसरीरं तेउसरीरं वाउसरीरं वणस्सइसरीरं । नाणाविहाणं तसथावराणं पाणाणं सरीरं अचित्तं कुव्वन्ति परिविद्वत्थं । तं सरीरं पुव्वाहारियं तथाहारियं विपरिणयं सारूवियकडं सन्तं । अवेरे वि य णं तेसिं पुढविजोगियाणं रुक्खाणं सरीरा नाणावण्णा नाणागन्धा नाणारसा नाणाक्कासा नाणासंठाणसंठिया नाणाविहसरीरपुग्गलविउव्विया ते जीवा कम्मोववन्नगा भवन्तीति मक्खायं ॥ १ ॥

अहावरं पुरक्खायं इहेगइया सत्ता रुक्खजोगिया रुक्खसंभवा रुक्खवुक्कमा तज्जोगिया तस्संभवा तदुवक्कमा कम्मोवगा कम्मनियोगेणं तत्थवुक्कमा पुढवीजोगियाहिं रुक्खेहिं रुक्खत्ताए विउड्डन्ति । ते जीवा तेसिं पुढवीजोगियाणं रुक्खाणं सिणेहमाहारेन्ति, ते जीवा आहारेन्ति पुढवीसरीरं आउतेउवाउवणस्सइसरीरं नाणाविहाणं तसथावराणं पाणाणं सरीरं अचित्तं कुव्वन्ति परिविद्वत्थं । तं सरीरं पुव्वाहारियं तथाहारियं विपरिणामियं सारूवियकडं सन्तं । अवेरे वि य णं तेसिं रुक्खजोगियाणं रुक्खाणं सरीरा नाणावण्णा नाणागन्धा नाणारसा नाणाक्कासा नाणासंठाणसंठिया नाणाविहसरीरपुग्गलविउव्विया ते जीवा कम्मोव-
वन्नगा भवन्तीति मक्खायं ॥ २ ॥

अहावरं पुरक्खायं इहेगइया सत्ता रुक्खजोगिया रुक्खसंभवा रुक्ख-
वुक्कमा तज्जोगिया तस्संभवा तदुवक्कमा कम्मोवगा कम्मनियोगेणं तत्थ-
वुक्कमा रुक्खजोगियासु रुक्खत्ताए विउड्डन्ति । ते जीवा तेसिं रुक्ख-
जोगियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं
आउतेउवाउवणस्सइसरीरं तसथावराणं पाणाणं सरीरं अचित्तं कुव्वन्ति
परिविद्वत्थं । तं सरीरं पुव्वाहारियं तथाहारियं विपरिणामियं सारूवियकडं

सन्तं । अवरे वि य णं तेसिं रुक्खजोणियाणं रुक्खाणं सरीरा नाणावण्णा जाव ते जीवा कम्मोववन्नगा भवन्तीति मक्खायं ॥ ३ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियानेणं तत्थवुक्कमा रुक्खजोणिएसु रुक्खेसु मूलत्ताए कन्दत्ताए खन्धत्ताए तयत्ताए सालत्ताए पवालत्ताए पत्तत्ताए पुप्फत्ताए फलत्ताए वीयत्ताए विउट्टन्ति । ते जीवा तेसिं रुक्खजोणियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं आउतेउवाउवणस्सइसरीरं नाणाविहाणं तसथावराणं पाणाणं सरीरं अचित्तं कुव्वन्ति परित्रिद्वत्थं तं सरीरगं जाव सारुवियकडं सन्तं । अवरे वि य णं तेसिं रुक्खजोणियाणं मूलाणं कन्दाणं खन्धाणं तयाणं सालाणं पवालाणं जाव वीयाणं सरीरा नाणावण्णा नाणागन्धा जाव नाणाविहसरीरपुग्गलविउव्विया ते जीवा कम्मोववन्नगा भवन्तीति मक्खायं ॥ ४ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोववन्नगा कम्मनियानेणं तत्थवुक्कमा रुक्खजोणिएहिं रुक्खेहिं अज्झारोहत्ताए विउट्टन्ति । ते जीवा तेसिं रुक्खजोणियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं जाव सारुवियकडं सन्तं । अवरे वि य णं तेसिं रुक्खजोणियाणं अज्झारुहाणं सरीरा नाणावण्णा जाव मक्खायं ॥ ५ ॥

अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मनियानेणं तत्थवुक्कमा रुक्खजोणिएसु अज्झारोहेसु अज्झारोहत्ताए विउट्टन्ति । ते जीवा तेसिं रुक्खजोणियाणं अज्झारोहाणं सिणेहमाहारेन्ति । ते जीवा पुढवीसरीरं जाव सारुवियकडं सन्तं । अवरे वि य णं

तेसिं अज्झारोहजोगियाणं अज्झारोहाणं सरीरा नाणावण्णा जाव मक्खायं ॥ ६ ॥

अहावरं पुरक्खायं इहेगइया सत्ता अज्झारोहजोगियो अज्झारोहसंभवा जाव कम्मनियाणेणं तत्थवुक्कमा अज्झारोहजोगिएसु अज्झारोहत्ताए विउट्टन्ति । ते जीवा तेसिं अज्झारोहजोगियाणं अज्झारोहाणं सिणेहमाहारेन्ति । ते जीवा आहारेन्ति पुढवीसरीरं आउसरीरं जाव सारूवियकडं सन्तं । अवरे वि य णं तेसिं अज्झारोहजोगियाणं अज्झारोहाणं सरीरा नाणावण्णा जाव मक्खायं ॥ ७ ॥

अहावरं पुरक्खायं इहेगइया सत्ता अज्झारोहजोगिया अज्झारोहसंभवा जाव कम्मनियाणेणं तत्थवुक्कमा अज्झारोहजोगिएसु अज्झारोहेसु मूलत्ताए जाव वीयत्ताए विउट्टन्ति । ते जीवा तेसिं अज्झारोहजोगियाणं अज्झारोहणं सिणेहमाहारेन्ति जाव अवरे वि य णं तेसिं अज्झारोहजोगियाणं मूलणं जाव वीयाणं सरीरा नाणावण्णा जाव मक्खायं ॥ ८ ॥

अहावरं पुरक्खायं इहेगइया सत्ता पुढविजोगिया पुढविसंभवा जाव नागाविहजोगियासु पुढवीसु तणत्ताए विउट्टन्ति । ते जीवा तेसिं नागाविहजोगियाणं पुढवीणं सिणेहमाहारेन्ति जाव ते जीवा कम्मोववन्ना भवन्तीति मक्खायं ॥ ९ ॥

एवं पुढविजोगिएसु तणेसु तणत्ताए विउट्टन्ति जाव मक्खायं ॥ १० ॥

एवं तणजोगिएसु तणेसु तणत्ताए विउट्टन्ति । तणजोगियं तणसरीरं च आहारेन्ति जाव मक्खायं । एवं तणजोगिएसु तणेसु मूलत्ताए जाव वीयत्ताए विउट्टन्ति ते जीवा जाव मक्खायं । एवं तणजोगिएसु तणेसु मूलत्ताए जाव वीयत्ताए विउट्टन्ति ते जीवा जाव एवमक्खायं । एवं ओसहीण वि चत्तारि आलावगा ॥ एवं हरियाण वि चत्तारि आलावगा ॥ ११ ॥

अहावरं पुरक्खायं इहेगइया सत्ता पुढविजोगिया पुढविसंभवा जाव कम्मनियाणेणं तत्थवुक्कमा नाणाविहजोगियासु पुढवीसु आयत्ताए वाय-
त्ताए कायत्ताए कूहणत्ताए कन्दुकत्ताए उव्वेहणियत्ताए निव्वेहणियत्ताए
सञ्जत्ताए छत्तगत्ताए वासणियत्ताए कूरत्ताए विउट्टन्ति । ते जीवा तेसिं
नाणाविहजोगियाणं पुढवीणं सिणेहमाहारेन्ति । ते वि जीवा आहारेन्ति
पुढविसरीरं जाव सन्तं । अवरे वि य णं तेसिं पुढविजोगियाणं आयत्ताणं
जाव कूराणं सरीरा नाणावण्णा जाव मक्खायं । एगो चेव आलावगो
सेसा तिण्णि नत्थि । अहावरं पुरक्खायं इहेगइया सत्ता उदगजोगिया
उदगसंभवा जाव कम्मनियाणेणं तत्थवुक्कमा नाणाविहजोगिएसु उद-
एसु रुक्खत्ताए विउट्टन्ति । ते जीवा तेसिं नाणाविहजोगियाणं उदगाणं
सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे
वि य णं तेसिं उदगजोगियाणं रुक्खाणं सरीरा नाणावण्णा जाव
मक्खायं । जहा पुढविजोगियाणं रुक्खाणं चत्तारि गमा अज्झारुहाण
वि तहेव, तणाणं ओसहीणं हरियाणं चत्तारि आलावगा भाणियव्वा
एकेके । अहावरं पुरक्खायं इहेगइया सत्ता उदगजोगिया उदगसंभवा
जाव कम्मनियाणेणं तत्थवुक्कमा नाणाविहजोगिएसु उदएसु उदगत्ताए
अवगत्ताए पणगत्ताए सेवालत्ताए कलम्बुगत्ताए हडत्ताए कसेरुगत्ताए
कच्छभाणियत्ताए उप्पलत्ताए पउमत्ताए कुमुयत्ताए नलिणत्ताए सुभग-
त्ताए सोगन्धियत्ताए पोण्डरीयमहापोण्डरीयत्ताए सयपत्तत्ताए सहस्स-
पत्तत्ताए एवं कल्हारकोकणयत्ताए अरविन्दत्ताए तामरसत्ताए भिस-
भिसमुणालपुक्खलत्ताए पुक्खलच्छिभगत्ताए विउट्टन्ति । ते जीवा
तेसिं नाणाविहजोगियाणं उदगाणं सिणेहमाहारेन्ति । ते जीवा आहारेन्ति
पुढवीसरीरं जाव सन्तं । अवरे वि य णं तेसिं उदगजोगियाणं उदगाणं
जाव पुक्खलच्छिभगाणं सरीरा नाणावण्णा जाव मक्खायं । एगो चेव
आलावगो ॥ १२ ॥

अहावरं पुरस्वायं इहेगइया सत्ता तेसिं चेव पुढवीजोगिण्हिं रुक्खेहिं रुक्खजोगिण्हिं रुक्खेहिं रुक्खजोगिण्हिं मूलेहिं जाव बीएहिं, रुक्खजोगिण्हिं अज्झारोहेहिं अज्झारोहजोगिण्हिं अज्झारोहेहिं अज्झारोहजोगिण्हिं मूलेहिं जाव बीएहिं, पुढविजोगिण्हिं तणेहिं तणजोगिण्हिं तणेहिं तणजोगिण्हिं मूलेहिं जाव बीएहिं । एवं ओसहीहि वि तिण्णि आलावगा एवं हरिण्हि वि तिण्णि आलावगा । पुढविजोगिण्हि वि आएहिं काएहिं जाव कूरेहिं उदगजोगिण्हिं रुक्खेहिं रुक्खजोगिण्हिं मूलेहिं जाव बीएहिं एवं अज्झारोहेहि वि तिण्णि । तणेहिं पि तिण्णि आलावगा । ओसहीहिं पि तिण्णि, हरिण्हिं पि तिण्णि, उदगजोगिण्हिं, उदएहिं अवएहिं जाव पुक्खलच्छिभएहिं तसपाणत्ताए विउड्डन्ति ॥ ते जीवा तेसिं पुढवीजोगियाणं उदगजोगियाणं रुक्खजोगियाणं अज्झारोहजोगियाणं तणजोगियाणं ओसहीजोगियाणं हरियजोगियाणं रुक्खाणं अज्झारोहाणं तगाणं ओसहीणं हरियाणं मूलाणं जाव बीयाणं आयाणं कायाणं जाव कुरवाणं [कूरणं] उदगाणं अवगाणं जाव पुक्खलच्छिभगाणं सिणेहमाहरेन्ति । ते जीवा आहरेन्ति पुढवीसरीं जाव सन्तं । अत्रे वि यणं तेसिं रुक्खजोगियाणं अज्झारोहजोगियाणं तणजोगियाणं ओसहजोगियाणं हरियजोगियाणं मूलजोगियाणं कन्दजोगियाणं जाव बीयजोगियाणं आयजोगियाणं कायजोगियाणं जाव कूरजोगियाणं उदगजोगियाणं अवगजोगियाणं जाव पुक्खलच्छिभजोगियाणं तसपाणाणं सरीरा नागावण्णा जाव मक्खायं ॥ १३ ॥

अहावरं पुरस्वायं नाणाविहाणं मणुस्साणं । तं जहा-कम्मभूमाणाणं अकम्मभूमाणाणं अन्तरदीवगाणां आरियाणं मिलवसुयाणं । तेसिं च णं अहावीएणं अहावगासेणं इत्थीए पुरिसस्स य कम्मकडाए जोगिण्ण एत्थ णं मेहुणवत्तियाए व नामं संजोगे समुप्पज्झइ । ते दुहओ वि सिणेहं संचिणन्ति । तत्थ णं जीवा इत्थियाए पुरिसत्ताए नपुंसगत्ताए विउड्डन्ति, ते जीवा माओउयं पिउसुकं तं तदुभयं संसटं कालुसं

किंविंसं तं पढमत्ताए आहारमाहरेन्ति । तओ पच्छा जं से माया नाणाविहाओ रसविहीओ आहारमाहरेइ तओ एगदेसेणं ओयमाहरेन्ति । अणुपुव्वेण बुद्धा पलिपागमणुववन्ना तओ कायाओ अभिनिवट्टमाणा इत्थि वेगया जणयन्ति पुरिसं वेगया जणयन्ति नपुंसगं वेगया जणयन्ति । ते जीवा डहरा समाणा माउक्खीरं सप्पिं आहरेन्ति । आणुपुव्वेणं बुद्धा ओयणं कुम्मासं तसथावरे य पाणे । ते जीवा आहरेन्ति पुढविसरीरं जाव सारूवियकडं सन्तं । अवरे वि य णं तेसिं नाणाविहाणं मणुस्स-गाणं कम्मभूमगाणं अकम्मभूमगाणं अन्तरदीवगाणं आरियाणं मिल-क्खूणं सरीरा नाणावण्णा भवन्तीति मक्खायं ॥ १४ ॥

अहावरं पुरक्खायं नाणाविहाणं जलचराणं पञ्चिन्दियतिरिक्खजोणि-याणं । तं जहा-मच्छाणं जाव सुंसुमाराणं । तेसिं च णं अहावीएणं अहावगासेणं इत्थिए पुरिसस्स य कम्मकए तहेव जाव तओ एग-देसेणं ओयमाहरेन्ति, अणुपुव्वेणं बुद्धा परिपालगमणुपवन्ना तओ कायाओ अभिनिवट्टमाणा अण्डं वेगया जणयन्ति पोयं वेगया जणयन्ति । से अण्डे उब्भिज्जमाणे इत्थि वेगया जणयन्ति पुरिसं वेगया जणयन्ति नपुंसगं वेगया जणयन्ति । ते जीवा डहरा समाणा आउसिणेहमाहरेन्ति अणुपुव्वेणं बुद्धा वणस्सइकायं तसथावरे य पाणे । ते जीवा आहरेन्ति पुढविसरीरं जाव सन्तं । अवरे वि य णं तेसिं नाणाविहाणं जरुचरपञ्चि-न्दियतिरिक्खजोणियाणं मच्छाणं सुंसुमाराणं सरीरा नाणावण्णा जाव मक्खायं । अहावरं पुरक्खायं नाणाविहाणं चउप्पयथलयरपञ्चिन्दिय-तिरिक्खजोणियाणं । तं जहा-एगखुराणं दुखुराणं गण्डीपदाणं सण-फ़याणं । तेसिं च णं अहावीएणं अहावगासेणं इत्थिपुरिसस्स य कम्म जाव मेहुणवत्तिए नामं संजोगे समुप्पज्जइ । ते दुहओ सिणेहं संचि-णन्ति । तत्थ णं जीवा इत्थिताए पुरिसत्ताए जाव विउट्टन्ति । ते जीवा माओउयं पिउसुक्कं एवं जहा मणुस्साणं, इत्थि पि वेगया जण-

यन्ति पुरिमं पि नपुंसगं पि । ते जीवा उहरा समाणा माउक्खीरं सपिं
 आहारेन्ति, अणुपुव्वेणं वुड्ढा वणस्सइकायं तसथावरे य पाणे । ते
 जीवा आहारेन्ति पुढविसरीरं जाव सन्तं । अवरे वि य णं तेसिं नाणा-
 विहाणं चउप्पयथलयरपश्चिन्दियतिरिक्खजोगियाणं एमखुराणं जाव
 मणप्पयाणं मरीरा नाणावण्णा जाव मक्खायं । अहावरं पुरक्खायं
 नाणाविहाणं उरपरिमप्पथलयरपश्चिन्दियतिरिक्खजोगियाणं । तं जहा-
 अहीणं अयमगणं आसालियाणं महोरगाणं । तेसिं च णं अहावीएणं
 अहावगामेणं इत्थीए पुरिस जाव एत्थ णं मेहुणे एवं तं चेव । नाणत्तं
 अण्डं वेगइया जणयन्ति, पोयं वेगइया जणयन्ति । से अण्डे उब्भिज्ज-
 माणे इत्थि वेगइया जणयन्ति पुरिसं पि नपुंसगं पि । ते जीवा उहरा
 समाणा वाउक्कायमाहारेन्ति अणुपुव्वेणं वुड्ढा वणस्सइकायं तसथावर-
 पाणे । ते जीवा आहारेन्ति पुढविसरीरं जाव सन्तं । अवरे वि य णं तेसिं
 नाणाविहाणं उरपरिमप्पथलयरपश्चिन्दियतिरिक्खजोगियाणं । तं जहा-
 अहीणं जाव महोरगाणं मरीरा नाणावण्णा नाणागंधा जावमक्खायं ।
 अहावरं पुरक्खायं नाणाविहाणं भुयपरिमप्पथलयरपश्चिन्दियतिरिक्ख-
 जोगियाणं । तं जहा—गोहाणं नउलाणं सिहाणं सरडाणं सल्लाणं सरवाणं
 खराणं घरकोइलियाणं विस्संमराणं सुसगाणं मंगुसाणं पयलाइयाणं
 विगलियाणं जाहाणं चउप्पाइयाणं । तेसिं च णं अहावीएणं अहाव-
 गामेणं इत्थीए पुरिसस्स य जहा उरपरिमप्पाणं तहा भाणियव्वं जाव
 मत्तुविक्कडं सन्तं । अवरे वि य णं तेसिं नाणाविहाणं भुयपरिमप्पश्चि-
 न्दियथलयरतिरिक्खाणं । तं जहा—गोहाणं जावमक्खायं । अहावरं
 पुरक्खायं नाणाविहाणं जलचरपश्चिन्दियतिरिक्खजोगियाणं । तं जहा—
 चम्मपक्खीणं लोमपक्खीणं समुग्गपक्खीणं विययपक्खीणं । तेसिं च
 णं अहावीएणं अहावगामेणं इत्थीए जहा उरपरिमप्पाणं । नाणत्तं ते
 जीवा उहरा समाणा माउगतमिणेहमाहारेन्ति अणुपुव्वेणं वुड्ढा वणस्सइ-
 कायं तसथावरे य पाणे । ते जीवा आहारेन्ति पुढविसरीरं जाव सन्तं ।

अवरे वि य णं तेसिं नाणाविहाणं खहचरपाञ्चिन्दियातिरिक्खजोगियाणं चम्मपक्कीणं जाव मक्खायं ॥ १५ ॥

अहावरं पुरक्खायं इहेगइया सत्ता नाणाविहजोगिया नाणाविहसंभवा नाणाविहवुक्कमा तजोगिया तस्संभवा तदुवक्कमा कम्मोवगा कम्मनियाणेणं तत्थवुक्कमा नाणाविहाणं तसथावराणं पोम्मलानं सरीरेसु वा सचित्तेसु वा अचित्तेसु वा अणुसूयत्ताए विउट्टन्ति । ते जीवा तेसिं नाणाविहाणं तसथावराणं पाणाणं सिणेहमाहरोन्ति । ते जीवा आहारोन्ति पुढविसरीरं जाव सन्तं । अवरे वि य णं तेसिं तसथावरजोगियाणं अणुसूयगाणं सरीरा नाणावण्णा जाव मक्खायं । एवं दुरूवसंभवत्ताए । एवं खुरहुगत्ताए ॥ १६ ॥

अहावरं पुरक्खायं इहेगइया सत्ता नाणाविहजोगिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा तं सरीरं वायसंसिद्धं वा वायसंगहियं वा वायपरिगहियं उट्ठवाएसु उट्ठभागी भवइ, अहेवाएसु अहेभागी भवइ, तिरियवाएसु तिरियभागी भवइ । तं जहा-ओसा हिमए महिए करए हरतणुए सुद्धोदए । ते जीवा तेसिं नाणाविहाणं तसथावराणं पाणाणं सिणेहमाहरोन्ति । ते जीवा आहारोन्ति पुढविसरीरं जाव सन्तं । अवरे वि य णं तेसिं तसथावरजोगियाणं ओसाणं जाव सुद्धोदगाणं सरीरा नाणावण्णा जावमक्खायं । अहावरं पुरक्खायं इहेगइया सत्ता उदगजोगिया उदगसंभवा जाव कम्मनियाणेणं तत्थवुक्कमा तसथावरजोगिएसु उदएसु उदगत्ताए विउट्टन्ति । ते जीवा तेसिं तसथावरजोगियाणं उदगाणं सिणेहमाहरोन्ति । ते जीवा आहारोन्ति पुढविसरीरं जाव सन्तं । अवरे वि य णं तेसिं तसथावरजोगियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोगियाणं जाव कम्मनियाणेणं तत्थवुक्कमा उदगजोगिएसु उदएसु उदगत्ताए विउट्टन्ति

ते जीवा तेसिं उदगजोणियाणं उदगाणं सिणेहमाहरेन्ति । ते जीवा आहारेन्ति पुढविसरीरं जाव सन्तं । अवरं वि य णं तेसिं उदगजोणियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोणियाणं जाव कम्मनियाणेणं तत्थवुक्कमा उदगजोणिएसु उदएसु तसपाणात्ताए विउट्टन्ति । ते जीवा तेसिं उदगजोणियाणं उदगाणं सिणेहमाहरेन्ति । ते जीवा आहारेन्ति पुढविसरीरं जाव सन्तं । अवरं वि णं तेसिं उदगजोणियाणं तसपाणाणं सरीरा नाणावण्णा जाव मक्खायं ॥ १७ ॥

अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा अगणिकायत्ताए विउट्टन्ति । ते जीवा तेसिं नाणाविहाणं तसथावराणं पाणाणं सिणेहमाहरेन्ति । ते जीवा आहारेन्ति पुढविसरीरं जाव सन्तं । अवरं वि य णं तेसिं तसथावरजोणियाणं अगणीणं सरीरा नाणावण्णा जावमक्खायं । सेसा तिणि आलावगा जहा उदगाणं । अहावरं पुरक्खायं इहेगइया सत्ता नाणाविहजोणियाणं जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा वाउक्कायत्ताए विउट्टन्ति । जहा अगणीणं तहा भाणियव्वा चत्तारि गमा ॥ १८ ॥

अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा पुढवित्ताए सक्कारत्ताए वालुयत्ताए । इमाओ गाहाओ अगुगन्तव्वाओ—

पुढवी य सक्करा वालुया य उवले सिला य लोणूसे ।

अथ तउय तम्भ सीसग रुण्य सुवण्णे य वइरे य ॥ १ ॥

हरियाले हिङ्गुलए मणोसिला सासगञ्जणपवाले ।
 अब्भपडलब्भवालुयबायरकाए मणिविहाणा ॥ २ ॥
 गोमेज्जए य रुयए अंके फलिहे य लोहियक्खे य ।
 मरगयमसारगल्ले भुयमोयग इन्दणीले य ॥ ३ ॥
 चन्दण गेरुय हंसगब्भ पुलए सोगन्धिए य बोद्धवे ।
 चन्दप्पम वेरुलिए जलकन्ते सूरकन्ते य ॥ ४ ॥

एयाओ एएसु भणियव्वाओ गाहाओ जाव सूरकन्तत्ताए
 विउट्टन्ति । ते जीवा तेसिं नाणाविहाणं तसथावरणं पाणाणं सिणेहमा-
 हारेन्ति । ते जीवा आहारेन्ति पुढविसरीरं जाव सन्तं । अवरे वि य णं
 तेसिं तसथावरजोणियाणं पुढवीणं जाव सूरकन्ताणं सरीरा नाणावण्णा
 जाव मक्खायं । सेसा तिण्णि आलावगा जहा उदगाणं ॥ १९ ॥

अहावरं पुरक्खायं सव्वे पाणा सव्वे भूया सव्वे जीवा सव्वे
 सत्ता नाणाविहजोणिया नाणाविहसंभवा नाणाविहवुक्कमा सरीरजोणिया
 सरीरसंभवा सरीरवुक्कमा सरीराहारा कम्मोवगा कम्मनियाणा कम्मगइया
 गम्माठइया कम्मणा चेव विप्परियासमुवेन्ति ॥ से एवमायाणह से
 एवमायाणित्ता आहारगुत्ते सहिए समिए सया जए त्ति वेमि ॥ २० ॥

आहारपरिज्झयणं तइयं



पच्चक्खाणकिरियज्झयणे चउत्थे

2. 4.

सुयं मे आउसं तेणं भगवया एवमक्खायं । इह खलु पच्चक्खाण-
 किरिया नामज्झयणे । तस्स णं अयमट्ठे पणत्ते । आया अपच्चक्खाणी
 यावि भवइ, आया अकिरियाकुसले यावि भवइ, आया मिच्छासंठिए

यावि भवइ, आया एगन्तदण्डे यावि भवइ, आया एगन्तबाले यावि भवइ, आया एगन्तसुत्ते यावि भवइ, आया आवियारमणवयणकायवक्के यावि भवइ, आया अप्पडिहयअपच्चक्खायपावकम्मे यावि भवइ । एस खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंवुडे एगन्तदण्डे एगन्तबाले एगन्तसुत्ते से बाले आवियारमणवयणकायवक्के सुविणमवि न पस्सइ, पावे य से कम्मे कज्जइ ॥११॥

तत्थ चोयए पन्नवगं एवं वयासी । असन्तएणं मणेणं पावएणं, असन्तियाए वइए पावियाए, असन्तएणं काएणं पावएणं, अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावकम्मे नो कज्जइ, कस्स णं तं हेउं । चोयए एवं ववीइ । अन्नयरेणं मणेणं पावएणं मणवत्तिए पावे कम्मे कज्जइ, अन्नयरीए वइए पावियाए वइवत्तिए पावे कम्मे कज्जइ, अन्नयरेणं कायेणं पावएणं कायवत्तिए पावे कम्मे कज्जइ, हणन्तस्स समणक्खस्स सवियारमणवयणकायवक्कस्स सुविणमवि पासओ एवंगुणजाइयस्स पावे कम्मे कज्जइ । पुणरवि चोयए एवं ववीइ । एत्थ णं जे ते एवमाहंसु—असन्तएणं मणेणं पावएणं, असन्तियाए वइए पावियाए, असन्तएणं काएणं पावएणं, अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु मिच्छा ते एवमाहंसु । तत्थ पन्नवए चोयगं एवं वयासी । तं सम्मं जं मए पुव्वं वुत्तं । असन्तएणं मणेणं पावएणं, असन्तियाए वइए पावियाए, असन्तएणं कायेणं पावएणं अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावे कम्मे कज्जइ, तं सम्मं, कस्स णं तं हेउं । आचार्य आह—तत्थ खलु भगवया छज्जीवनिकायहेऊ पण्णत्ता । तं जहा—पुढावि-काइया जाव तसकाइया । इच्चेहिं छहिं जीवनिकाएहिं आया अप्पडिहयपच्चक्खायपावकम्मे निच्चं पसढाविउवायचित्तदण्डे । तं जहा—पाणाइवाए जाव परिग्गहे कोहे जाव मिच्छादंसणसल्ले । आचार्य आह—

तत्थ खलु भगवया वहए दिट्ठन्ते पण्णत्ते । से जहानामए-वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि पहारेमाणे से किं नु हु नाम से वहए तस्स गाहावइस्स वा गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि पहारमाणे दिया वा राओ वा सुत्ते वा जागरमाणे अमित्तभूए भिच्छासंठिए निच्चं पसढविउवायचित्तदण्डे भवइ ? एवं वियागरेमाणे समियाए वियागरे चोयए-हंता भवइ । आचार्य अह-जहा से वहए तस्स गाहावइस्स वा तस्स गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि ति पहारेमाणे दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढविउवायचित्तदण्डे, एवमेव बाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढविउवायचित्तदण्डे । तं जहा-पाणाइवाए जाव भिच्छादंसणसल्ले । एवं खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंवुडे एगन्तदण्डे एगन्तबाले एगन्तसुत्ते यावि भवइ । से बाले आवियारमणवयणकायवक्के सुविण-मवि न पस्सइ पावे य से कम्मे कज्जइ । जहा से वहए तस्स वा गाहा-वइस्स जाव तस्स वा रायपुरिसस्स पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढ-विउवायचित्तदण्डे भवइ, एवमेव बाले सव्वेसिं पाणाणं जाव सव्वेसिं सत्ताणं पत्तेयं पत्तेयं चित्तसमादाए दिया वा राओ वा सुत्ते वा जागर-माणे वा अमित्तभूए भिच्छासंठिए निच्चं पसढविउवायचित्तदण्डे भवइ ॥ २ ॥

नो इण्ठे समठे [चोयए] । इह खलु बहवे पाणा० जे इमेणं सरीरसमुत्सएणं नो दिट्ठा वा सुया वा नाभिमया वा विन्नाया वा जेसिं

नो पत्तेयं पत्तेयं चित्तसमायाए दिया वा राओ वा सुत्ते वा जागरमाणे वा अमित्तभूए मिच्छासंठिए निचं पसढविउवायचित्तदण्डे । तं जहा पाणाइवाए जाव मिच्छादंसणसल्ले ॥ ३ ॥

आचार्य आह—तत्थ खलु भगवया दुवे दिट्ठन्ता पणत्ता । तं जहा—सन्निदिट्ठन्ते य असन्निदिट्ठन्ते य । से किं तं सन्निदिट्ठन्ते ? जे इमे सन्निपञ्चिन्दिया पज्जत्तगा एएसिं णं छजीवनिकाए पडुच्च, तं जहा—पुढवीकायं जाव तसकायं । से एगइओ पुढवीकाएणं किच्चं करेइ वि कारवेइ वि । तस्स णं एवं भवइ—एवं खलु अहं पुढवीकाएणं किच्चं करेमि वि कारवेमि वि, नो चेव णं से एवं भवइ—इमेण वा इमेण वा से एएणं पुढवीकाएणं किच्चं करेइ वि कारवेइ वि । से णं ताओ पुढवीकायाओ असंजयअविरयअप्पडिहयपच्चक्खायपावकम्मे यावि भवइ । एवं जाव तसकाए चि भाणियच्चं । से एगइओ छजीवनिकाएहिं किच्चं करेइ वि कारवेइ वि । तस्स णं एवं भवइ—एवं खलु छजीवनिकाएहिं किच्चं करेमि वि कारवेमि वि । नो चेव णं से एवं भवइ—इमेहिं वा इमेहिं वा, से य तेहिं छहिं जीविकाएहिं जाव कारवेइ वि । से य तेहिं छहिं जीविकाएहिं असंजयअविरयअप्पडिहयपच्चक्खायपावकम्मे, तं जहा—पाणाइवाए जाव मिच्छादंसणसल्ले । एस खलु भगवया अक्खाए असंजए अविरए अप्पडिहयपच्चक्खायपावकम्मे सुविणमवि अपस्सओ । पावे य से कम्मे कज्जइ । से तं सन्निदिट्ठन्ते ॥ से किं तं असन्निदिट्ठन्ते ? जे इमे असन्निणो पाणा, तं जहा—पुढवीकाइया जाव वणस्सइकाइया छट्ठा वेगइया तसा पाणा, जेसिं नो तक्का इ वा सन्ना इ वा पन्ना इ वा मणा इ वा वई इ वा सयं वा करणाए अन्नेहिं वा कारवेत्तए करन्तं वा समणुजाणित्तए, ते वि णं बाले सच्चेसिं पाणाणं जाव सच्चेसिं सत्ताणं दिया वा राओ वा सुत्ते वा जागरमाणे वा अमित्तभूया मिच्छासंठिया निचं पसढविउवायचित्तदण्डा, तं जहा—पाणाइवाए जाव मिच्छादंसणसल्ले । इवेव जाव नो चेव मणो नो चेव वई पाणाणं जाव सत्ताणं दुक्खणयाए

सोयणयाए जूरणयाए तिप्पणयाए पिट्ठणयाए परित्तिप्पणयाए ।
 ते दुक्खणसोयण जाव परित्तिप्पणवहबन्धणपरीकिलेसाओ अप्पडिविरया
 भवन्ति । इति खलु से असन्निणो वि सत्ता अहोनिस्सिं पाणाइवाए
 उवक्खाइज्जन्ति जाव अहोनिस्सिं परिग्गहे उवक्खाइज्जन्ति जाव
 मिच्छादंसणसल्ले उवक्खाइज्जन्ति [एवं भूयवाई] । सच्चोणिया वि
 खलु सत्ता सन्निणो हुच्चा असन्निणो होन्ति असन्निणो हुच्चा सन्निणो
 होन्ति, होच्चा सन्नी अदुवा असन्नी, तत्थ से अवित्रिचित्ता अविधूणिता
 असंमुच्छित्ता अणणुतावित्ता असन्निकायाओ वा सन्निकाए संकमन्ति
 सन्निकायाओ वा असन्निकायं संकमन्ति, सन्निकायाओ वा सन्निकायं
 संकमन्ति असन्निकायाओ वा असन्निकायं संकमन्ति । जे एए सन्नि वा
 असन्नि वा सव्वे ते मिच्छायारा निच्चं पसदविउवायचित्तदण्डा । तं जहा-
 पाणाइवाए जाव मिच्छादंसणसल्ले । एवं खलु भगवया अक्खाए
 असंजए अविरए अप्पडिहयपच्चक्खायपावकम्मे सकिरिए असंवुडे
 एगन्तदण्डे एगन्तबाले एगन्तसुत्ते से बाले अवियारमणवयणकायवक्के
 सुविणमवि न पासइ पावे य से कम्मे कज्जइ ॥ ४ ॥

चोयए — से किं कुव्वं किं कारवं कहं संजयविरयप्पडिहयपच्च-
 क्खायपावकम्मे भवइ ? आचार्य आह—तत्थ खलु भगवया छज्जीव-
 निकायहेऊ पन्नत्ता, तं जहा—पुढवीकाइया जाव तसकाइया । से जहानामए
 मम अस्सायं दण्डेण वा अट्ठीण वा मुट्ठीण वा लेल्लण वा क्वाल्लेण वा
 आतोडिज्जमाणस्स वा जाव उवद्विज्जमाणस्स वा जाव लोमुक्खणणमाय-
 मवि हिंसाकारं दुक्खं भयं पडिसंवेदेमि, इच्चें जाण सव्वे पाणा सव्वे
 सत्ता दण्डेण वा जाव क्वाल्लेण वा आतोडिज्जमाणे वा हम्ममाणे वा
 तज्जिज्जमाणे वा तालिज्जमाणे जाव उवद्विज्जमाणे वा जाव लोमुक्खणण-
 मायमवि हिंसाकारं दुक्खं भयं पडिसंवेदेन्ति । एवं नच्चा सव्वे पाणा जाव
 सव्वे सत्ता न हन्तव्वा न उद्वेयव्वा । एस धम्मे धुवे निइए सासए
 सभिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव

मिच्छादंसणसह्याओ । से भिक्खू नो दन्तपक्खालणेणं दन्ते पक्खा-
लेज्जा, नो अज्झणं नो वमणं नो धूवणित्तं पिआइए । से भिक्खू
अकिरिए अलूसए अकोहे जाव अलोभे उवसन्ते परीनिव्वुडे । एस
खलु भगवया अक्खाए संजयविरयपाडिहयपच्चक्खायपावकम्मे अकिरिए
संवुडे एगन्तपण्डिए भवइ त्ति वेमि ॥ ५ ॥

पच्चक्खाणाकिरियज्झयणं चउत्थं

आयारमुयज्झयणे पञ्चमे

2. 5.

आदाय वम्भचेरं च आसुपन्ने इमं वइ ।
अस्सिं धम्मे अणायारं नायरेज्ज कयाइ वि ॥ १ ॥
अणार्इयं परिन्नाय अणवदग्गे त्ति वा पुणो ।
सासयमसासए वा इइ दिट्ठिं न धारए ॥ २ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ३ ॥
समुच्छिहन्ति सत्थारो सव्वे पाणा अणेलिंसा ।
गण्ठिगा वा भविस्सन्ति सासयं ति व नो वए ॥ ४ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ५ ॥
जे केइ खुद्दगा पाणा अदुवा सन्ति महालया ।
सरिसं तेहि वेरं ति असरिसं ति य नो वए ॥ ६ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ७ ॥
अहाकम्माणि भुज्जन्ति, अन्नमन्ने सकम्मुणा ।
उवलित्ते त्ति जाभिज्जा अणुवलित्ते त्ति वा पुणो ॥ ८ ॥

- एएहिं दोहि ठाणेहिं ववहारो न विज्जई ।
 एएहिं दोहि ठाणेहिं अणायारं तु जाणए ॥ ९ ॥
 जमिदं ओरालमाहारं कम्मगं च तहेव य ।
 सव्वत्थ वीरियं अत्थि नत्थि सव्वत्थ वीरियं ॥ १० ॥
 एएहिं दोहि ठाणेहिं ववहारो न विज्जई ।
 एएहिं दोहि ठाणेहिं अणायारं तु जाणए ॥ ११ ॥
 नत्थि लोए अलोए वा नेवं सन्नं निवेसए ॥
 अत्थि लोए अलोए वा एवं सन्नं निवेसए ॥ १२ ॥
 नत्थि जीवा अजीवा वा नेवं सन्नं निवेसए ।
 अत्थि जीवा अजीवा वा एवं सन्नं निवेसए ॥ १३ ॥
 नत्थि धम्मे अधम्मे वा नेवं सन्नं निवेसए ।
 अत्थि धम्मे अधम्मे वा एवं सन्नं निवेसए ॥ १४ ॥
 नत्थि बन्धे व मोक्खे वा नेवं सन्नं निवेसए ।
 अत्थि बन्धे व मोक्खे वा एवं सन्नं निवेसए ॥ १५ ॥
 नत्थि पुण्णे व पावे वा नेवं सन्नं निवेसए ।
 अत्थि पुण्णे व पावे वा एवं सन्नं निवेसए ॥ १६ ॥
 नत्थि आसवे संवरे वा नेवं सन्नं निवेसए ।
 अत्थि आसवे संवरे वा एवं सन्नं निवेसए ॥ १७ ॥
 नत्थि वेयणा निज्जरा वा नेवं सन्नं निवेसए ।
 अत्थि वेयणा निज्जरा वा एवं सन्नं निवेसए ॥ १८ ॥
 नत्थि किरिया अकिरिया वा नेवं सन्नं निवेसए ।
 अत्थि किरिया अकिरिया वा एवं सन्नं निवेसए ॥ १९ ॥
 नत्थि कोहे व माणे वा नेवं सन्नं निवेसए ।
 अत्थि कोहे व माणे वा एवं सन्नं निवेसए ॥ २० ॥
 नत्थि माया व लोभे वा नेवं सन्नं निवेसए ।
 अत्थि माया व लोभे वा एवं सन्नं निवेसए ॥ २१ ॥

नत्थि पेजे व दोसे वा नेवं सन्नं निवेसए ।
 अत्थि पेजे व दोसे वा एवं सन्नं निवेसए ॥ २२ ॥
 नत्थि चाउरन्ते संसारे नेवं सन्नं निवेसए ।
 अत्थि चाउरन्ते संसारे एवं सन्नं निवेसए ॥ २३ ॥
 नत्थि देवो व देवी वा नेवं सन्नं निवेसए ।
 अत्थि देवो व देवी वा एवं सन्नं निवेसए ॥ २४ ॥
 नत्थि सिद्धी असिद्धी वा नेवं सन्नं निवेसए ।
 अत्थि सिद्धी असिद्धी वा एवं सन्नं निवेसए ॥ २५ ॥
 नत्थि सिद्धी नियं ठाणं नेवं सन्नं निवेसए ।
 अत्थि सिद्धी नियं ठाणं एवं सन्नं निवेसए ॥ २६ ॥
 नत्थि साहू असाहू वा नेवं सन्नं निवेसए ।
 अत्थि साहू असाहू वा एवं सन्नं निवेसए ॥ २७ ॥
 नत्थि कल्लाण पावे वा नेवं सन्नं निवेसए ।
 अत्थि कल्लाण पावे वा एवं सन्नं निवेसए ॥ २८ ॥
 कल्लाणे पावए वा वि ववहारो न विज्झइ ।
 जं वेरं तं न जाणन्ति समणा बाल पण्डिया ॥ २९ ॥
 असेसं अक्खयं वावि सव्वदुक्खे इ वा पुणो ।
 वज्झा पाणा न वज्झ त्ति इइ वायं न नीसरे ॥ ३० ॥
 दीसन्ति समियायारा भिक्खुणो साहुजीविणो ।
 एए भिच्छोवजीवन्ति इइ दिट्ठिं न धारए ॥ ३१ ॥
 दक्खिणाए पडिलम्मो अत्थि वा नत्थि वा पुणो ।
 न वियागरेज्ज मेहावी सन्तिमग्गं च बूहए ॥ ३२ ॥
 इच्चेहिं ठाणेहिं जिणदिट्ठेहि संजए ।
 धारयन्ते उ अप्पाणं आ मोक्खाए परिव्वज्जासि ॥ ३३ ॥
 त्ति वेमि ॥

अद्दइज्जज्झयणे छट्ठे

2. 6.

पुराकडं अद्द इमं सुणेह भेगन्तयारी समणे पुरासी ।
 से भिक्खुणो उवणेत्ता अणेगे आइक्खएण्हि पुढो वित्थरेणं ॥ १ ॥
 साजीविया पट्टवियाथिरेणं सभागओ गणओ भिक्खुमज्जे ।
 आइक्खमाणो बहुजन्नमत्थं न संधयार्इ अवरेणं पुव्वं ॥ २ ॥
 एगन्तमेवं अदुवा वि एण्हि दोवन्नमन्नं न समेइ जम्हा ।
 पुव्विं च एण्हिं च अणागयं वा एगन्तमेवं पडिसंधयाइ ॥ ३ ॥
 समिच्च लोगं तसथावराणं खेमंकरे समणे माहणे वा ।
 आइक्खमाणो वि सहस्समज्जे एगन्तयं सारयर्इ तहच्चे ॥ ४ ॥
 धम्मं कहन्तस्स उ नत्थि दोसो खन्तस्स दन्तस्स जिइन्दियस्स ।
 भासाय दोसे य विवज्जगस्स गुणे य भासाय निसेवगस्स ॥ ५ ॥
 महव्वए पञ्च अणुव्वए य तहेव पञ्चासव संवरे य ।
 विरइं इह स्सामणियम्मि पुण्णे लवावसकी समणे ति बेमि ॥ ६ ॥
 सीओदगं सेवउ बीयकायं आहायकम्मं तह इत्थियाओ ।
 एगन्तचारिस्सिह अम्ह धम्मे तवस्सिणो नाभिसमेइ पावं ॥ ७ ॥
 सीओदगं वा तह बीयकायं आहायकम्मं तह इत्थियाओ ।
 एयाइ जाणं पडिसेवमाणा अगारिणो अस्समणा भवन्ति ॥ ८ ॥
 सिया य बीयोदग इत्थियाओ पडिसेवमाणा समणा भवन्तु ।
 अगारिणो वि समणा भवन्तु सेवन्ति ऊ तं पि तहप्पगारं ॥ ९ ॥
 जे यावि बीयोदगभोइ भिक्खू भिक्खं विहं जायइ जीवियट्ठी ।
 ते नाइसंजोगमविप्पहाय कायोवगा नन्तकरा भवन्ति ॥ १० ॥
 इमं वयं तु तुम पाउकुव्वं पावाइणो गरिहसि सव्व एव ।
 पावाइणो पुढो पुढो किट्टयन्ता सयं सयं दिट्ठि करोन्ति पाउ ॥ ११ ॥
 ते अन्नमन्नस्स उ गरहमाणा अक्खन्ति भो समणा माहणा य ।
 सओ य अत्थी असओ य नत्थि गरहामु दिट्ठिं न गरहामु किंचि ॥ १२ ॥

न किंचि रूवेण भिधारयामो सदिट्टिमग्गं तु करेसु पाउं ।
 मग्गे इमे किट्ठिएं आरिएहिं अणुत्तरे सप्पुरिसेहि अञ्जू ॥ १३ ॥
 उट्ठं अहे यं तिरियं दिसासु तसा य जे थावर जे य पाणा ।
 भयाहिसंकाभि दुगुच्छमाणा नो गरहइ बुसिमं किंचि लोए ॥ १४ ॥
 आगन्तगारे आरामगारे समणे उ भीए न उवेइ वासं ।
 दक्खा हु सन्ती बहवे मणुस्सा ऊणाइरित्ता य लवालवा य ॥ १५ ॥
 मेहाविणो सिक्खिय बुद्धिमन्ता सुत्तेहि अत्थेहि य निच्छयन्ना ।
 पुच्छिसु मा णे अणगार अन्ने इइ संकमाणो न उवेइ तत्थ ॥ १६ ॥
 नाकामकिच्चा न य वालकिच्चा रायाभियोगेण कुओ भएणं ।
 वियागरेज्ज पसिणं न वा वि सकामकिच्चेणिह आरियाणं ॥ १७ ॥
 गन्ता च तत्था अदुवा अगन्ता वियागरेज्जा सभियासुपन्ने ।
 अणारिया दंसणओ परिच्चा इइ संकमाणो न उवेइ तत्थ ॥ १८ ॥
 पण्णं जहा वणिए उदयट्ठी आयस्स हेउं पगरेइ सङ्गं ।
 तयोवमे समणे नायपुत्ते इच्चेव मे होइ मई वियक्को ॥ १९ ॥
 नवं न कुञ्जा विहुणे पुराणं चिच्चा मइं ताइ यमाह एवं ।
 एयावया वम्भवइ त्ति बुत्ता तस्सोदयट्ठी समणे त्ति बेमि ॥ २० ॥
 समारभन्ते वणिया भूयगामं परिग्गहं चेव ममायमाणा ।
 ते नाइसंजोगमविप्पहाय आयस्स हेउं पगरेन्ति सङ्गं ॥ २१ ॥
 वित्तेसिणो मेहुणसंपगाढा ते भोयणट्ठा वणिया वयन्ति ।
 वयं तु कामेसु अज्झोववन्ना अणारिया पेमरसेसु गिद्धा ॥ २२ ॥
 आरम्भगं चेव परिग्गहं च अविउस्सिया निस्सिय आयदण्डा ।
 तेसिं च से उदए जं वयासी चउरन्तणन्ताय दुहाय नेह ॥ २३ ॥
 नेगन्ति नचन्ति य ओदए सो वयन्ति ते दो विगुणोदयम्मि ।
 से उदए साइमणन्तपत्ते तमुदयं साहयइ ताइ नाई ॥ २४ ॥
 अहिसयं सव्वपयाणुकम्पी धम्मे ठियं कम्मविवेगहेउं ।
 तमायदण्डेहि समायरन्ता अबोहिए ते पडिरूवमेयं ॥ २५ ॥

पिण्णागपिण्डीमवि विद्ध स्रले केई पएज्जा पुरिसे इमे त्ति ।
 अलाउयं वा वि कुमारए त्ति स लिप्पई पाणिवहेण अम्हं ॥ २६ ॥
 अहवा वि विद्धूण मिलक्खु स्रले पिण्णागबुद्धीह नरं पएज्जा ।
 कुमारगं वा वि अलाबुयं ति न लिप्पई पाणिवहेण अम्हं ॥ २७ ॥
 पुरिसं च विद्धूण कुमारगं वा मूलंमि केई पए जायतेए ।
 पिण्णागपिण्डं सइमारुहेत्ता बुद्धाण तं कप्पइ पारणाए ॥ २८ ॥
 सिणायगाणं तु दुवे सहस्से जे भोयए नियए भिक्खुयाणं ।
 ते पुण्णखन्धं सुमहं जिणित्ता भवन्ति आरोप्प महन्त सत्ता ॥ २९ ॥
 अजोगरूवं इह संजयाणं पावं तु पाणाण पसज्झ काउं ।
 अबोहिए दोण्ह वि तं असाहु वयन्ति जे यावि पडिस्सुणन्ति ॥ ३० ॥
 उडुं अहे यं तिरियं दिसासु विन्नाय लिङ्गं तसथावराणं ।
 भूयाभिसंकाइ दुगुञ्छमाणे वए करेज्जा व कुओ विहात्थि ॥ ३१ ॥
 पुरिसे त्ति विन्नत्ति न एवमत्थि अणारिए से पुरिसे तहा हु ।
 को संभवो पिण्णागपिण्डियाए वाया वि एसा बुइया असच्चा ॥ ३२ ॥
 वायाभियोगेण जमावहेज्जा नो तारिसं वायमुदाहरेज्जा ।
 अट्ठाणमेयं वयणं गुणाणं नो दिक्खिए वूय मुरालमेयं ॥ ३३ ॥
 लद्धे अट्ठे अहो एव तुब्भे जीवाणुभागे सुविचिन्तिए व ।
 पुव्वं समुदं अवरं च पुट्ठे ओलोइए पाणितले ठिए वा ॥ ३४ ॥
 जीवाणुभागं सुविचिन्तयन्ता आहारिया अन्नविहीए सोहिं ।
 न वियागरे छन्नपओपजीवी एसोऽणुधम्मो इह संजयाणं ॥ ३५ ॥
 सिणायगाणं तु दुवे सहस्से जे भोयए नियए भिक्खुयाणं ।
 असंजए लोहियपाणि से ऊ नियच्छई गरिहमिहेव लोए ॥ ३६ ॥
 थूलं उरब्भं इह मारियाणं उद्दिट्ठभत्तं च पगप्पएत्ता ।
 तं लोणतेल्लेण उवक्खडेत्ता सपिप्पलीयं पगरन्ति मंसं ॥ ३७ ॥
 तं भुज्जमाणा पिसियं पभूयं नो ओवल्लिप्पामु वयं रएणं ।
 इच्चेवमाहंसु अणज्जधम्मा अणारिया बाल रसेसु गिद्धा ॥ ३८ ॥

ते यावि भुज्जन्ति तहप्पगारं सेवन्ति ते पावमजाणमाणा ।
 मणं न एयं कुसला करेन्ति वाया वि एसा बुइया उ मिच्छा ॥ ३९ ॥
 सव्वेसि जीवाण दयद्वयाए सावज्जदोसं परिवज्जयन्ता ।
 तस्संकिणो इस्सिणो नायपुत्ता उद्विट्ठमत्तं परिवज्जयन्ति ॥ ४० ॥
 भूयाभिसंकाए दुग्गुच्छमाणा सव्वेसि पाणाण निहाय दण्डं ।
 तम्हा न भुज्जन्ति तहप्पगारं एसोऽणुधम्मो इह संजयाणं ॥ ४१ ॥
 निग्गन्थधम्मम्मि इमं समाहिं अस्सि सुट्ठिच्चा अणिहे चरेज्जा ।
 बुद्धे सुणी सीलगुणोववेए अच्चन्थतं पाउणई सिलोमं ॥ ४२ ॥
 सिणायगाणं तु दुवे सहस्से जे भोयए नियए माहणाणं ।
 ते पुण्णखन्धे सुमहज्जणिच्चा भवन्ति देवा इइ वेयवाओ ॥ ४३ ॥
 सिणायगाणं तु दुवे सहस्से जे भोयए नियए कुलालयाणं ।
 ते गच्छई लोलुवसंपगाढे तिव्वाभितावी नरगाभिसेवी ॥ ४४ ॥
 दयावरं धम्मं दुग्गुच्छमाणा वहावहं धम्मं पसंसमाणा ।
 एमं पि जे भोययई अमीलं निवो निसं जाइ कुओऽसुरेहिं ॥ ४५ ॥
 दुहओ वि धम्मम्मि समुट्ठियामो अस्सि सुट्ठिच्चा तह एसकालं ।
 आयाससीले बुइएह नाणी न संपरायम्मि विसेसमत्थि ॥ ४६ ॥
 अव्वत्तरुवं पुरिसं महन्तं सणातणं अक्खयमव्वयं च ।
 सव्वेसु भूएसु वि सव्वओ से चन्दो व ताराहि समत्तरुवे ॥ ४७ ॥
 एवं न मिज्जन्ति न संसरन्ति न माहणा खत्तिथ वेस पेसा ।
 कीडा य पक्खी य सरीसिवा य नरा य सव्वे तह देवलोगा ॥ ४८ ॥
 लोगं अयाणिच्चिह केवलेणं कहन्ति जे धम्ममजाणमाणा ।
 नासन्ति अप्पाण परं च नट्टा संसार घोरम्मि अणोरपारे ॥ ४९ ॥
 लोगं विजाणन्तिह केवलेणं पुण्णेण नाणेण समाहिजुत्ता ।
 धम्मं समत्तं च कहन्ति जे उ तारन्ति अप्पाण परं च तिण्णा ॥ ५० ॥
 जे गरहियं ठाणमिहावसन्ति जे यावि लोए चरणोववेया ।
 उदाहडं तं तु समं मईए अहाउसो विप्परियासमेव ॥ ५१ ॥

संवच्छरेणावि य एगमेगं बाणेण मारेउ महागयं तु ।
 सेसाण जीवाण दयदयाए वासं वयं वित्ति पक्कपयामो ॥ ५२ ॥
 संवच्छरेणावि य एगमेगं पाणं हणन्ता अणियत्तदोसा ।
 सेसाण जीवाण वहेण लग्गा सिया य थोवं गिहिणो वि तम्हा ॥ ५३ ॥
 संवच्छरेणावि य एगमेगं पाणं हणन्ता समणव्वएसु ।
 आयाहिए से पुरिसे अणजे न तारिसे केवल्लिणो भवन्ति ॥ ५४ ॥
 बुद्धस्स आणाएँ इमं समाहिं अस्सिं सुठिच्चा तिविहेण ताई ।
 तरिउं समुदं व महाभवोवं आयाणवं धम्ममुदाहरेज्ज ॥ ५५ ॥
 त्ति बेमि ॥

अहइज्जज्झयणं छट्ठं

नालन्दइज्जज्झयणे सत्तमे

2. 7.

तेणं कालेणं तेणं समएणं रायगिहे नामं नयरे होत्था रिद्धि-
 त्थिमियसमिद्धे (वण्णओ) जाव पडिरूवे । तस्स णं रायगिहस्स नयरस्स
 बहिया उत्तरपुरत्थिमे दिसीभाए एत्थ णं नालन्दा नामं बाहिरिया
 होत्था अणेगभवणसयसंनिविद्धा जाव पडिरूवा । तत्थ णं नालन्दाए
 बाहिरियाए लेवे नामं गाहावई होत्था अट्ठे दित्ते वित्ते वित्थिण्णविपुल-
 भवणसयणासणजाणवाहणाइण्णे बहुधणबहुजायरूवरजए आओग-
 पओगसंपउत्ते विच्छड्डियपउरभत्तपाणे बहुदासीदासगोमहिसगवेलग-
 प्पभूए बहुजणस्स अपरिभूए यावि होत्था ॥ १ ॥

से णं लेवे नामं गाहावई समणोवासए यावि होत्था अभिगय-
 जीवाजीवे जाव विहरइ निग्गन्थे पावयणे निस्संकिए निक्कंखिए निव्विइ-
 गिच्छे लद्धे गहियट्ठे पुच्छियट्ठे विणिच्छियट्ठे अभिगहियट्ठे अट्ठिमिज्जा
 पेमाणुरागरत्ते । अयमाउसो निग्गन्थे पावयणे, अयं अट्ठे, अयं परमट्ठे,
 सेसे अणट्ठे, उस्सियफलिहे अप्पावयदुवारि चियत्तन्तेउरप्पवेसे चाउइसट्ठ-

मुदिट्टपुण्णमामिणीसु पडिपुण्णं पोसहं सम्मं अणुपालेमाणे समणे
निग्गन्थे तहाविहेणं एसणिज्जेणं असणपाणखाइमसाइमेणं पडिलाभेमाणे
बह्महिं सीलव्वयगुणविरमणपच्चक्खाणपोसहोववासेहिं अप्पाणं भावेमाणे
एवं च णं विहरइ ॥ २ ॥

तम्म णं लेवस्स गाहावइस्स नालन्दाए बाहिरियाए उत्तरपुगत्थिमे
दिसिभाए एत्थ णं सेसदविया नामं उदगमाला होत्था अणेगखम्म-
मयमंनिविट्ठा पामादीया जाव पडिस्सवा । तीसे णं सेसदवियाए उदग-
मालाए उत्तरपुगत्थिमे दिसिभाए एत्थ णं हत्थिजामे नामं वणसण्डे
होत्था किण्हे (वण्णओ वणमण्डस्स) ॥ ३ ॥

तम्मिं च णं गिहपदेसम्मि भगवं गोयमे विहरइ, भगवं च णं अहे
आगमंमि । अहे णं उदए पेढालपुत्ते भगवं पासावच्चिजे निगण्ठे मेयजे
गोत्तेणं जेणेव भगवं गोयमे तेणेव उवागच्छइ, उवागच्छित्ता भगवं
गोयमं एवं वयासी-आउमंतो गोयमा, अत्थि खलु मे केइ पदेसे
पुच्छियव्वे, तं च आउमो अहामुयं अहादगिसियं मे वियागरेहि सवायं ।
भगवं गोयमे उदयं पेढालपुत्तं एवं वयासी-अवियाइ आउमो, सोच्चा
निमम्म जाणिस्सामो सवायं । उदए पेढालपुत्ते भगवं गोयमं एवं वयासी ॥ ४ ॥

आउमो गोयमा, अत्थि खलु कुमारपुत्तिया नाम समणा निग्गन्था
तुम्हाणं पवयणं पवयमाणा गाहावइं समणोवासगं उवसंपन्नं एवं पच्च-
क्खावेन्ति । नन्नन्थ अभिओएणं गाहावइचोरग्गहणविमोक्खणयाए तसेहिं
पाणेहिं निहाय दण्डं । एवं ञ्हं पच्चक्खन्ताणं दुप्पच्चक्खायं भवइ ।
एवं ञ्हं पच्चक्खावेमाणानं दुप्पच्चक्खावियव्वं भवइ । एवं ते परं पच्च-
क्खावेमाणा अइयरन्ति सयं पइण्णं । कस्स णं तं हेउं ? संसारिया
खलु पाणा, थावरग वि पाणा तसत्ताए पच्चायन्ति, तसा वि पाणा थावर-
त्ताए पच्चायन्ति, थावरकायाओ विप्पमुच्चमाणा तसकायंमि उववज्जन्ति,
तसकायाओ विप्पमुच्चमाणा थावरकायंसि उववज्जन्ति । तेसिं च णं थावर-
कायंसि उववण्णाणं ठाणमेयं वत्तं ॥ ५ ॥

एवं ण्हं पच्चक्खन्ताणं सुपच्चक्खायं भवइ । एवं ण्हं पच्चक्खावे-
माणाणं सुपच्चक्खावियं भवइ । एवं ते परं पच्चक्खावेमाणा नाइयरन्ति
सयं पइण्णं नन्नत्थ अभियोगेणं गाहावइचोरग्गहणाविमोक्खणयाए
तसभूएहिं पाणेहिं निहाय दण्डं । एवमेव सइ भासाए परक्कमे विज्जमाणे
जे ते कोहा वा लोहा वा परं पच्चक्खावेन्ति अयं पि नो उवएसे नो
नेयाउए भवइ । अवियाइ आउसो गोयमा तुब्भं पि एवं रोयइ ? ॥६॥

सवायं भगवं गोयमे उदयं पेढालपुत्तं एवं वयासी-आउसन्तो
उदगा, नो खलु अग्हे एयं रोयइ । जे ते समणा वा माहणा वा एव-
माइक्खन्ति जाव परूवेन्ति नो खलु ते समणा वा निग्गन्था भासं
भासन्ति, अणुतावियं खलु ते भासं भासन्ति, अब्भाइक्खन्ति खलु ते
समणे समणोवासए वा जेहिं पि अन्नेहिं जीवेहिं पाणेहिं भूएहिं
सत्तेहिं संजमयन्ति ताण वि ते अब्भाइक्खन्ति । कस्स णं तं हेउं ?
संसारिया खलु पाणा, तसा वि पाणा थावरत्ताए पचायन्ति थावरा वि
वा पाणा तसत्ताए पचायन्ति तसकायाओ विप्पमुच्चमाणा थावरकायंसि
उववज्जन्ति, थावरकायाओ विप्पमुच्चमाणा तसकायंसि उववज्जन्ति, तेसिं
च णं तसकायंसि उववन्नाणं ठाणमेयं अघत्तं ॥ ७ ॥

सवायं उदए पेढालपुत्ते भगवं गोयमं एवं वयासी-कयरे खलु ते
आउसन्तो गोयमा तुब्भे वयह तसा पाणा तसा आउ अन्नहा ? सवायं
भगवं गोयमे उदयं पेढालपुत्तं एवं वयासी-आउसन्तो उदगा जे तुब्भे
वयह तसभूया पाणा तसा ते वयं वयामो तसा पाणा, ये वयं वयामो तसा
पाणा ते तुब्भे वयह तसभूया पाणा । एए सन्ति दुवे ठाणा तुल्ला एगट्ठा ।
किमाउसो इमे भे सुप्पणीयतराए भवइ तसभूया पाणा तसा, इमे भे दुप्पणी-
यतराए भवइ-तसा पाणा तसा । तओ एगमाउसो पडिक्कोसह एकं अभि-
नन्दह । अयं पि भेदो से नो नेयाउए भवइ । भगवं च णं उदाहु-सन्ते-
गइया मणुस्सा भवन्ति, तेसिं च जं एवं वुत्तपुव्वं भवइ-नो खलु वयं
संचाएमो मुण्डा भवित्ता अगाराओ अणगारियं पव्वइत्तए । सावयं ण्हं

अणुपुब्बेणं गुत्तस्स लिसिस्सामो । ते एवं संखवेन्ति, ते एवं संखं ठवयन्ति ते एवं संखं ठवयन्ति नन्नत्थ अभिओएणं गाहावइचोरग्गहण-
विमोक्खणयाए तसेहिं पाणेहिं निहाय दण्डं । तं पि तेसिं कुसलमेव भवइ ॥ ८ ॥

तसा वि वुच्चन्ति तसा तससंभारकडेणं कम्मणा नामं च णं अब्भुव-
गयं भवइ, तसाउयं च णं पलिक्खीणं भवइ, तसकायट्ठिइया ते तओ आउयं विप्पजहन्ति । ते तओ आउयं विप्पजहिता थावरत्ताए पचायन्ति । थावरा वि वुच्चन्ति थावरा थावरसंभारकडेणं कम्मणा नामं च णं अब्भुवगयं भवइ थावराउयं च णं पलिक्खीणं भवइ । थावर-
कायट्ठिइया ते तओ आउयं विप्पजहन्ति तओ आउयं विप्पजहिता भुज्जो परलोइयत्ताए पचायन्ति । ते पाणा वि वुच्चन्ति, ते तसा वि वुच्चन्ति, ते महाकाया ते चिरट्ठिइया ॥ ९ ॥

सवायं उदए पेढालपुत्ते भयवं गोयमं एवं वयासी—आउसन्तो गोयमा नत्थि णं से केइ परियाए जं णं ससणोवासगस्स एगपाणाइवाय-
धिरए वि दण्डे निविस्सते । कस्स णं तं हेउं ? संसारिया खलु पाणा, थावरा वि पाणा तसत्ताए पचायन्ति, तसा वि पाणा थावरत्ताए पचा-
यन्ति, थावरकायाओ विप्पमुच्चमाणा सव्वे तसकायंसि उववज्जन्ति, तस-
कायाओ विप्पमुच्चमाणा सव्वे थावरकायंसि उववज्जन्ति, तेसिं च णं थावरकायंसि उववन्नाणं ठाणमेयं घत्तं । सवायं भगवं गोयमे उदयं पेढालपुत्तं एवं वयासी—नो खलु आउसो अम्हाकं वत्तच्चएणं तुव्वं चेव अणुप्पवाएणं अत्थि णं से परियाए जे णं ससणोवासगस्स सव्वपाणेहिं सव्वभूएहिं सव्वजीवेहिं सव्वसत्तेहिं दण्डे निविस्सते भवइ । कस्स णं तं हेउं ? संसारिया खलु पाणा, तसा वि पाणा थावरत्ताए पचायन्ति, थावरा वि पाणा तसत्ताए पचायन्ति, तसकायाओ विप्पमुच्चमाणा सव्वे थावरकायंसि उववज्जन्ति, थावरकायाओ विप्पमुच्चमाणा सव्वे तस-
कायंसि उववज्जन्ति, तेसिं च णं तसकायंसि उववन्नाणं ठाणमेयं अघत्तं ।

ते पाणा वि बुच्चन्ति, ते तसा वि बुच्चन्ति, ते महाकाया ते चिरट्ठिइया । ते बहुयरगा पाणा जेहिं समणोवासगस्स सुपच्चक्खायं भवइ । ते अप्पयरगा पाणा जेहिं समणोवासगस्स अपच्चक्खायं भवइ । से महया तसकायाओ उवसन्तस्स उवट्ठियस्स पडिविरयस्स जं णं तुब्भे वा अन्नो वा एवं वयह-नत्थि णं से केइ परियाए जंसि समणोवासगस्स एगपाणाए वि दण्डे निक्खित्ते । अयं पि भेदे से नो नेयाउए भवइ ॥ १० ॥

भगवं च णं उदाहु नियण्ठा खलु पुच्छियव्वा । आउसन्तो नियण्ठा इह खलु सन्तेगइया मणुस्सा भवन्ति । तेसिं च एवं वुत्तपुव्वं भवइ-जे इमे मुडे भवित्ता अगाराओ अणगारियं पव्वइए एसिं च णं आमरणन्ताए दण्डे निक्खित्ते । जे इमे अगारमावसन्ति एएसिं णं आमरणन्ताए दण्डे नो निक्खित्ते । केई च णं समणा जाव वासाइं चउपञ्चमाइं छट्ठदसमाइं अप्पयरो वा भुज्जयरो वा देसं दूइज्जित्ता अगार-मावसेज्जा ? हंता-वसेज्जा । तस्स णं तं गारत्थं वहमाणस्स से पच्चक्खाणे भज्जे भवइ ? नो इण्ठे समट्ठे । एवमेव समणोवासगस्स वि तसेहिं पाणेहिं दण्डे निक्खित्ते, थावरेहिं पाणेहिं दण्डे नो निक्खित्ते । तस्स णं तं थावरकायं वहमाणस्स से पच्चक्खाणे नो भज्जे भवइ । से एवमायाणह ? नियण्ठा । एवमायाणियव्वं ॥ भगवं च णं उदाहु नियण्ठा खलु पुच्छियव्वा-आउसन्तो नियण्ठा इह खलु गाहावई वा गाहावइपुत्तो वा तहप्पगारेहिं कुलेहिं आगम्म धम्मं सवणवत्तियं उवसं-कमेज्जा ? हन्ता उवसंकमेज्जा । तेसिं च णं तहप्पगाराणं धम्मं आइक्खियव्वे ? हन्ता आइक्खियव्वे । किं ते तहप्पगारं धम्मं सोच्चा निसम्म एवं वएज्जा-इणमेव निग्गन्थं पावयणं सच्चं अणुत्तरं केवलियं पडिपुण्णं संसुद्धं नेयाउयं सहकत्तणं सिद्धिमग्गं मुत्तिमग्गं निज्जाणमग्गं निव्वाणमग्गं अवितहमसं-दिद्धं सव्वदुक्खप्पहीणमग्गं । एत्थ ठिया जीवा सिज्झन्ति बुज्झन्ति मुच्चन्ति परिणिव्वायन्ति सव्वदुक्खाणमन्तं करोन्ति । तमाणाए तहा गच्छामो तहा चिट्ठामो तहा निसीयामो तहा तुयट्ठामो तहा भुज्जामो

तहा भासामो तहा अब्भुट्टामो तहा उट्ठाए उट्ठेमो त्ति पाणाणं भूयाणं जीवाणं सत्ताणं संजमेणं संजमामो त्ति वएज्जा ? हन्ता वएज्जा । किं ते तहप्पगारा कप्पन्ति पव्वावित्तए ? हन्ता कप्पन्ति । किं ते तहप्पगारा कप्पन्ति मुण्डावित्तए ? हन्ता कप्पन्ति । किं ते तहप्पगारा कप्पन्ति सिक्खावित्तए ? हन्ता कप्पन्ति । किं ते तहप्पगारा कप्पन्ति उवट्ठावित्तए ? हन्ता कप्पन्ति । तेसिं च णं तहप्पगाराणं सव्वपाणेहिं जाव सव्वसत्तेहिं दण्डे निक्खित्ते ? हन्ता निक्खित्ते । से णं एयारूवेणं विहारेणं विहरमाणा जाव वासाइं चउपश्चमाइं छट्ठदसमाइं वा अप्पयरो वा भुज्जयरो वा देसं दूइजेत्ता अगारं वएज्जा ? हन्ता वएज्जा । तस्स णं सव्वपाणेहिं जाव सव्वसत्तेहिं दण्डे नो निक्खित्ते ? नो इण्ठे समट्ठे । से जे से जीवे जस्स परेणं सव्वपाणेहिं जाव सव्वसत्तेहिं दण्डे नो निक्खित्ते । से जे से जीवे जस्स आरेणं सव्वपाणेहिं जाव सत्तेहिं दण्डे निक्खित्ते । से जे से जीवे जस्स इयाणिं सव्वपाणेहिं जाव सत्तेहिं दण्डे नो निक्खित्ते भवइ, परेणं असंजए आरेणं संजए, इयाणिं असंजए, असंजयस्स णं सव्वपाणेहिं जाव सत्तेहिं दण्डे नो निक्खित्ते भवइ । से एवमायाणह ? नियण्ठा से एवमायाणियव्वं ॥ भगवं च णं उदाहु नियण्ठा खलु पुच्छियव्वा-आउसन्तो नियण्ठा इह खलु परिव्वाइया वा परिव्वाइयाओ वा अन्नयरेहितो तित्थाययणेहितो आगम्म धम्मं सवणवत्तियं उवसंक्रमेज्जा ? हन्ता उवसंक्रमेज्जा । किं तेसिं तहप्पगारेणं धम्मं आइक्खियव्वे ? हन्ता आइक्खियव्वे । तं चेव उवट्ठावित्तए जाव कप्पन्ति ? हन्ता कप्पन्ति । किं ते तहप्पगारा कप्पन्ति संभुज्जित्तए ? हन्ता कप्पन्ति । तेणं एयारूवेणं विहारेणं विहरमाणा तं चेव जाव अगारं वएज्जा ? हन्ता वएज्जा । ते णं तहप्पगारा कप्पन्ति संभुज्जित्तए ? नो इण्ठे समट्ठे । से जे से जीवे जे परेणं नो कप्पन्ति संभुज्जित्तए । से जे से जीवे आरेणं कप्पन्ति संभुज्जित्तए । से जे से जीवे जे इयाणिं नो कप्पन्ति संभुज्जित्तए । परेणं अस्समणे आरेणं समणे, इयाणिं अस्समणे,

अस्समणेणं सद्धिं नो कप्पन्ति समणाणं निगन्थाणं संयुञ्जितए । से
एवमायाणह ? नियण्ठा से एवमायाणियव्वं ॥ ११ ॥

भगवं च णं उदाहु सन्तेगइया समणोवासगा भवन्ति । तेसिं च णं
एवं वुत्तपुव्वं भवइ—नो खलु वयं संचाएमो मुण्डा भवित्ता अगाराओ
अणगारियं पव्वइत्तए । वयं णं चाउद्दसमुद्दिट्ठपुण्णिमासिणीसु पडिपुण्णं
पोसहं सम्मं अणुपालेमाणा विहारिस्सामो । थूलगं पाणाइवायं पच्चक्खाइ-
स्सामो, एवं थूलगं मुसावायं थूलगं अदिन्नादाणं थूलगं मेहुणं थूलगं
परिग्गहं पच्चक्खाइस्सामो । इच्छापरिमाणं करिस्सामो, दुविहं तिविहेणं ।
मा खलु ममट्ठाए किंचि करेह वा करावेह वा तत्थ वि पच्चक्खाइस्सामो ।
ते णं अमोच्चा अपिच्चा असिणाइत्ता आसन्दीपेठियाओ पच्चारुहिता, ते तहा
कालगया किं वत्तव्वं सिया—सम्मं कालगय त्ति ? वत्तव्वं सिया । ते
पाणा वि वुच्चन्ति ते तसा वि वुच्चन्ति ते महाकाया ते चिराट्ठिइया । ते
बहुयरगा पाणा जेहिं समणोवासगस्स सुपच्चक्खायं भवइ । ते अप्प-
यरगा पाणा जेहिं समणोवासगस्स अपच्चक्खायं भवइ । इति से महयाओ
जं णं तुब्भे वयह तं चेव जाव अयं पि भेदे से नो नेयाउए भवइ ॥
भगवं च णं उदाहु सन्तेगइया समणोवासगा भवन्ति । तेसिं च णं
एवं वुत्तपुव्वं भवइ—नो खलु वयं संचाएमो मुण्डा भवित्ता अगा-
राओ जाव पव्वइत्तए । नो खलु वयं संचाएमो चाउद्दसमुद्दिट्ठपुण्ण-
मासिणीसु जाव अणुपालेपाणे विहरित्तए । वयं णं अपच्छिममामरणन्तियं
संलेहणाजूसणाजूसिया भत्तपाणं पडियाइक्खिया जाव कालं अणव-
कंखमाणा विहारिस्सामो । सव्वं पाणाइवायं पच्चक्खाइस्सामो जाव सव्वं
परिग्गहं पच्चक्खाइस्सामो तिविहं तिविहेणं मा खलु ममट्ठाए किंचि
वि जाव आसन्दीपेठियाओ पच्चोरुहिता एए तहा कालगया, किं
वत्तव्वं सिया सम्मं कालगय त्ति ? वत्तव्वं सिया । ते पाणा वि वुच्चन्ति
जाव अयं पि भेदे से नो नेयाउए भवइ ॥ भगवं च णं उदाहु सन्ते-
गइया मणुस्सा भवन्ति । तं जहा—महइच्छा महारम्भा महापरिग्गहा

णं उदाहु सन्तेगइया मणुस्सा भवन्ति । तं जहा—अणारम्भा अपरिग्गहां धम्मिया धम्माणया जाव सच्चाओ परिग्गहाओ पडिविरया जावजीवाए, जेहिं समणोवासगस्स आयाणसो आमरणन्ताए दण्डे निब्बिखत्ते, ते तओ आउगं विप्पजहन्ति, ते तओ भुज्जो सगमायाए सोग्गइगामिणो भवन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्तेगइया मणुस्सा भवन्ति । तं जहा—अप्पिच्छा अप्पारम्भा अप्पपरिग्गहां धम्मिया धम्माणया जाव एग्गच्चाओ परिग्गहाओ अप्पडिविरया, जेहिं समणोवासगस्स आयाणसो आमरणन्ताए दण्डे निब्बिखत्ते । ते तओ आउगं विप्पजहन्ति, तओ भुज्जो सगमादाए सोग्गइगामिणो भवन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्तेगइया मणुस्सा भवन्ति । तं जहा—आरणिण्या आवसहिया गामणियन्तिया कण्हुईरहस्सिया, जेहिं समणोवासगस्स आयाणसो आमरणन्ताए दण्डे निब्बिखत्ते भवइ । नो बहुसंजया नो बहुपडिविरया पाणभूयजीवसत्तेहिं । अप्पणा सच्चाओसाइं एवं विप्पडिवेदेन्ति—अहं न हन्तव्वो अन्ने हन्तव्वा जाव कालमासे कालं किच्चा अन्नयराइं आसुरियाइं किव्विसियाइं जाव उववत्तारो भवन्ति, तओ विप्पमुच्चमाणा भुज्जो एल्लुयत्ताए तमोरूवत्ताए पच्चायन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्तेगइया पाणा दीहाउया जेहिं समणोवासगस्स आयाणसो आमरणन्ताए जाव दण्डे निब्बिखत्ते भवइ । ते पुव्वामेव कालं करेन्ति करित्ता पारलोइयत्ताए पच्चायन्ति । ते पाणा वि बुच्चन्ति, ते तसा वि बुच्चन्ति । ते महाकाया ते चिरट्ठिइया ते दीहाउया ते बहुयरगा, जेहिं समणोवासगस्स सुपच्चक्खायं भवइ, जाव नो नेयाउए भवइ । भगवं च णं उदाहु सन्तेगइया पाणा समाउया, जेहिं समणोवासगस्स आयाणसो आमरणन्ताए जाव दण्डे निब्बिखत्ते भवइ । ते सयमेव कालं करेन्ति, करित्ता पारलोइयत्ताए पच्चायन्ति । ते पाणा वि बुच्चन्ति, तसा वि बुच्चन्ति, ते

મહાકાયા તે સમાડયા તે બહુયરગા જેહિં સમળોવાસગસ્સ સુપચ્ચક્ષાયં
 ભવઈ જાવ નો નેયાડે ભવઈ । ભગવં ચ ણં ઉદાહુ સન્તેગઈયા પાળા
 અપ્પાડયા, જેહિં સમળોવાસગસ્સ આયાળસો આમરણન્તાએ જાવ દણ્ડે
 નિક્કિલ્લે ભવઈ । તે પુવ્વામેવ કાલં કરેન્તિ, કરેન્તા પારલોહ્યત્તાએ
 પચ્ચાયન્તિ । તે પાળા વિ બુચ્ચન્તિ, તે તસા વિ બુચ્ચન્તિ, તે મહાકાયા
 તે અપ્પાડયા તે બહુયરગા પાળા, જેહિં સમળોવાસગસ્સ સુપચ્ચક્ષાયં
 ભવઈ, જાવ નો નેયાડે ભવઈ । ભગવં ચ ણં ઉદાહુ સન્તેગઈયા સમળો-
 વાસગા ભવન્તિ । તેસિં ચ ણં એવં વુત્તપુવ્વં ભવઈ— નો સ્ખલુ વયં સંચા-
 એમો મુળ્લે ભવિત્તા જાવ પવ્વઈત્તાએ । નો સ્ખલુ વયં સંચાએમો ચાઉદસદ્ધ-
 મુદ્ધિદ્ધપુણ્ણમાસિણીસુ પઠ્ઠિપુણ્ણં પોસહં અણુપાલિત્તાએ । નો સ્ખલુ વયં
 સંચાએમો અપચ્છિમ્મં જાવ વિહરિત્તાએ । વયં ચ ણં સામાઈયં દેસાવગાસિયં
 પુરત્થા પાઈણં વા પડીણં વા દાહિણં વા ઉદીણં વા યયાવયા જાવ
 સવ્વપાળેહિં જાવ સવ્વસત્તેહિં દણ્ડે નિક્કિલ્લે સવ્વપાળભૂયજીવસત્તેહિં
 સ્ખેમંકરે અહમંસિ । તત્થ આરેણં જે તસા પાળા જેહિં સમળોવાસગસ્સ
 આયાળસો આમરણન્તાએ દણ્ડે નિક્કિલ્લે । તઓ આડં વિપ્પજહંતિ,
 વિપ્પજહિત્તા તત્થ આરેણં ચેવ જે તસા પાળા જેહિં સમળોવાસગસ્સ
 આયાળસો જાવ તેસુ પચ્ચાયન્તિ, જેહિં સમળોવાસગસ્સ સુપચ્ચક્ષાયં
 ભવઈ । તે પાળા વિ જાવ અયં પિ ભેદે જાવ નેયાડે ભવઈ ॥ ૧૨ ॥

તત્થ આરેણં જે તસા પાળા જેહિં સમળોવાસગસ્સ આયાળસો આમર-
 ણન્તાએ દણ્ડે નિક્કિલ્લે તે તઓ આડં વિપ્પજહન્તિ । વિપ્પજહિત્તા તત્થ
 આરેણં ચેવ જાવ થાવરા પાળા જેહિં સમળોવાસગસ્સ અદ્દાએ દણ્ડે અનિ-
 ક્કિલ્લે અણદ્દાએ દણ્ડે નિક્કિલ્લે તેસુ પચ્ચાયન્તિ । તેહિં સમળોવાસગસ્સ
 અદ્દાએ દણ્ડે અનિક્કિલ્લે અણદ્દાએ દણ્ડે નિક્કિલ્લે, તે પાળા વિ બુચ્ચન્તિ,
 તે તસા તે ચિરદ્ધિયા જાવ અયં પિ ભેદે સે.... । તત્થ જે આરેણં તસા
 પાળા જેહિં સમળોવાસગસ્સ આયાળસો આમરણન્તાએ....તઓ આડં
 વિપ્પજહન્તિ, વિપ્પજહિત્તા તત્થ પરેણં જે તસા થાવરા પાળા જેહિં સમ-

णोवासगस्स आयाणसो आमरणन्ताए....तेसु पच्चायन्ति, तेहिं समणोवास-
 गस्स सुपच्चक्खायं भवइ, ते पाणा वि जाव अयं पि भेदे से....। तत्थ
 जे आरेणं थावरा पाणा जेहिं समणोवासगस्स अट्टाए दण्डे अणिक्खित्ते
 अणट्टाए निक्खित्ते ते तओ आउं विप्पजहन्ति, विप्पजहिता तत्थ आरेणं
 चेव जे तसा पाणा जेहिं समणोवासगस्स आयाणसो आमरणन्ताए....
 तेसु पच्चायन्ति, तेसु समणोवासगस्स सुपच्चक्खायं भवइ, ते पाणा वि
 जाव अयं पि भेदे से....। तत्थ जे ते आरेणं जे थावरा पाणा जेहिं सम-
 णोवासगस्स अट्टाए दण्डे अणिक्खित्ते अणट्टाए निक्खित्ते, ते तओ आउं
 विप्पजहन्ति विप्पजहिता ते तत्थ आरेणं चेव जे थावरा पाणा जेहिं
 समणोवासगस्स अट्टाए दण्डे अणिक्खित्ते अणट्टाए निक्खित्ते तेसु पच्चा-
 यन्ति । तेहिं समणोवासगस्स अट्टाए अणट्टाए ते पाणा वि जाव अयं पि भेदे
 से नो....। तत्थ जे ते आरेणं थावरा पाणा जेहिं समणोवासगस्स अट्टाए
 दण्डे अणिक्खित्ते, अणट्टाए निक्खित्ते तओ आउं विप्पजहन्ति । विप्प-
 जहिता तत्थ परेणं जे तसथावरा पाणा जेहिं समणोवासगस्स आया-
 णसो आमरणन्ताए० तेसु पच्चायन्ति । तेहिं समणोवासगस्स सुपच्चक्खायं
 भवइ । ते पाणा वि जाव अयं पि भेदे से नो नेयाउए भवइ । तत्थ जे
 ते परेणं तसथावरा पाणा जेहिं समणोवासगस्स आयाणसो आमरणन्ताए
 ते तओ आउं विप्पजहन्ति, विप्पजहिता तत्थ आरेणं जे तसा पाणा जे-
 हिं समणोवासगस्स आयाणसो आमरणन्ताए....तेसु पच्चायन्ति । तेहिं
 समणोवासगस्स सुपच्चक्खायं भवइ । ते पाणा वि जाव अयं पि भेदे
 से नो नेयाउए भवइ । तत्थ जे ते परेणं तसथावरा पाणा जेहिं समणो-
 वासगस्स आयाणसो आमरणन्ताए....ते तओ आउं विप्पजहन्ति विप्पज-
 हिता तत्थ आरेणं जे थावरा पाणा जेहिं समणोवासगस्स अट्टाए दण्डे
 अणिक्खित्ते अणट्टाए निक्खित्ते तेसु पच्चायन्ति, जेहिं समणोवासगस्स
 अट्टाए अणिक्खित्ते अणट्टाए निक्खित्ते जाव ते पाणा वि जाव अयं पि
 भेदे से नो....। तत्थ ते परेणं तसथावरा पाणा जेहिं समणोवासगस्स आया-

णसो आमरणन्ताए....ते तओ आउं विप्पजहन्ति । विप्पजहिता ते तत्थ परेणं
 चेव जे तसथावरा पाणा जेहिं समणोवासगस्स आयाणसो आमरणन्ताए
 तेसु पचायन्ति, जेहिं समणोवासगस्स सुपच्चक्खायं भवइ । ते पाणा वि
 जाव अयं पि भेदे से नो....। भगवं च णं उदाहु न एयं भूयं न एयं
 भव्वं न एयं भविस्सइ जं णं तसा पाणा वोच्छिज्जिहिन्ति थावरा
 पाणा भविस्सन्ति, थावरा पाणा वि वोच्छिज्जिहिन्ति तसा पाणा भवि-
 स्सन्ति । अवोच्छिज्जेहिं तसथावरेहिं पाणेहिं जं णं तुब्भे वा अन्नो वा
 एवं वदह-नत्थि णं से केइ परियाए जाव नो नेयाउए भवइ ॥ १३ ॥

भगवं च णं उदाहु आउसन्तो उदगा जे खलु समणं वा माहणं वा
 परिभासेइ मिति मन्नन्ति आगमिता नाणं आगमिता दंसणं आगमिता
 चरित्तं पावाणं कम्माणं अकरणयाए से खलु परलोगपालिमन्थत्ताए
 चिट्ठइ, जे खलु समणं वा माहणं वा नो परिभासइ मिति मन्नन्ति आग-
 मित्ता णाणं आगमिता दंसणं आगमिता चरित्तं पावाणं कम्माणं अक-
 रणयाए से खलु परलोगविसुद्धीए चिट्ठइ । तए णं से उदए पेढालपुत्ते
 भगवं गोयमं अणाढायमाणे जामेव दिस्सि पाउब्भूए तामेव दिस्सि पहारेत्थ
 गमणाए । भगवं च णं उदाहु आउसन्तो उदगा जे खलु तहाभूयस्स
 समणस्स वा माहणस्स वा अन्तिए एगमवि आरियं धम्मियं सुवयणं
 सोच्चा निसम्म अप्पणो चेव सुहुमाए पडिलेहाए अणुत्तरं जोगखेमपयं
 लम्भिए समणे सो वि ताव तं आढाइ परिजाणेइ वन्दइ नमंसइ सका-
 रेइ सम्माणेइ जाव कल्लाणं भंगलं देवयं चेइयं पज्जुवासइ । तए णं
 से उदए पेढालपुत्ते भगवं गोयमं एवं वयासी-एएसिं णं भन्ते पदाणं
 पुंवि अन्नाणयाए असवणयाए अबोहिए अणभिगमेणं अदिट्ठाणं असु-
 याणं अमुयाणं अविन्नायाणं अव्वोगडाणं अविगूढाणं अविच्छिन्नाणं
 अणिसिट्ठाणं अणिवूढाणं अणुवहारियाणं एयमट्ठं नो सहहियं नो पत्तियं
 नो रोइयं । एएसिं णं भन्ते पदाणं एण्हि जाणयाए सवणयाए बोहिए
 जाव उवहारणयाए एयमट्ठं सहहामि पत्तियाभि रोएमि एवमेव से

जहेयं तुब्भे वदह । तए णं भगवं गोयमे उदगं पेढालपुत्तं एवं वयासी—सदहाहि णं अज्जो पत्तियाहि णं अज्जो रोएहि णं अज्जो एवमेयं जहा णं अम्हे वयामो । तए णं से उदए पेढालपुत्ते भगवं गोयमं एवं वयासी—इच्छामि णं भन्ते तुब्भं अन्तिए चाउज्जामाओ धम्माओ पञ्चमहव्वइयं सपडिक्कमणं धम्मं उवसंपज्जित्ता णं विरहित्तए ॥ तए णं से भगवं गोयमे उदगं पेढालपुत्तं गहाय जेणेव समणे भगवं महावीरे तेणेव उवागच्छइ, उवागच्छित्ता तए णं से उदए पेढालपुत्ते समणं भगवं महावीरं तिक्खुत्तो आयाहिणं पयाहिणं करेइ, तिक्खुत्तो आयाहिणं पयाहिणं करित्ता वन्दइ नमंसइ वन्दिता नमंसित्ता एवं वयासी—इच्छामि णं भन्ते तुब्भं अन्तिए चाउज्जामाओ धम्माओ पञ्चमहव्वइयं सपडिक्कमणं धम्मं उवसंपज्जित्ता णं विहारित्तए । तए णं समणे भगवं महावीरे उदगं एवं वयासी—अहासुहं देवाणुप्पिया मा पडिवन्धं करेहि । तए णं से उदए पेढालपुत्ते समणस्स भगवओ महावीरस्स अन्तिए चाउज्जामाओ धम्माओ पञ्चमहव्वइयं सपडिक्कमणं धम्मं उवसंपज्जित्ता णं विहरइ त्ति वेमि ॥ १४ ॥

॥ नालन्दइज्जज्झयणं सत्तमं ॥

सूयगडं समत्तं

श्रीभद्रबाहुविरचिता सूत्रकृताङ्गनिर्युक्तिः

Introduction:-1-32.

तित्थयेरे य जिणवरे सुत्तकरे गणहरे य णमिऊणं ।
 सूयगडस्स भगवओ णिञ्जुत्तिं किच्चइस्सामि ॥ १ ॥
 सूयगडं अङ्गाणं विइयं तस्स य इमाणि नामाणि ।
 सुत्तगडं सुत्तकडं सूयगडं चेव गोण्णाइं ॥ २ ॥
 दव्वं तु पोण्डयादी भावे सुत्तमिह सूयगं नाणं ।
 सन्नासंगहवित्ते जाइणिवद्धे य कत्थाइ ॥ ३ ॥
 करणं च कारओ य कडं च तिण्हं पि छक्कनिक्खेवो ।
 दव्वे खेत्ते काले भावेण उ कारओ जीवो ॥ ४ ॥
 दव्वं पओगवीसस पओगसा मूल उत्तरे चेव ।
 उत्तरकरणं वज्जण अत्थो उ उवक्खरो सव्वो ॥ ५ ॥
 मूलकरणं सररीणाणि पञ्च तिसु कण्णखन्धमाईयं ।
 दव्विन्दियाणि परिणामियाणि विसओसहाईहिं ॥ ६ ॥
 संघायणे य परिसाडणा य मीसे तहेव पडिसेहो ।
 पडसंखसगडथूणाउडुतिरिच्छादिकरणं च ॥ ७ ॥
 खन्धेसु दुप्पएसोदिएसु अब्भेसु विञ्जुमाईसु ।
 णिप्फण्णागाणि दव्वाणि जण तं वीससाकरणं ॥ ८ ॥
 ण विणा आगासेणं कीरइ जं किं चि खेत्तमागासं ।
 वज्जणपरियावण्णं उच्छुक्कणमाइयं बहुहा ॥ ९ ॥

कालो जो जावइओ जं कीरइ जम्मि जम्मि कालम्मि ।
 ओहेण णामओ पुण करणा एकारस हवन्ति ॥ १० ॥
 बवं च बालवं चेव, कोलवं तेत्तिलं तहा ।
 गरादि वणियं चेव, विट्ठी हवइ सत्तमा ॥ ११ ॥
 सउणि चउप्पय नागं किंसुग्घं च करणं भवे एयं ।
 एए चत्तारि धुवा अन्ने करणा चला सत्त ॥ १२ ॥
 चाउइसि रत्तीए सउणी पडिवज्जए सया करणं ।
 ततो अहकमं खलु चउप्पयं णाग किंसुग्घं ॥ १३ ॥
 भावे पओगवीसस पओगसा मूल उत्तरे चेव ।
 उत्तर कमसुयजोवण वण्णाई भोयणाईसु ॥ १४ ॥
 वण्णाइया य वण्णाइएसु जे केइ वीससामेला ।
 ते होन्ति थिरा अथिरा छायातवदुद्धमाईसु ॥ १५ ॥
 मूलकरणं पुण सुए तिविहे जोगे सुमासुभे ज्ञाणे ।
 ससमयसुएण पगयं अज्झवसाणेण य सुहेणं ॥ १६ ॥
 ठिइअणुभावे बन्धणनिकायणनिहत्तदीहहस्सेसु ।
 संकमउदीस्णाए उदए वेए उवसमे य ॥ १७ ॥
 सोऊण जिणवरमयं गणहारी काउ तक्खओवसमं ।
 अज्झवसाणेण कयं सुत्तमिणं तेण स्यगडं ॥ १८ ॥
 वइजोगेण पभासियमणेगजोगंधराण साहूणं ।
 तो वयजोगेण कयं जीवस्स सभावियगुणेण ॥ १९ ॥
 अक्खरगुणमतिसंघायणाए कम्मपरिसाडणाए य ।
 तदुभयजोगेण कयं सुत्तमिणं तेण सुत्तगडं ॥ २० ॥
 सुत्तेण सुत्तिया चिय अत्था तह सइया य जुत्ता य ।
 तो बहुविहप्पउत्ता एय पसिद्धा अणाईया ॥ २१ ॥
 दो चेव सुयक्खन्धा अज्झयणाई च होन्ति तेवीसं ।
 तेत्तिसुदेसणकाला आयाराओ दुगुणमङ्गं ॥ २२ ॥

निक्खेवो गाहाए चउव्विहो छव्विहो य सोलससु ।
 निक्खेवो य सुयम्मि य खन्धे य चउव्विहो होइ ॥ २३ ॥
 ससमयपरसमयपरूवणा य पाऊण वुज्झणा चेव ।
 संवुद्धस्सुवसग्गा थीदोसविवज्जणा चेव ॥ २४ ॥
 उवसग्गभीरुणो थीवसस्स णरएसु होज्ज उववाओ ।
 एव महप्पा वीरो जयमाह तहा जएज्जाह ॥ २५ ॥
 परिचत्तनिसीलकुसीलसुसीलसविग्गसीलवं चेव ।
 णाऊण वीरियदुगं पण्डियवीरिए (पयड्डिज्जा) ॥ २६ ॥
 धम्मो समाहि मग्गो समोसठा चउसु सच्चवाईसु ।
 सीसभुणदोसकहणा गन्थम्मि सया गुरुनिवासो ॥ २७ ॥
 आयाणिय संकलिया आयाणीयम्मि आययचरित्तं ।
 अप्पगन्धे पिण्डियवयणेणं होइ अहिगारो ॥ २८ ॥
 नासं ठवणा दविए खेत्ते काले कुत्तित्थसंगारे ।
 कुलगणसंकरगण्डी वोद्धव्वो भावसमए य ॥ २९ ॥
 महपञ्चभूय एकप्पए य तज्जीवतस्सरिरे य ।
 तह य अगारगवाई अत्तच्छट्ठो अफलवाई ॥ ३० ॥
 वीए नियईवाओ अन्नाणिय तह य नाणवाईओ ।
 कम्मं चयं न गच्छइ चउव्विहं भिक्खुसमयम्मि ॥ ३१ ॥
 तइए आहाकम्मं कडवाई जह य ते य वाईओ ।
 किञ्चुवमा य चउत्थे परप्पवाई अविरएसु ॥ ३२ ॥

Com. on—1. 1. 1. 8.

पञ्चहं संजोए अन्नगुणाणं च चेयणाइगुणो ।
 पञ्चिन्दियठाणाणं ण अन्नमुणियं मुणइ अन्नो ॥ ३३ ॥

Com. on—1. 1. 1. 13.

को वेणई अकयं ? कयनासो पञ्चहा गई नत्थि ।
 देवमणुस्सगयागइ जाईसरणाइयागं च ॥ ३४ ॥

ण हु अफलथोवणिच्छियकालफलत्तणमिहं अदुमहेऊ ।
ण्णदुद्धथोवदुद्धत्तणे णगावित्तणे हेऊ ॥ ३५ ॥

Introduction to 1. 2. 1.

वेयालियम्मि वेयालगो य वेयालणं वियालणियं ।
तिन्नि वि चउक्कगाइं वियालओ एत्थ पुण जीवो ॥ ३६ ॥
दव्वं च परमुमाई दंसणणाणतवसंजमा भावे ।
दव्वं च दारुगाई भावे कम्मं वियालणियं ॥ ३७ ॥
वेयालियं इह देसियं ति वेयालियं तओ होइ ।
वेयालियं तहा वित्तमात्थि तेणेव य णिवद्धं ॥ ३८ ॥
कामं तु सासयमिणं कहियं अट्ठावयम्मि उसभेणं ।
अट्ठाणउत्तिसुयाणं सोऊणं ते वि पव्वइया ॥ ३९ ॥
पढमे संबोहो अनिच्चया य बीयम्मि माणवज्जणया ।
अहिगारो पुण भणिओ तहा तहा बहुविहो तत्थ ॥ ४० ॥
उदेसम्मि य तइए अन्नाणचियस्स अवचओ भणिओ ।
वज्जेयव्वो य सया सुहप्पमाओ जइजणेणं ॥ ४१ ॥

Com. on--1. 2. 1. 1.

दव्वं निदावेओ दंसणणाणतवसंजमा भावे ।
अहिगारो पुण भणिओ नाणे तवदंसणचरित्ते ॥ ४२ ॥

Com. on--1. 2. 2 1.

तवसंजमणाणेसु वि जइ माणो वज्जिओ महेसीहिं ।
अत्तसमुक्करिसत्थं किं पुण हीला उ अन्नेसिं ? ॥ ४३ ॥
जइ ताव निज्जरमओ पाडिसिद्धो अट्ठमाणमहणेहिं ।
अविसेसमयट्ठाणा परिहरियव्वा पयत्तेण ॥ ४४ ॥

Introduction to 1. 3. 1.

उवसग्गाम्मि य ल्हकं दव्वे चैयणमचेयणं दुविहं ।
आगन्तुगो य पीलाकरो य जो सो उवस्सग्गो ॥ ४५ ॥

खेत्तं बहुओघपयं कालो एगन्तदूसमाईओ ।
 भावे कम्मब्बुदओ सो दुविहो ओघुवक्कमिओ ॥ ४६ ॥
 उवक्कमिओ संयमविग्गकरे एत्थुवक्कमे पगयं ।
 दब्बे चउव्विहो देवमणुयतिरियायसंवेत्तो ॥ ४७ ॥
 एक्केको य चउविहो अट्टविहो वा वि सोलसविहो वा ।
 घडण जयणा व तेस्मि एत्तो वोच्छं अहीयारं ॥ ४८ ॥
 पडमम्मि य पडिलोमा होन्ती अणुलोमगा य विइयम्मि ।
 तडए अज्झत्तविसोहणं च परावइवयणं च ॥ ४९ ॥
 हेउमरिमेहि अहेउएहि समयपडिएहि णिउणेहिं ।
 मीलखलियपन्नवणा कया चउत्थम्मि उदेसे ॥ ५० ॥

(Com. on 1. 3. 4. 12.)

जह णाम मण्डलग्गेण सिग्ं छेत्तूण कस्सइ मणुस्सो ।
 अच्छेज्ज पराहुत्तो किं नाम तओ ण घेप्पेज्जा ॥ ५१ ॥
 जह वा विसगण्डूसं कोई घेत्तूण नाम तुण्हिको ।
 अन्नेण अदीमन्तो किं नाम तओ न व मरेज्जा ॥ ५२ ॥
 जह नाम सिग्गिगओ कोई रयणाणि णाम घेत्तूणं ।
 अच्छेज्ज पराहुत्तो किं णाम तओ न घेप्पेज्जा ॥ ५३ ॥

Introduction to 1. 4. 1.

दब्बाभिलावचिन्धे वेए भावे य इत्थिणिकखेवो ।
 अहिलावे जह सिद्धी भावे वेयम्मि उवउत्तो ॥ ५४ ॥
 णामं ठवणादविए खेत्ते काले य पज्जणणकम्मे ।
 भोगे गुणे य भावे दस एए पुरिसिणिकखेवा ॥ ५५ ॥
 पढमे संथवसंलवमाइहि खलणा उ होइ सीलस्स ।
 विइए इहेव खलियस्स अवत्था कम्मवन्धो य ॥ ५६ ॥
 म्हरा मो मन्नन्ता कइयवियाहिं उवहिप्पहाणाहिं ।
 गहिया हु अमयपज्जोयकूलवालाइणो वहवे ॥ ५७ ॥

तम्हा ण उ वीसम्भो गन्तव्वो णिच्चमेव इत्थीसु ।
 पढमुद्देसे भणिया जे दोसा ते गणन्तेण ॥ ५८ ॥
 सुसमत्था व समत्था कीरन्ती अप्पसत्तिया पुरिसा ।
 दीसन्ति सूरवाई णारीवसगा ण ते सूरा ॥ ५९ ॥
 धम्मम्मि जो दढा मइ सो सूरु सत्तिओ य वीरो य ।
 ण हु धम्मणिरुत्साहो पुरिसो सूरु सुबलिओ वि ॥ ६० ॥
 एए चेव य दोसा पुरिससमाए वि इत्थियाणं पि ।
 तम्हा उ अप्पमाओ विरागमग्गम्मि तासिं तु ॥ ६१ ॥

Introduction to 1. 5. 1.

णिरए छक्कं दव्वं णिरया उ इहेव जे भवे असुभा ।
 खेत्तं णिरओगासो कालो णिरएसु चेव ठिई ॥ ६२ ॥
 भावे उ णिरयजीवा कम्भुदओ चेव णिरयपाओगो ।
 सोऊण णिरयदुक्खं तवचरणे होइ जइयव्वं ॥ ६३ ॥
 णामंठवणादविए खेत्ते काले तहेव भावे य ।
 एसो उ विभत्तीए णिक्खेवो छव्विहो होइ ॥ ६४ ॥
 पुढवीकासं अण्णाणुवक्कम णिरयवालवहणं च ।
 तिसु वेदेन्ति अताणा अणुभागं चेव सेसासु ॥ ६५ ॥
 अम्बे अम्बरिसी चेव सामे य सबले वि य ।
 रोदोवरुद्द काले य महाकाले ति आवरे ॥ ६६ ॥
 असिपत्ते धणुं कुम्भे वालु वेयरणी वि य ।
 खरस्सरे महाघोसे एवं पन्नरसाहिया ॥ ६७ ॥
 धाडेन्ति य हाडेन्ति विन्धन्ति तह णिसुम्भन्ति ।
 मुञ्चन्ति अम्बरतले अम्बा खलु तत्थ णेरइया ॥ ६८ ॥
 ओहयहए य तहियं णिस्सन्ने कप्पणीहि कप्पन्ति ।
 विदुलगचडुलगल्लिन्ने अम्बरिसी तत्थ णेरइए ॥ ६९ ॥
 साडणपाडणतोडण बन्धणरञ्जुल्लयप्पहोरेहि ।

सामा णेरइयाणं पवत्तयन्ती अपुण्णाणं ॥ ७० ॥
 अन्तगयफिप्फिसाणि य हिययं कालेज्ज कुण्कुसे वक्के ।
 सबला णेरइयाणं कट्ठेन्ति तहिं अपुण्णाणं ॥ ७१ ॥
 असिसत्तिकोन्ततोभरसलतिसलेसु मूइचियगासु ।
 पोयन्ति रुदकम्मा उ णरगपाला तहिं रोदा ॥ ७२ ॥
 भज्जन्ति अज्जमज्जाणि ऊरुवाहूसिराणि करचरणे ।
 कप्पेन्ति कप्पणीहिं उवरुदा पावकम्मरया ॥ ७३ ॥
 मीरासु सुण्ठएसु य कन्डूगु पयण्डएसु य पयन्ति ।
 कुम्भीसु य लोहियसु य पयन्ति काला उ णेरइए ॥ ७४ ॥
 कप्पन्ति कागिगीसंसगाणि छिन्दन्ति सीहपुच्छाणि ।
 खावन्ति य णेरइए सहकाला पावकम्मरण ॥ ७५ ॥
 हत्थे पाए ऊरू बाहुभिरापायअज्जमज्जाणि ।
 छिन्दन्ति पगासं तू असि णेरइए निरयपाला ॥ ७६ ॥
 कण्णोदुणासकरचरणदण्डणदुण्डुगुऊरुवाहूणं ।
 छेयणभेयणत्ताड म असिपत्तधणूहि पाडन्ति ॥ ७७ ॥
 कुम्भीसु य पयणेषु य लोहियसु य कण्डुलोहिकुम्भीसु ।
 कुम्भी य णरयपाला हणन्ति पाडन्ति णरएसु ॥ ७८ ॥
 तडतडतडस भज्जन्ति भज्जणे कलम्बुवालुगापट्टे ।
 वालुगा णेरया लोलन्ती अम्बरतलम्मि ॥ ७९ ॥
 पूयरुहिरकेसट्टिवाहिणी कलकलेन्तजलसोया ।
 वेयरणिणिरयपाला णेरइए उ पयाहन्ति ॥ ८० ॥
 कप्पेन्ति करकएहिं तच्छिन्ति परोप्परं परसुएहिं ।
 सिम्बलितरुमारुहन्ती खरस्सरा तत्थ णेरइए ॥ ८१ ॥
 भीए य पलायन्ते समन्ततो तत्थ ते णिरुम्भन्ति ।
 पसुणां जहा पसुवहे महयोसा तत्थ णेरइए ॥ ८२ ॥

Introduction to 1. 6.

पाहन्ने महसदो दव्वे खेत्ते य कालभावे य ।
 वीरस्स उ णिक्खेवो चउक्कओ होई णायव्वो ॥ ८३ ॥
 थुइणिक्खेवो चउहा आगन्तुअभूसणेहिं दव्वथुई ।
 भावे सन्ताण गुणाण कित्तणा जे जहिं भणिया ॥ ८४ ॥
 पुच्छिसु जम्बुणामो अज्ज सुहम्मा तओ कहेसी य ।
 एव महप्पा वीरो जयमाह तहा जएज्जाहि ॥ ८५ ॥

Introduction to 1. 7.

सीले चउक्क दव्वे पाउरणाभरणभोयणार्इसु ।
 भावे उ ओहसीलं अभिक्खमासेवणा चेव ॥ ८६ ॥
 ओहे सीलं विरई विरयाविरई य अविरइ असीलं ।
 धम्मे णाययवाई अपसत्थ अहम्मकोवाइ ॥ ८७ ॥
 परिभासिया कुसीला य एत्थ जावन्ति अविरया केई ।
 सुत्ति पसंसा सुद्धो कुत्ति दुगुच्छा अपरिसुद्धो ॥ ८८ ॥
 अफ्फासुयपडिसेविय णामं भुज्जो य सीलवाई य ।
 फासुं वयन्ति सीलं अफासुया मो अभुज्जन्ता ॥ ८९ ॥
 जह णाम गोयमा चण्डिदेवगा वारिमद्दगा चेव ।
 जे अग्गिहोत्तवाई जलसोयं जे य इच्छन्ति ॥ ९० ॥

Introduction to 1. 8.

विरिए छकं दव्वे सच्चित्ताचित्तमीसगं चेव ।
 दुपयचउप्पगअपयं एयं तिविहं तु सच्चित्तं ॥ ९१ ॥
 अच्चित्तं पुण विरियं आहारावरणपहरणार्इसु ।
 जह ओसहीण भणियं विरियं रसवीरियविवागो ॥ ९२ ॥
 आवरणे कवयाई चक्काईवं च पहरणे होन्ति ।
 खेत्ताम्मि जम्मि खेत्ते काले जं जम्मि कालम्मि ॥ ९३ ॥
 भावो जीवस्स सवीरियस्स विरियम्मि लद्धि णेगविहा ।

ओरस्सिन्दियअज्झप्पिएसु बहुसो बहुविहीयं ॥ ९४ ॥
 मणवइकाया आणापाणू संभव तथा य संभव्वे ।
 सोत्ताईणं सदाइएसु विसएसु गहणं च ॥ ९५ ॥
 उज्जमधिइधीरत्तं सोण्डीरत्तं खमा य गम्भीरं ।
 उवओगजोगतवसंजमाइयं होइ अज्झप्पो ॥ ९६ ॥
 सव्वं पि य तं तिविहं पण्डिय बालविरियं च मीसं च ।
 अहवा वि होइ दुविहं अगारअणगारियं चेव ॥ ९७ ॥

Com. on—1. 8. 4.

सत्थं असिमाईयं विज्जामन्ते य देवकम्मकयं ।
 पत्थिववारुणअग्गेय वाउ तह मीसगं चेव ॥ ९८ ॥

Introduction to 1. 9. 1.

धम्मो पुव्वुदिट्ठो भावधम्मणे एत्थ अहिगारे ।
 एसेव होइ धम्मो एसेव समाहिमग्गो त्ति ॥ ९९ ॥
 णामंठवणाधम्मो दव्वधम्मो य भावधम्मो य ।
 सच्चित्ताच्चित्तमीसगगिहत्यदाणे दवियधम्मो ॥ १०० ॥
 लोइयलोउत्तरिओ दुविहो पुण होइ भावधम्मो उ ।
 दुविहो वि दुविहत्तिविहो पञ्चविहो होइ णायव्वो ॥ १०१ ॥
 पासत्थोसण्णकुसील संथवो ण किर वट्ठई काउं ।
 सयगोड अज्झयणे धम्मम्मि निकाइयं एयं ॥ १०२ ॥

Introduction to 1. 10. 1.

आयाणपण्णायं गोणं णामं पुणो समाहि त्ति ।
 णिक्खविउण समाहिं भावसमाहीइ पगयं तु ॥ १०३ ॥
 णामंठवणादविए खेत्ते काले तहेव भावे य ।
 एसो उ समाहीए णिक्खेवो छव्विहो होइ ॥ १०४ ॥
 पञ्चसु विससु सुभेसु दव्वम्मि ता भवे समाहि त्ति ।
 खेत्तं तु जम्मि खेत्ते काले कालो जहिं जो उ ॥ १०५ ॥

भावसमाहि चउव्विह दंसणणाणे तवे चरित्ते य ।

चउसु वि समाहियप्पा सम्मं चरणट्ठिओ साहू ॥ १०६ ॥

Introduction to 1. 11. 1.

णामं ठवणा दविए खेत्ते काले तहेव भावे य ।

एसो खलु मग्गस्स य णिक्खेवो छव्विहो होइ ॥ १०७ ॥

फलगलयन्दोलणवित्तरञ्जुदवणविलपासमग्गे य ।

खीलगअयपक्खिपहे छत्तजलाकासदव्वम्मि ॥ १०८ ॥

खेत्तम्मि जम्मि काले कालो जहिं हवइ जो उ ।

भावम्मि होइ दुविहो पसत्थ तह अप्पसत्थो य ॥ १०९ ॥

दुविहम्मि वि तिगभेदो णेओ तस्स उ विणिच्छओ दुविहो ॥

सुगइफलदुग्गइफलो पगयं सुगइफलेणित्थं ॥ ११० ॥

दुग्गइफलवाईणं तिण्णि तिसट्ठा सयाइ वाईणं ।

खेमे य खेमरूवे चउक्कगं मग्गमाईसु ॥ १११ ॥

सम्मप्पणिओ मग्गो णाणे तह दंसणे चरित्ते य ।

चरगपरिव्वायाईचिण्णो मिच्छत्तमग्गो उ ॥ ११२ ॥

इड्डिरससायगुरुर्या छज्जीवनिकायघायनिरया य ।

जे उवादिसन्ति भग्गं कुमग्गमग्गस्सिया ते उ ॥ ११३ ॥

तवसंजमप्पहाणा गुणधारी जे वयन्ति सब्भावं ।

सव्वजगज्जीवहियं तस्माहु सम्मप्पणीयामिणं ॥ ११४ ॥

पन्थो मग्गो णाओ विहि धिइ सुगई हियं तह सुहं च ।

पत्थं सेयं णिव्वुइ णिव्वाणं सिक्करं चेव ॥ ११५ ॥

Introduction to 1. 12. 1.

समवसरणे वि छक्कं सच्चित्ताचित्तमीसगं दव्वे ।

खेत्तम्मि जम्मि खेत्ते काले जं जम्मि कालम्मि ॥ ११६ ॥

भावसमोसरणं पुण णायव्वं छव्विहम्मि भावम्मि ।

अहवा किरिय अकिरिया अन्नाणी चेव वेणइया ॥ ११७ ॥

अत्थि त्ति किरियवाई वयन्ति नत्थि त्तिकिरियवाई य ।
 अन्नाणी अन्नाणं विणइत्ता वेणइयवाई ॥ ११८ ॥
 असियसयं किरियाणं अकिरियाणं च होइ चुलसीई ।
 अन्नाणिय सत्तट्ठी वेणइयाणं च वत्तीसा ॥ ११९ ॥
 तेसि मत्ताणुमएणं पन्नवणा वणिया इहज्जयणे ।
 सव्भावणिच्छयत्थं समोसरणमाहु तेणं तु ॥ १२० ॥
 सम्मदिट्ठी किरियावाई मिच्छा य सेसगा वाई ।
 जहिउण मिच्छवायं सेवह वायं इमं सच्चं ॥ १२१ ॥

Introduction to 1. 13. 1.

णामतहं ठवणतहं दव्वतहं चेव होइ भावतहं ।
 दव्वतहं पुण जो जस्स सभावो होइ दव्वस्स ॥ १२२ ॥
 भावतहं पुण नियमा णायव्वं छव्विहम्मि भावम्मि ।
 अहवा वि नाणदंसणचरित्तिविणएण अज्झप्पे ॥ १२३ ॥
 जह सुत्तं तह अत्थो चरणं चारो तह त्ति णायव्वं ।
 सन्तम्मि पसंसाए असई पगयं दुगुञ्छाए ॥ १२४ ॥
 आयरियपरंपरणे आगयं जो उ छेयवुद्धीए ।
 कोवेइ छेयवाई जमालिनासं स णासिहिइ ॥ १२५ ॥
 ण करेइ दुक्खमोक्खं उज्जममाणो वि संजमतवेसुं ।
 तम्हा अतुक्करिसो वज्जेअव्वो जइजणेणं ॥ १२६ ॥

Introduction to 1. 14. 1.

गन्थो पुव्वुदिट्ठो दुविहो सिस्सो य होइ णायव्वो ।
 पव्वावण सिक्खावण पगयं सिक्खावणाए उ ॥ १२७ ॥
 सो सिक्खगो य दुविहो गहणे आसेवणाय णायव्वो ।
 गहणम्मि होइ तिविहो सुत्ते अत्थे तदुभए य ॥ १२८ ॥
 आसेवणाय दुविहो मूलगुणे चेव उत्तरगुणे य ।
 मूलगुणे पञ्चविहो उत्तरगुण वारसविहो उ ॥ १२९ ॥

आयरिओ वि य दुविहो पव्वावन्तो व सिक्खवन्तो य ॥
 सिक्खावन्तो दुविहो गहणे आसेवणे चेव ॥ १३० ॥
 गाहावेन्तो तिविहो सुत्ते अत्थे य तदुभए चेव ।
 मूलगुण उत्तरगुणे दुविहो आसेवणाए उ ॥ १३१ ॥

Introduction to 1. 15. 1.

आयाणे गहणम्मि य णिक्खेवो होइ दोण्ह वि चउक्को ।
 एगट्ठं नाणट्ठं च होज्ज पगयं तु आयाणे ॥ १३२ ॥
 जं पढमस्सन्तिमए विइयस्स उ तं हवेज्ज आदिम्मि ।
 एण्णायाणिज्जं एसो अन्नो वि पज्जाओ ॥ १३३ ॥
 णामाई ठवणाई दव्वाई चेव होइ भावाई ।
 दव्वाई पुण दव्वस्स जो सभावो सए ठाणे ॥ १३४ ॥
 आगमणोआगमओ भावाई तं बुहा उवदिसन्ति ।
 णोआगमओ भावो पञ्चविहो होइ णायव्वो ॥ १३५ ॥
 आगमओ पुण आदी गणिपिडगं होइ बारसज्जं तु ।
 गन्धसिलोगो पदपादअक्खराई च तत्थादी ॥ १३६ ॥

Introduction to 1. 16. 1.

णामंठवणागाहा दव्वगाहा य भावगाहा य ।
 पोत्थगपत्तगलिहिया सा होई दव्वगाहा उ ॥ १३७ ॥
 होइ पुण भावगाहा सागारुवओगभावणिप्फन्ना ।
 महुराभिहाणजुत्ता तेणं गाह त्ति णं विन्ति ॥ १३८ ॥
 गाहीकया व अत्था अहव ण सामुद्दएण छन्देणं ।
 एएण होइ गाहा एसो अन्नो वि पज्जाओ ॥ १३९ ॥
 पण्णरससु अज्झयणेसु पिण्डियत्थेसु जो अवित्तह त्ति ।
 पिण्डियवयणेणत्थं गहेइ तम्हा तओ गाहा ॥ १४० ॥
 सोलसमे अज्झयणे अणगारगुणाण वण्णणा भणिया ।
 गाहासोलसणामं अज्झयणमिणं ववदिसेन्ति ॥ १४१ ॥

Introduction to 2 1. 1.

णामंठवणादविए खेत्ते काले तहेव भावे य ।
 एसो खलु महतम्मि निक्खेवो छव्विहो होइ ॥ १४२ ॥
 णामंठवणादविए खेत्ते काले तहेव भावे य ।
 एसो खलु अज्झयणे निक्खेवो छव्विहो होइ ॥ १४३ ॥
 णामंठवणादविए खेत्ते काले य गगण संठाणे ।
 भावे य अट्टमे खलु णिक्खेवो पोण्डरीयस्स ॥ १४४ ॥
 जो जीवो भविओ खलुव्वज्जिकामो य पुण्डरीयम्मि ।
 सो दव्वपुण्डरीओ भावम्मि विजाणओ भणिओ ॥ १४५ ॥
 एगभविए य वद्धाउए य अभिमुहियनामगोए य ।
 एए तिण्णि वि देसा दव्वम्मि य पोण्डरीयस्स ॥ १४६ ॥
 तेरिच्छिथा मणुस्सा देवगणा चेव होन्ति जे पवरा ।
 ते होन्ति पुण्डरीया सेसा पुण कण्डरीया उ ॥ १४७ ॥
 जलयर थलयर खयरा जे पवरा चेव होन्ति कन्ता य ।
 जे य सभावेऽणुमया ते होन्ति पोण्डरीया उ ॥ १४८ ॥
 अरिहन्त चक्कवट्ठी चारण विजाहरा दसारा य ।
 जे अन्न इट्ठिमन्ता ते होन्ति पोण्डरीया उ ॥ १४९ ॥
 भवणवइवाणमन्तरजोइसवेमाणियाण देवाणं ।
 जे तेसिं पवरा खलु ते होन्ति पोण्डरीया उ ॥ १५० ॥
 कंसणं दूसाणं मणिमोत्तियसिलपत्रालमाईणं ।
 जे य अचित्ता पवरा ते होन्ति पोण्डरीया उ ॥ १५१ ॥
 जाइं खेत्ताइं खलु सहाणुभावाइ होन्ति लोगम्मि ।
 देवकुरुमाइयाइं ताइं खेत्ताइं पवराइं ॥ १५२ ॥
 जीवा भवट्ठिईए कायठिईए य होन्ति जे पवरा ।
 ते होन्ति पोण्डरीया अवसेसा कण्डरीया उ ॥ १५३ ॥
 गणणाए रज्जू खलु संठाणं चेव होन्ति चउरंसं ।

एयाइँ पोण्डरीयाइ होन्ति सेसाइँ इयराइँ ॥ १५४ ॥
 ओदइए उवसमिए खइए य तहा खओवसमिए य ।
 परिणामसंनिवाए जे पवरा ते वि ते चेव ॥ १५५ ॥
 अहवा वि नाणदंसणचरित्तविणए तहेव अज्झप्ये ।
 जे पवरा होन्ति मुणी ते पवरा पुण्डरीया उ ॥ १५६ ॥
 एत्थं पुण अहिगारो वणस्सइकायपुण्डरीएणं ।
 भावम्मि य समणेणं अज्झयणे पोण्डरीयम्मि ॥ १५७ ॥

Summary of 2. 1.

उवमा य पोण्डरीए तस्सेव य उवचएण निज्जुत्ती ।
 अधिगारो पुण भणिओ जिणोवदसेण सिद्धि त्ति ॥ १५८ ॥
 सुरमणुयातिरियनिरओवङ्गे मणुया पद्द चरित्तम्मि ।
 अवि य महाजणनेय त्ति चक्कवट्ठिम्मि अधिगारो ॥ १५९ ॥
 अवि य हु भारियकम्मा नियमा उक्कस्सनिरयठिइगामी ।
 ते वि हु जिणोवएसेण तेणेव भवेण सिज्जन्ति ॥ १६० ॥
 जलमालकदमालं बहुविहवह्लिगहणं च पुक्खरिणिं ।
 जंघाहि व बाहाहि व नावाहि व तं दुरवगाहं ॥ १६१ ॥
 पउमं उल्लंघेत्तुं ओयरमाणस्स होइ वावत्ती ।
 किं नत्थि से उवाओ जेणुल्लंघेज्ज अविवन्नो ॥ १६२ ॥
 विज्जा व देवकम्मं अहवा आगासिया विउव्वणया ।
 पउमं उल्लंघेत्तुं न एस इणमो जिणक्खाओ ॥ १६३ ॥
 सुद्वप्पओगविज्जा सिद्धा उ जिणस्स जाणणा विज्जा ।
 भवियजणपोण्डरीया उ जाए सिद्धिगतिमुवेन्ति ॥ १६४ ॥

Introduction to 2. 2.

किरियाओ भणियाओ किरियाठाणं ति तेण अज्झयणं ।
 अहिगारो पुण भणिओ बन्धे तह मोक्खमग्गे य ॥ १६५ ॥
 दव्वे किरिएजणया य पयोगुवायकरणिजसमुयाणे ।

इरियावहसंमत्ते सम्मामिच्छा य मिच्छते ॥ १६६ ॥
 नामं ठवणा दविण् खेत्तेऽद्वा उहु उवरई वसही ।
 संजमपग्गहजोहे अचलगणण संधणा भावे ॥ १६७ ॥
 समुयाणियाणिह तओ सम्मपउत्ते य भावठाणम्मि ।
 किरियाहि पुरिस पावाइए उ सव्वे परिकखेज्जा ॥ १६८ ॥

Introduction to 2. 3.

नामंठवणादविण् खेत्ते भावे य होइ बोद्धव्वो ।
 एसो खलु आहारे निक्खेवो होइ पञ्चविहो ॥ १६९ ॥
 दव्वे सच्चित्ताई खेत्ते नयरस्स जणवओ होइ ।
 भावाहारो तिविहो ओए लोमे य पक्खेवे ॥ १७० ॥
 सरीरेणोयाहारो तथाय फासेण लोमआहारो ।
 पक्खेवाहारो पुण कावलिओ होइ नायव्वो ॥ १७१ ॥
 ओयाहारां जीवा सव्वे अप्पजत्तगा मुणेयव्वा ।
 पजत्तगा य लोमे पक्खेवे होन्ति नायव्वा ॥ १७२ ॥
 एगिन्दियदेवाणं नेरइयाणं च नत्थि पक्खेवो ।
 सेसाणं पक्खेवो संसारत्थाण जीवाणं ॥ १७३ ॥
 एक्कं च दो व समए तिण्णि व समए मुहुत्तमद्धं वा ।
 सार्इयमनिहणं पुण कालमणाहारगा जीवा ॥ १७४ ॥
 एक्कं च दो व समए केवलिपरिवज्जिया अणाहारा ।
 मन्थम्मि दोण्णि लोए य पूरिए तिण्णि समयो उ ॥ १७५ ॥
 अन्तोमुहुत्तमद्धं सेलेसीए भवे अणाहारा ।
 सार्इयमनिहणं पुण सिद्धा यणहारगा होन्ति ॥ १७६ ॥
 जोएण कम्मएणं आहारेई अणन्तरं जीवो ।
 तेण परं मीसेणं जाव सरीसस्स निष्फत्ती ॥ १७७ ॥
 णामं ठवणपरिन्ना दव्वे भावे य होइ नायव्वा ।
 दव्वपरिन्ना तिविहा भावपरिन्ना भवे दुविहा ॥ १७८ ॥

Introduction to 2. 4.

णामंठवणादविण अइच्छ पडिसेहए य भावे य ।
 एसो पच्चक्खाणस्स छविहो होइ निक्खेवो ॥ १७९ ॥
 मूलगुणेषु य पमयं पच्चक्खाणे इहं अधीगारो ।
 होज हु तप्पच्चइया अप्पच्चक्खाणकिरिया उ ॥ १८० ॥

Introduction to 2. 5.

णामंठवणायारे दव्वे भावे य होइ नायव्वो ।
 एमेव य सुत्तस्सा निक्खेवो चउविहो होइ ॥ १८१ ॥
 आयारसुयं भणियं वज्जेयव्वा सया अणायारा ।
 अबहुसुयस्य हु होज विराहणा इत्थ जइयव्वं ॥ १८२ ॥
 एयस्स उ पडिसेहो इहमज्झयणम्मि होइ नायव्वो ।
 तो अणगारसुयं ति य होई नामं तु एयस्स ॥ १८३ ॥

Introduction to 2. 6.

नामंठवणाअदं दव्वदं चेव होइ भावदं ।
 एसो खलु अदस्स उ निक्खेवो चउविहो होइ ॥ १८४ ॥
 उदगदं सारदं छवियइ वसदं तह मिलेसदं ।
 एयं दव्वदं खलु भावेणं होइ रागदं ॥ १८५ ॥
 एगमवियच्चद्वाउए य अभिमुहए य नामगोए य ।
 एए तिण्णि पगारा दव्वदे होन्ति नायव्वा ॥ १८६ ॥
 अइपुरे अइसुतो नामेणं अदओ ति अणगारो ।
 तत्तो समुट्ठियंमिणं अज्झयणं अइइजं ति ॥ १८७ ॥
 कामं दुवालसङ्गं जिणवयणं सासयं महाभागं ।
 सव्वज्झयणाइं तहा सव्वक्खरसंनिवाया य ॥ १८८ ॥
 तह वि य कोई अत्थो उप्पज्जइ तम्मि समयम्मि ।
 पुव्वभणिओ अणुमओ य होइ इसिभासिएसु जहा ॥ १८९ ॥

Story of Adda.

अज्जदण्ण गोसालभिक्षुवम्भवईतिदण्डीणं ।
जह हत्थितावसाणं कहियं इणमो तहा वोच्छं ॥ १९० ॥
गामे वसन्तपुरए सामइओ घरणिसहिओ निकखन्तो ।
भिक्षवायरियादिट्ठा ओहासियमत्तवेहासं ॥ १९१ ॥
संवेगसमावन्नो माई भत्तं चइत्तु दियलोए ।
चदऊणं अदपुरे अदसुओ अदओ जाओ ॥ १९२ ॥
पीई य दोण्ह दूओ पुच्छणमभयस्स पट्टवे सो वि ।
तेणावि सम्मदिट्ठि ति होज्ज पडिमा रहम्मि गया ॥ १९३ ॥
दट्ठं संबुद्धो रक्खिओ य आसाण वाहण पलाओ ।
पव्वावन्तो धरिओ रज्जं न करेइ को अन्नो ॥ १९४ ॥
अगणिन्तो निकखन्तो विहरइ पडिमाइ दारिगा वरिओ ।
सुवण्णवसुहाराओ रन्नो कहणं च देवीए ॥ १९५ ॥
तं नेइ पिया तीसे पुच्छण कहणं च वरण दोवारे ।
जाणाहि वायविम्भं आगमणं कहण निग्गमणं ॥ १९६ ॥
पडिमागयस्समीवे सप्परिवारा अभिक्ख पडिवयणं ।
भोगा सुयाण पुच्छण सुयवन्ध पुण्णे य निग्गमणं ॥ १९७ ॥
रायगिहागम चोरा रायभया कहण तेसि दिक्खा य ।
गोसालभिक्षुवम्भी तिदण्डिया तावसेहि सह वाओ ॥ १९८ ॥
वाए पराइइत्ता सव्वे वि य सरणमब्भुगया ते ।
अदगसहिया सव्वे जिणवीरसगासै निकखन्ता ॥ १९९ ॥
ण दुक्करं वा णरपासमोयणं गयस्त मत्तस्स वणम्मि रायं ।
जहा उवत्तावल्लिण तन्तुणा सुदुक्करं मे पडिहाइ मोयणं ॥ २०० ॥

Introduction to 2.7.

णामअलं ठवणअलं दव्वअलं चेव होइ भावअलं ।
एसो अलसदम्मि उ निकखेवो चउव्विहो होइ ॥ २०१ ॥

पञ्जतीभावे खलु पढमो बीओ भवे अलंकारे ।

तइयो ऊ पडिसेहे अलसहो होइ नायव्वो ॥ २०२ ॥

पडिसेहणगारस्सा इत्थीसदेण चैव अलसहो ।

रायगिहे नयरम्मी नालन्दा होइ बाहिरिया ॥ २०३ ॥

नालन्दाएँ समीवे मणोरहे भासि इन्दभूइणा उ ।

अज्झयणं उदगस्स उ एयं नालन्दइजं तु ॥ २०४ ॥

Conclusion of 2. 7.

पासावच्चिजो पुच्छियाइओ अज्जगोयमं उदगो ।

सावगपुच्छा धम्मं सोउं कहियम्मि उवसन्ता ॥ २०५ ॥

